


四書述朱大全

十九



三之四

漢書門類	八六〇二	函	架	冊
	一五〇五			


內閣文庫	漢書	八六〇二	函	架
		二五		

論孟述朱大全

內閣文庫	番號	漢	8602
	冊數		5 ( 5 )
	函號	277.	21












孟子述朱大全卷十三

盡心章句上



凡四十六章

孟子曰盡其心者知其性也知其性則知天矣

心者人之神明所以具眾理而應萬事者也。新安陳氏曰心者神明之舍也。具眾理心

之體也。應萬事心之用也。大學章句釋明德。或問。性則心之所具。釋致知之知字。此釋心字。大槩三處皆互相發明。

之理而天又理之所從以出者也。語類問如何是天者理之所從出。曰天便是那太虛。但能盡心

知性。則天便不外。是矣。性便有那天。人有是心莫非全體。然不窮理則有所蔽而無

以盡乎此心之量。故能極其心之全體而無不盡者。必其能窮夫

理而無不知者也。既知其理。則其所從出亦不外是矣。以大學之

序言之。知性則物格之謂。盡心則知至之謂也。



或問心無限量者也。此其言盡心何也。曰：心之體無所不統而其用無所不周者也。今窮理而貫通，以至於可以無所不知，則固盡其無所不統之體，無所不周之用矣。是以平居靜處，虛明洞達，固無毫髮疑慮存於胸中。至於事至物來，則雖舉天下之物，或素所未嘗接於耳目思慮之間者，亦無不剴然迎刃而解。此其所以爲盡心而所謂心者，則固未嘗有限量也。大槩此章所謂盡心者，物格知至之事。曾子所以一唯而無疑於夫子之言者是也。所謂事天者，誠意正心修身之事。曾子所以臨深履薄而無日不省其身者是也。所謂立命者，如是以歿身焉。曾子所以啟手足而知免得正斃而無求者是也。以是推之，則一章之旨略可見矣。曰：諸說如何。曰：程子至矣。然其言有難知者，亦有記錄之誤。其曰無限量與

三者之名義

見集注

則至矣

精義或問人之形體有限量，心有限量，否。程子曰：論心之形，則安得無限量。又

問心之妙用，有有限量否。曰：自是人有限量，以有限之形，有有限之氣。苟不通之，以道則安得無限量。孟子曰：盡其心，知其性，心即性也。在天爲命，在人爲性，論其所主爲心，其實只是一個道。苟能通之於道，又豈有限量。天下更無性外之物。若云有有限量，除是性外，有物始。其曰才數着便不蓋者，問盡心莫是我有惻隱羞惡如此之得。如此數只是盡心便了。纔數着便不盡，大抵稟於天曰性，而所主在心，纔盡心即是知性。知性即是知天矣。論心之發其大目固不外乎四端，然其間支分脈布千差萬別，則有不容以四目盡者，是以不容徧舉而悉數也。其議張子京師長安之說亦至論。又曰：橫渠嘗喻以心知天，猶居京師往長安，但知出西門便安，更不可別求長安，只心便是天。盡之便知性，此句與前盡心即是知性句皆有疵。朱子語類辨之甚明，文集答林德久書曰：知者有漸之辭。盡者無餘之義。其意象規模自應有先後也。但其所譬觀此益曉然矣。知性便知天，當處便認取，更不可外求。但其所譬恐未的。若曰：猶居開封而識京師，則庶矣。蓋性只是心之理，天即



理之自然處。初非有二物也。其論釋比有盡心知性而無存養之功者。程子曰。釋氏本怖死。生為利。豈是公道。惟務上達而無下學。然則其上達處。豈有是也。元不相連屬。但有間斷。非道也。孟子曰。盡其心者。知其性也。彼所謂識心見性者也。若存心養性一段事。則無矣。彼因曰。出家獨善。便於道體。自不足。質夫曰。盡心知性。佛亦有至此者。存心養性。佛本不至。正承上文。無下學。非上達不連屬。而有間斷之病耳。非真以是許之也。更以後段答劉質夫之語觀之。意尤明白。其論直內方外。而曰。既無方外。則所謂直內者。其本亦不是。意亦如此。學者深考之可也。張子之說尤詳。可取者見

貫通之說。則不期於大而大。不待離舍見聞。而心之體用。未嘗不在我也。曰。然則存心養性。儒者之說。可得聞乎。曰。存心者。氣不逐物。而常守其至正也。養性者。事必循理。而不害其本然也。以此推

之。則儒者異端之辨明矣。曰。然則心之為物。與其盡之之方。奈何。曰。由窮理致知。積累其功。以至於盡性。則心之體用在我。不必先事揣量。着意想象。而別求所以盡之也。語類問程子解盡心知性處。云。心無體。以性為體。如何。曰。心是虛底物。性是裏面穰肚餡草。性之理包在心內。到發時。却是性底出來。性不是有一個物事在裏面喚做性。只是理所當然者。便是性。只是人合當如此。做底便是性。惟是孟子惻隱之心。仁之端也。這四句也有性。也有心。也有情。與橫渠心統性情一語好看。○又曰。伊川云。盡心。然後知性。此不然。盡字。大知字。零星。若未知性。便要盡心。則懸空無下手處。惟就知性上。積累將去。自然盡心。○因看程子語錄。心小性大。心不弘于性。滯于知。思說及上蔡云。心有止。說遂云。心有何窮盡。只得此本然之體。推而應事接物。皆是故於此。知性之無所不有。知天亦以此。因省李先生云。盡心者。如孟子見齊王問樂。則便對云。言貨色。則便對云。每遇一事。便有以處置將去。此是盡心。舊時不之曉。蓋此乃盡心之效。如此。此得此本然之心。則皆推將去。無窮也。如見牛未見羊。說苟見羊。則亦便是此心矣。○問盡心知性。不假存養。其惟聖人乎。佛本不假存養。豈竊希聖人之事乎。曰。盡知存養。吾儒釋氏相似。而不同。只是他所存所養。所知所盡處。道理皆不是。如吾儒盡心。只是盡君臣父子等心。便見有是理。性即是理也。如釋氏所謂盡心。知



性皆歸於空虛其所存養却是閉眉合眼全不理會道理。

**語類**盡其心者知其性也者字不可不仔細看人能盡其心者只爲知其性。知性却在先。又曰此句文勢與得其民者得其心也相似。人往往說先盡其心而後知性非也。心性本不可分。况其語脉是盡其心者知其性。心只是包着這道理。盡知其性之道理便是盡其心。若只要理會盡心。不知如何地盡。性者吾心之實理。若不知得盡却盡個甚麼。○盡其心者知其性也。由先能知其性。知性則知天矣。知性知天則能盡其心矣。不知性不能以盡其心。物格而後知至。先知得性之理然後明得此心。知性猶格物。盡心猶知至。知性然後能盡心。先知然後能盡。未有先盡而後方能知者。蓋先知得然後見得盡。○王德修問盡心然後知性。曰以某觀之。

性情與心固是一理。然命之以心。却似包着這性情在裏面。故孟氏語意却似說盡其心者。以其知性故也。此意橫渠得之。故說心統性情者也。看得精。邵堯夫亦云。性者道之形體。心者性之郭郭。身者心之區宇。物者身之舟車。語極有理。大雅云。橫渠言心禦見聞。不弘於性。則又是心小性大也。曰禦字不可作止字。與當字解禦有格之意。云心格于見聞。反不弘於性耳。○問盡心只是知得盡。未說及行。否。曰某初間亦把做只是知得盡。如大學知至一般。未說及行。後來仔細看。如大學誠意字模樣。是真個恁地盡。如惡惡臭。如好好色。知至亦須兼誠意乃盡。如知得七分自家去做。只着得五分心力。便是未盡。有時放緩。又不做了。如知得十分真切。自家須着過二十分心力。實去恁地做。便是盡。盡其心者知其性。



也。知性所以盡心。按語類論盡心有三。先主知說。中兼行說。後又諸條兼行說者。盡。主知說。專主知說。爲是大註。或問皆然。故上下刪之。姑存其一。○盡心盡性之盡。不是做工夫之謂。蓋言上面功夫。已至至此方盡得耳。中庸言惟天下至誠爲能盡其性。孟子言盡其心者。知其性是也。此只論盡字分量一般耳。究竟盡性兼之辨。知行說。盡心專主知邊說。觀下節語類甚清。○盡心就見處說。見理無所不盡。如格物致知之意。然心無限量。如何盡得。物有多少。亦如何窮盡得。但到那貫通處。則纔拈來。便曉得是爲盡也。存心却是就持守處說。○說盡心云。這事理會得。那事又理會不得。理會得東邊。又不理會得西邊。只是從來不會盡這心。但臨事恁地胡亂挨將去。此心本來無有些子不備。無有些子不該。須是盡識得許多道理。無些子窒礙。方是盡心。如今人人有個心。只是不會使得他盡。只恁地苟簡鹵莽。便道是了。

○問季通說盡心。謂聖人此心纔見得盡。則所行無有不盡。故程子曰。聖人無事於力行。曰。固是聖人有這般所在。然所以爲聖人。也只說好問。默而識之。好古敏以求之。那會說知了便了。又曰。盡心如明鏡。無些子蔽翳。只看鏡子。若有些少照不見處。便是本身有些塵污。如今人做事。有些子鶻突窒礙處。只是自家見不盡。此心本來虛靈萬理。具備事物。皆所當知。人人多氣質偏了。又爲物欲所蔽。故昏而不能盡心。聖賢所以貴於窮理。又曰。萬理雖具於吾心。還使教他知始得。今人有個心在這裏。只是不會使他去知許多道理。少間遇事做得一邊。又不知那一邊。見得東。遺却西。少間只成私意。皆不能盡道理。盡得此心者。洞然光明。事事物物。無有不合道理。又曰。學問之所以傳不傳者。亦是能盡心與不




能盡心。問若曾子易簣之事。此時若不能正也。只是不盡得心。曰。然。曾子既見得道理。自然便改了。若不便改了。這心下便闕了些。當時季孫之賜。曾子如何失檢點去。上墮是不是了。童子既說起。須着改始得。若不說不及改也不妨。才說便着改。此有有心。無心之別。○黃敬之問。知其性則知天矣。曰。性以賦於我之分而言。天以公共道理而言。天便脫模。是一個大底。人人便是一個小底。天吾之仁義禮智。即天之元亨利貞。凡吾之所有者。皆自彼而來也。故知吾性。則自然知天矣。○問四十而不惑。五十而知天命。不惑謂知事物。當然之理。知天命謂知事物之所以然。便是知天。知性之說否。曰。然。他那裏白看得個血脉牽連。要自仔細看。按不惑知命。固有次第。閱十年而一進。此云知性則知天。玩則字無層次。亦當有辨。龜山之說極好。龜山問學者曰。人何故有惻

隱之心。學者曰。出於自然。龜山曰。安得自然如此。若體究此理。知其所從來。則仁之道不遠矣。便是此說。

**文集**

徐居甫說陳先生問盡其心者。作如何說。對言心統性情。會眾理而妙萬物者也。心最難盡。惟是知得性。方能盡得心。

能盡其心者。以知其性故也。蓋性者。理之得於天而自然者也。如君之仁。父之慈。子之孝。以至于日用之所當為者。皆有。心固根原來歷處。惟知之無一毫之。不盡。無一節之。不熟。然後。吾心之體。至通至明。無所蔽惑。斯為盡其心矣。曰。此段論得甚好。又曰。言人能盡其心。則是知其性能知其性。則知天也。蓋天者。理之自然。而人之所由以生者也。性者。理之全體。而人之所得以生者也。心則人之所以主乎身。而具是理者也。天大無外。而性稟其全。故人之本心。其體廓然。亦無限量。惟其梏於形氣之私。滯于聞見之小。是以有所蔽而不盡。人能即事即物。窮究其理。至于一日會貫通徹。而無所遺焉。則有以全其廓然之體。而吾之所以為





性與天之所以為天者皆不外乎此。而一以貫之矣。鄭子上問曰。盡心知性云云。可學每讀先生書解於文義之間。最不草草。如君子深造之以道。夜氣不足以存。他人便不認之。以足以兩字。先生拈出。而一段之意皆全。故可學因此每觀書於文義之間。一字不敢放過。故古人文字。高下曲折之間。皆其意所寓。故於此一段。雖先生之說。指意明白。而竊有疑焉。伏乞批示。曰。論其理則心為粗。而性天為妙。論其功夫則盡為重。而知為輕。故云盡其心者。即是知性。而知天者也。三者只是一時事。但以表裏虛實。反覆相明。三者初無分別。故又曰存其心。養其性。所以事天。亦言其本一物耳。所謂深造夜氣。看得甚仔細。此書近為建陽人販賣甚廣。不知有幾人看得此意出來。亦可歎耳。

據此看書不徒看實字。更要看虛字。實字義理所存。虛字精神所聚。即如此章者字也。字則字矣。字所以字。俱要細細咀嚼。

**大全**慶源輔氏曰。知性而盡心者。譬如家主盡識一家所有之物。然後隨取隨有。隨用隨足。方盡得家主之職。知性而知天。如家主既識得家中之物。則自然知此物是從何而來也。○勿齋陳氏曰。至誠無息。至明無蔽。表裏精粗。毫髮不遺。是曰盡性。體無不

統用無不周。充極其量。毫髮無疑。是曰盡心。

**存其心養其性所以事天也**

存謂操而不舍。養謂順而不害。事則奉承而不違也。

**語類**盡心知性知天。此是致知。存心養性事天。此是力行。○問盡

知存養四字如何分別。曰。盡知是知底工夫。存養是守底工夫。○

問盡心盡性。曰。盡心云者。知之至也。盡性云者。行之極也。盡心則

知性知天。以其知之已至也。若存心養性。則是致其盡性之功也。

○孟子說知性。是知得性中物事。既知得。須盡知得。方始是盡心。

下面存其心養其性。方始是做工夫處。如大學說物格而後知至。

物格者物理之極處。無不到。知性也。知至者吾心之所知。無不盡。

盡心也。至於知至而後意誠。誠則存其心養其性也。聖人說知必



說行不可勝數。此上數條分層次甚清。方是定說與大註合。○蜚卿問盡心存心盡莫

是極至地位存莫是初存得這心否曰盡心也非說極至只是凡

事便須理會教十分周足無少缺漏處方是盡存也非獨是初工

夫初間固是操守存在這裏到存得熟後也只是存這存字無終

始只存這裏○孟子說存其心雖是緊切却似添事蓋聖人只為

學者立下規矩守得規矩定便心也自定如言居處恭執事敬與

人忠人能如是存守則心有不存者乎今又說存其心則與此為

四矣如此處要人理會。存是籠統總說如居處恭等是逐項分說總是存心之功。仲思問存心

養性先後曰先存心而後養性養性云者養而勿失之謂性不可

言存○問存心養性以事天曰天教你父子有親你便用父子有

親天教你君臣有義你便用君臣有義不然便是違天矣古人語

言下得字都不苟如存其心養其性若作養其心存其性便不得

**大全**朱子曰先存心而後養性存得父子之心盡方養得仁之性

存得君臣之心盡方養得義之性存之養之即是事心性便是天

故曰所以事天也○心性皆天之所以與我者不能存養而格亡

之則非所以事天也夫心具性敬以存之則性得其養而無所害

矣此君子之所以奉順乎天蓋能盡其心而終之之事顏冉所以

請事斯語之意故敬者學之終始所謂徹上徹下之道也。慶源輔

氏曰心是活物須是操則存不然便放去矣性是實理須當順之而不害

害謂違悖而戕傷之性本不可以戕傷言但為自家違悖了便是

戕傷之也奉承之而不違便只是存心養性事○問盡心知性存

心養性上是知工夫下是行工夫然上一節知性在先盡心在後

下一節存心在先養性在後何也潛室陳氏曰知性即窮理格物

之學是工夫最先者盡心即大學知至境界存心即誠意正心之

謂養性在其中矣非存心外別有所謂養性工夫故養性在存心



工夫但養是涵養存是操存有着力不着力之分耳。○新安陳氏曰人能存心養性然後能事事合理順事乎天而無愧於天之所賦予我者。此西銘所以曰存心養性爲匪懈。又曰存吾順事存心養性卽所以順事之本也。

### 妖壽不貳修身以俟之所以立命也

妖壽命之短長也。新安陳氏曰命之短長此命字以氣言立命此命字兼理與氣言。貳疑也不貳

者知天之至修身以俟死則事天以終身也立命謂全其天之所

賦不以人爲害之。朱氏公遷曰知命以知言俟命以行言立命兼

貳卽是知命修身俟之卽是俟命合知命俟命則是立命知命俟

命則命在天立命則命在我○慶源輔氏曰徇私以賊理縱欲以

傷生皆所謂以○程子曰心也性也天也一理也自理而言謂之

天自稟受而言謂之性自存諸人而言謂之心張子曰由太虛有

天之名由氣化有道之名合虛與氣有性之名合性與知覺有心

之名。語類問由太虛云云曰本只是一個太虛漸漸細分說得密

耳且太虛便是這四者之總體而不離乎四者而言由氣化

有道之名氣化是那陰陽造化寒暑晝夜雨露霜雪山川木石金

水火土皆是只這個便是那太虛只是便雜着氣化說雖雜氣化

而實不離乎太虛未說到人物各具當然之理處問太虛便是太

極圖上面底圓圈氣化便是圓圈裏陰陽動靜否曰然又曰合虛

與氣有性之名有這氣道理便隨在裏面無此氣則道理無安頓

處如水月中月須是有此水方映得那天上月若無此水終無此月

也心之知覺又是那氣之虛靈底聰明視聽作爲運動皆是有這

知覺方運動得這道理所以橫渠說人能弘道是心能盡性非道

弘人是性不知檢心又問人與鳥獸固有知覺但知覺有通塞草

木亦有知覺否曰亦有一盆花得些水澆灌便敷榮若摧抑他

便枯悴謂之無知覺可乎周茂叔牕前草不除去云與自家意思

一般便是有知覺只是鳥獸底知覺不如人底草木底知覺又不

如鳥獸底又如大黃吃着便會瀉附子吃着便會熱只是他知覺

只從這一路去又問腐敗之物亦有否曰亦有如火燒成灰將來

泡湯吃也熾苦因笑曰頃信州諸公正說草木無性今夜又說草

木無心矣○先生問合虛與氣有性之名如何看廣云虛只是理

有是理斯有是氣曰如何說合字廣云恐是據人物而言曰有是

物則有是理與氣故有性之名若無是物則不見理之所寓由太

虛有天之名只是據理而言由氣化有道之名由氣之化各有生

長消息底道理故有道之名既已成物則物各有理故曰合虛與

氣有性之名○由太虛有天之名都是個自然底由氣化有道之

名是虛底物在是上見無形底物因有形而見所謂道者如天道

盡心上九



地道人道。父子之道。君臣之道。率性之謂道。是也。合虛與氣。有性之名。是自然中。包得許多物事。○由太虛有天之名。這全說理。由氣化有道之名。這說着事物上。如率性之謂道。性只是理。率性方見得是道。這說着事物上。且如君臣父子之道。有那君臣父子。方見這個道理。合虛與氣。有性之名。虛字便說理。理與氣合。所以有人。○吳氏程曰。天以理言。虛則不雜于氣之名也。二氣迭運。交錯變化。見天理之流行。氣根于理。而理隨于氣。此即氣以成形。而理亦賦焉者也。性統乎理。而知覺則雜乎氣。此即人之神明。所以具衆理而應萬事者也。愚謂盡心知性而知天。所以造其理也。存心養性以事天。所以履其事也。不知其理。固不能履其事。然徒造其理而不履其事。則亦無以有諸已矣。知天而不以歿壽貳其心。智之盡也。事天而能修身以俟。死仁之至也。智有不盡。固不知所以為仁。然智而不仁。則亦將流蕩不法。而不足以為智矣。雲峯胡氏曰。欲造其理者。用工全在知性。其事者。用功全在存心上。存心有工夫。養性無大工夫。存者操之而不舍。養不過順之而不害耳。集註分理與事言。又分智與仁言。何也。蓋能知其理。已自是智。然必不以歿壽貳其心。方見其為智也。

之盡。能履其事。已自是仁。然必修身以俟。死。方見其為仁之至。流蕩不法四字。讀者多以為指異端之學言。愚見流蕩與存養字相反。不法與修身相反。能存養則不至於流蕩矣。能修身則所為無不法者矣。流蕩不法。則是不能全其天之所予。而以人為害之者也。

**語類** 歿壽不貳。不以生死為吾心之悅戚也。○問立命是豎立得。

這天之所命。不以私意叅雜。倒了天之正命。否曰然。○敬之問歿壽至命也。曰既不以歿壽貳其心。又須修身以俟。方始立得這命。自家有百年在世。百年之中。須事事教是當。自家有一日在世。一日之內。也須教事事是當。始得。此正所謂一息尚存。此志不容少懈者也。若既不以歿壽動其心。一向胡亂做。又不可如佛氏以絕滅為事。亦可謂之歿壽不貳。然修身以俟一段。全不曾理會。所以做底事。皆無頭腦。無君無父。亂人之大倫。又曰歿壽不貳。便是知性知天之力。修身以



侯便是存心養性之功。立命便用通下章看。

**大全** 朱子曰盡心者私智不萌。萬理洞貫。歛之而無所不具。擴之而無所不通之謂也。學至於此。則知性之為德。無所不該。而天之為天者不外是矣。存者存此而已。養者養此而已。生死不異其心。而修身以俟其正。則不拘乎氣稟之偏。而天之正命自我立矣。節  
蔡氏曰孟子此章與大學中庸相表裏。窮其理以知天。即中庸所謂智也。履其事以事天。即中庸所謂仁也。天壽不貳。修身以俟。死所以立命而不渝。即中庸所謂勇也。與大學合前屢言矣。

○孟子曰莫非命也順受其正

人物之生吉凶禍福皆天所命。然惟莫之致而至者。乃為正命。故君子修身以俟之。所以順受乎此也。此字指正命。

**或問** 二章之說曰程子至矣。

精義程子曰命皆一也。莫之致而至者正命也。桎梏而死者君子不謂之。

命。其曰桎梏死者莫非命。然聖人却不說是命。此最是得其文義。

或問桎梏而死者非正命也。然亦是命否。曰聖人只教人順受其正。不說命。或曰桎梏死者非命乎。曰孟子自說了莫非命也。然聖人却不說是命。若張子曰命之於人無不正。則非文義巖牆一段則善。

而其他大旨教人毋為不直之求。徒以自陷於不正者。警戒尤切。

學者所當深念也。張子曰莫非命也。順受其正。順性命之理。則得性命之理。則吉凶莫非止也。滅理窮欲。人為之招也。○又曰順性命之理。則凶為自取其僥倖也。

**語類** 敬之問莫非命也。曰在天言之皆是正命。在人言之便是不

正之命。問有當然而或不然。不當然而或然者。如何。曰如孔孟老死不遇。須喚作不正之命始得。在孔孟言之亦是正命。然在天之命却自有差。○問莫非命也。命是指氣言之否。曰然。若在我無以致之。則命之壽夭皆是合當如此者。如顏子之夭。伯牛之疾是也。



孟子通分九卷十三  
○問莫非命也。順受其正。因推惠迪吉。從逆凶之意。曰若是惠迪吉。從逆凶。自天觀之。也得其正命。自人得之。也得其正命。若惠迪而不吉。則自天觀之。却是失其正命。如孔孟之聖賢。而不見用於世。而聖賢亦莫不順受其正。這是於聖賢分上。已得其正命。若就天觀之。彼以順感。而此以逆應。則是天自失其正命。○莫非命也。順受其正。直卿云。如受得一邑之宰。教做三年。這是命。到做得一年。被罷去。也是命。曰有不以罪而枉罷者。亦是命。有罪而被罷者。非正命。無罪而被罷者。是正命也。孟子說命至盡。心章方說得盡。○問莫非命也。此一句是總說氣稟之命。與天命謂性之命同否。曰孟子之意。未說到氣稟。孟子自來不甚說氣稟。看是此句只是說人物之生。吉凶禍福。皆天所命。人但順受其正。若桎梏而死。與

立乎巖牆之下而死。便是你自取。不干天事。未說到氣稟在。

**大全**

雲峯胡氏曰。莫非命也。凡有生者之所。同順受其正。能修身者之所。獨。○新安陳氏曰。此命字。氣也。順受其正。理也。立巖牆下。非理也。盡道而死。理也。桎梏死。非理也。君子必以理御氣。

是故知命者不立乎巖牆之下

命。謂正命。巖牆。牆之將覆者。知正命。則不處危地。以取覆壓之禍。

雲峯胡氏曰。集註於此。命字必曰正命者。蓋上文有莫非命也一句。故死於岩牆之下。亦命也。但非正命。爾。惟知正命者。則不立乎岩牆之下。○新安陳氏曰。岩牆下。理不當立。立而壓死。人所自取。非正命也。

**語類**問莫非命也。順受其正。若是人力所致者。如何是命。曰前面

事都見不得。若出問吉凶禍福。皆不可知。但有正不正。自家只順受他正底。自家身分無過。恁地死了。便是正命。若立岩牆之下。與桎梏而死。便不是正命。或如比干剖心。又不可不謂之正命。子善



孟子通考卷十三  
問孟子謂知命者不立乎巖牆之下今人却道我命若未死縱立  
岩牆之下也不到壓死曰莫非命者是活絡在這裏看他如何來  
若先說道我自有命雖立岩牆之下也不妨卽是先指定一個命  
便是紂說我生不有命在天

**大全**慶源輔氏曰立乎岩牆之下以致覆壓而死則乃是人所自  
取耳非天爲之也蓋岩牆有傾覆之勢自家却去下面立便  
是自取其覆壓也是以君子戰  
戰兢兢如履薄冰非禮勿動

### 盡其道而死者正命也

盡其道則所值之吉凶皆莫之致而至者矣新安陳氏曰盡其道  
卽上章所謂修身是  
也

**大全**問人或死於干戈死於患難如比干之類亦是正命乎朱子  
曰固是正命又問以理論之則謂之正命以生死論之則非正命

如何曰如何恁地說得盡其道而死者正命也當死而不死却是  
失其正命此處須當活看公冶長雖在縲紲之中非其罪也若當  
時死於縲紲不成說他不是正命有罪無罪在我而已古人所以  
殺身成仁舍生取義學者須是於此處見得臨利害時便將自家  
斫倒了直須是壁立萬仞始得如今小有利害便生計較便說道  
恁地死非正命如何得

### 桎梏死者非正命也

桎梏所以拘罪人者桎是械也  
梏手械也言犯罪而死謂不盡其道而有罪  
爲犯罪若在縲紲非  
其罪者不  
謂之犯罪與立岩牆之下者同皆人所取非天所爲也○此章與  
上章蓋一時之言所以發其末句未盡之意潛室陳氏曰凡死雖  
均是命但盡道而無  
憾者爲正比于雖殺身正也盜跖雖永年非正也知謂知此道理  
立謂盡此道理不惑於死生壽夭壹是天理所定是謂知命既知



得了。不成一向委付於命。須是盡了自家身分。上道理無少虧欠。方是立命。恁時死才無憾。是謂正命。○雲峯胡氏曰。上章末句言立命是全其天之所付。而不以人為害之者也。此所謂桎梏死及死于岩牆之下。是不知正命。未免流蕩不法。而以人為害之矣。立命是已造聖賢之域。知命是聖賢之階。立。在知。後知在立先。○程氏復心曰。上章止言壽夭。故集註又推言及吉凶禍福。皆天所命。然惟人為莫與。而天所自致者。則為正命。故上章所謂君子修身以俟之者。正所謂順受乎此也。

**語類** 其道而死者。順理而吉者也。桎梏死者。逆理而凶者也。以非義而死者。固所自取。是亦前定。蓋其所稟之惡氣。有以致之也。

○問桎梏死者。非正命也。雖謂非正。然亦以命言。此乃自取。如何謂之命。曰。亦是自作。而天殺之。但非正命耳。使文王死於羨里。孔子死於桓魋。却是命。

**大全** 新安陳氏曰。天之命于人。吉凶禍福。死生壽夭。雖萬變而不齊。人之事乎天。必盡其道。有正無邪。則一定而不易。能盡其道。而值其吉且福。且壽者。固正命也。此似有以致之。然我惟知自盡其道耳。初非有所覬覦於大而為之也。盡道而吉。福壽自至焉。

非天命之正。而何苟盡其道。不幸而值凶禍。天是我於道理本無虧。不過自值於凶禍。天正非我有以致之。而然是亦命之正也。必不盡其道。自取禍敗喪亡。則自有以致之。始不得為正命耳。

○孟子曰。求則得之。舍則失之。是求有益於得也。求在我者也。在我者。謂仁義禮智。凡性之所有者。

求之有道。得之有命。是求無益於得也。求在外者也。

有道。言不可妄求。有命。此命字。以氣言。則不可必得。在外者。謂富貴利達。凡外物皆是。○趙氏曰。言為仁由己。富貴在天。如不可求。從吾所好。

**或問** 三章之說。程子以求在我者為義。求在外者為命。以求在我者為求義乎。則下言求在我者。非求命也。謂以義而求乎。則求在外者。不可言以命而求也。又有聖人有義而無命。與下數節之說。則



義命之云似專為求在外者設此乃分析內外言之何也精義程子曰君子

子有義有命求則得之舍則失之是求有益於得也求在我者也此言義也求之有道得之有命是求無益於得也求在外者也此言命也至於聖人則惟有義而無命行一不義殺一不辜而得天下不為也此言義而不言命也○又曰求之有道得之有命是求無益於得言求得不濟事此言猶只為中人言之若為中人以上而言却只道求之有道非道則不求更不消言命也○又曰賢者惟知義而已命在其中中人以下乃以命處義如言求之有道得之有命是求無益於得知命之不可求故自處以不求若賢者則求之以道得之以義不必言命○問家貧親老應舉求仕不免有得失之累何修可以免此曰此只是志不勝氣若志勝自無此累家貧親老須用祿仕然得之不得為有命曰在已固可為親奈何曰為已為親也只是事若不得其如命何孔子曰不知命無以為君子也人苟不知命見患難必避遇得喪必動見利必趨其何以為君子然聖人言命蓋為中人以下而設非為上智者言也中人以下於得喪之際不能不惑故有命之說然後能安若上智之人更不言命惟安於義借使求則得之然非義則不求此樂天者之事也上智之人安於義中人以下安于命乃若聞命而不能安之者又其每下者也孟子曰求之有道得之有命求之雖有道奈何得之曰在我者如仁義禮智之屬皆此理所當為以其求之得須有命

之莫不有義故曰義在外者如富貴利達之類皆命有所制以其求之雖有道而得之則有命故曰命然聖人則力為我之所當為而不問彼之所制故曰有義而無命此以所求之內外而言也若專為在外者言則後段所謂求之有道者義也得之有命者命也是其言各有當意各有指然錯綜而言則理亦無所不通也曰最後一說問富貴貧賤壽夭固有定分君子先盡其在我者則富貴然富貴而壽是為僥倖不可謂之命曰雖不可謂之命然富貴貧賤壽夭是亦前定孟子曰求則得之舍則失之是求有益於得也求在我者也求之有道得之有命是求無益於得也求在外者也故君子以義安命小人以命安義又以在我未盡雖不可以言命然富貴貧賤壽夭是亦前定然則人之所取亦前定耶曰若是者其貧賤而夭固或有非人所取而得之於天者然無以驗其必然則君子固不謂命若其富貴則君子處之固有得



天下而不爲者矣。亦安得遽謂之命而安之乎。此程子言義不言命之說。所以有功於學者。其亦前聖所未發之一端也。此只辨精義與本旨有別。不必過爲牽合。善會之可也。

**大全**朱子曰。富貴身外之物。求之惟恐不得。縱使得之。於身心無分毫之益。况不可必得乎。若義理求則得之。能不喪其所有。可以爲聖爲賢。利害甚明。南軒張氏曰。言求在我者。有益於得。所以擴也。富貴利達。衆人謂已有求之之具。然不知其有命焉。固有求而得之者矣。是亦有命。而非求之能有益也。蓋亦有巧求而不得者多矣。以此可見其無益於得也。新安陳氏曰。此章言仁義禮知根於性。乃所當求。富貴利達制於命。不可必求也。

○孟子曰萬物皆備於我矣

此言理之本然也。大則君臣父子。小則事物細微。其當然之理。無一不具於性分之內也。

或問四章之說曰萬物皆備之說程子至矣

精義程子曰萬物皆備於我。不獨人爾。物

皆然。都自這裏出去。只是物不能推。人則能推之。雖能推之。幾會添得一分。不能推之。幾會減得一分。百理具在。平鋪放着。幾時道堯盡君。添得些君道多。舜盡子道。添得些子道多。元來只依舊。反身而誠。樂莫大焉。却是着人上說。○又曰萬物皆備於我。此通人而論。禽獸與人絕相似。只是不能推。然禽獸之性。却自然不待學。不待教。如鶩巢養子之類是也。人雖是靈。却極多。極多。只有一個嬰兒。飲乳是自然非學也。其他皆誘之也。欲得人家嬰兒善。且自小不要引他。留他真性。待他自然。亦須完得些本性。須別也。雖說通人物而蓋萬物之生。同乎一本。其所以生此一物者。卽其所以生萬物之理也。故一物之中。莫不有萬物之理焉。所謂萬物皆備云者。亦曰有其理而已矣。語類問伊川說萬物皆備於我。謂物亦然。皆從這裏出去。如何曰。未須問此。枉用工夫。且于事上逐件窮看。凡接物遇事。見得一個是處。積習久。自然貫通。便真個見得理。禪者云。如桶底脫相似。可謂大悟。到底不曾曉得。才遇事。又却迷去。此論用工入手法。皆非本節書旨。○程氏復心曰。萬物之生。同乎一本。其所以生此一物者。卽其所以生萬物之理也。故一物之中。莫不有萬物之理也。所謂萬物皆備者。亦曰有其理而已矣。



**語類**問萬物皆備於我。曰未當如此。且從孟子見梁惠王看起。却漸漸進步。如看論語。豈可只理會吾道一以貫之一句。須先自學而篇漸漸浸灌到純熟處。其間義理却自然出。此論讀書法。

**反身而誠樂莫大焉**


誠實也。言反諸身而所備之理。如惡惡臭好好色之實然。則其行之不待勉強而無不利矣。其為樂孰大於是。雲峯胡氏曰此一反字只是自檢點。過不是湯武反之之反。○新安陳氏曰樂莫大焉。必以無不慊。仰不愧俯不忤。形容。方見樂之味。集註雖不用此語。然曰如惡惡臭好好色之實然。則是以大學誠意章自慊之意言之。而此意已在其中矣。誠與仁一理耳。實有此理。則曰誠。純乎此理而無私。則曰仁。未有不誠者也。此合下節并論之。

**或問**反身而誠。則張子無不慊於心。張子曰萬物皆備於我。言萬物皆素有於我也。反身而誠。謂行無不慊於心。則樂莫大焉。作德日休。實到實有之說。為實若不責之處。心行

事之實。而但欲反心以求眾理。而想象安排。使其備於此焉。則將何所據以為實。而其為心亦已勞矣。尚何樂之可言哉。此亦有儒

語類朱子曰萬物皆備於我。橫渠一段。將來說得甚實。所謂萬物皆在我者。便只是君臣本來有義。父子本來有親。夫婦本來有別之類。皆是本來在我者。若事君有不足於敬。事親有不足於孝。以至夫婦無別。兄弟不友。朋友不信。便是我不能盡之。反身則是不誠。其苦有不可言者。安得所謂樂。反照看愈見。

**語類**萬物皆備於我。須反身而實有之。無虧無欠。方能快活。若反身而不誠。雖是本來自足之物。然物自物。何干我事。○反身而誠。孟子之意。主於誠字。言反身而實有此理也。為父而實有慈。為子而實有孝。豈不快活。若反身不誠。是無此理。既無此理。但有恐懼而已。豈得樂哉。○反身而誠。見得本具是理。而今亦不曾虧欠了。他些。○或問反身而誠。是要就身上知得許多道理否。曰是這知





見得最為要緊。說知尚在○萬物皆備於我矣。反身而誠樂莫大

焉。萬物不是萬物之迹。只是萬物之理。皆備於我。如萬物莫不有君臣之義。自家這裏也有。萬物莫不有父子之親。自家這裏也有。萬物莫不有兄弟之愛。自家這裏也有。萬物莫不有夫婦之別。自家這裏也有。是這道理。本來皆備於吾身。反之於吾身。於君臣必盡其義。於父子必盡其親。於兄弟必盡其愛。於夫婦必盡其別。莫不各盡其當然之實理。而無一毫之不盡。則仰不愧。俯不忤。自然是快活。若是反之於身。有些子未盡。有些子不實。則中心愧忤。不能以自安。如何得會樂。○問樂莫大焉。莫是見得萬物皆備於我。所以樂否。曰誠是實有此理。檢點自家身上。果無欠闕。事君真個忠事父真個孝。仰不愧於天。俯不忤於人。其樂孰大於此。橫渠謂

反身而誠。則無不慊於心。此說極有理。

**大全**朱子曰此乃躬行之至。無一理不實有於吾身。非為一時見

處發也。如仁義忠孝。應接事物之理。皆真有之。而非出於勉強偽為也。此事見得透。信得及。處到此地位。則推已及物。不待勉強而仁在我矣。可見誠仁一理下言強恕而行者。蓋言未至於此。則當強恕以去己私之蔽。而求得夫天理之公也。潛室陳氏曰反諸身者。既是行。何處不順。裕若於實理。無得即觸。萬理皆實。即渾身是義理。流處滯礙。無往而非逆。境何樂之有。

強恕而行求仁莫近焉

強。勉彊也。恕。推已以及人也。朱子曰強是勉強而行。恕是推已及物。強恕而行。是要求至於誠。反身而誠。則仁矣。其有未誠。則是猶有私意之隔。而理未純也。又曰人所以害事處。只是這些私意難除。故當凡事勉強推已及人。庶才有些私意隔着了。便只見許多般。



幾心公理得而仁不遠也。程氏復心曰此言學者之事也其階級分明工夫有序由是而進聖人之道庶乎其可至也。○此章言萬物之理具於吾身體之而實則道在我而樂有餘。聖賢行之以怒則私不容而仁可得。學者之事。

**或問**強恕而行則亦程子之說得之。程子曰恕者入仁之門又曰強恕求仁莫近言得不濟事。

亦須是實見得近處其理蓋不出乎公平固在用意淺深只要自家各自體認得又曰有忠矣而行之以恕則以無我為體以恕為用所謂強恕而行者知以己之所好惡處人而已未至於無我也故已欲立而立人已欲達而達人所以為仁之方也但以

立人達人為仁之方則吾於論語既言之矣有從容勉尹氏雖約然極有味尹曰萬物皆備天理也反身而誠謂行無不謙於心也強恕而行誠之者也曰強恕初不言

忠無忠何以為恕耶曰有心為恕則忠固在其中矣所謂無忠做恕不出兩字不容去一者正謂此也朱子又曰若自己心裏元自

人以此見凡說恕字必有忠字在源頭了今人皆不忠之恕惟務苟且於一時不復有已可推亦無復近仁矣說破世人之病甚確

**語類**反身而誠則恕從這裏流出不用勉強未到恁田地須是勉

強○所謂萬物皆備於我在學者也知得此理是備於我只是未能反身而誠若勉強行恕拗轉這道理來便是恕所謂恕者也只是去得私意盡了這道理便真實備於我無欠闕○或問萬物皆備於我章後面說強恕而行求仁莫近焉如何曰恕便是推己及物然這個強恕者亦是他見得萬物皆備於我了只爭着一個反身而誠便須要強恕上做工夫所謂強恕蓋是他心裏不能推己及人便須勉強行恕拗轉這道理然亦只是要去個私意而已私意既去則萬理自無欠闕處矣○又曰這章是兩截工夫反身而誠蓋知之已至而自然循理所以樂強恕而行是知之未至且恁把捉勉強去少間到純熟處便是仁○問萬物皆備於我下文既



云樂莫大焉。何故復云強恕。曰四句二段。皆是蒙上面一句問反身而誠樂莫大焉。是大賢以上事。強恕求仁。是學者身分上事。否曰然。問大賢以上。是知與行俱到。大賢以下。是知與行相資發否。曰然。頃之復曰反身而誠。只是個真知。真實知得。則滔滔行將去。見得萬物與我為一。自然其樂無涯。所以伊川云異日見卓爾有立於前。然後不知手之舞之足之蹈之。正此意也。○敬之說。強恕。只事事要擴充。教是當。雖是自家元未免有些病痛。今且着事事勉強做去。曰未至於反身而誠樂莫大焉處。且逐事要推已及人。庶幾心公理得。此處好更仔細看。○問強恕而行。曰此是其人元不曾恕在。故當凡事勉強推已及人。若反身而誠。則無待於勉強矣。又問莫須卓然立志方得。曰也不須如此。饑時便討飯吃。初頭

硬要一餉。少時却只恁消殺了。到沒意思。可見要日積月累。循序漸進。徹始徹終。由勉而安始。○強恕而行求仁莫近。不可將恕字低看了。求仁莫近於恕。恕字甚緊。

○孟子曰行之而不著焉。習矣而不察焉。終身由之而不知其道者衆也。

著者知之明。察者識之精。慶源輔氏曰著則明之而已。察則又加精焉。言方行之而不

能明其所當然。是就事上說。既習矣。習謂行之積習既久。而猶不識其所以然。是

理上說。所以終身由之而不知其道者多也。朱子曰著曉也。察識也。方其行之而不曉其所

當然既習矣而猶不識其所以然。

**語類**方行之際則明其當然之理。是行之而著。既行之後則識其

所以然。是習矣而察。初間是照管向前去。後來是回顧後面。看所



行之道理何如。如人吃飯。方喫時知得飯當吃。既吃後則知飯之飽如此。○習矣不察。行矣不著。如今人又不如此。不會去習。便要說察。不會去行。便要說著。可與其學。未可與適道。今人未曾理會。可與其學。便要適道。此翻重行習一邊。是對照時人弊病說。非書旨也。

**大全**慶源輔氏曰。凡事皆有所當然。必有理之所以然。人能於方行之時。明其事之所當然。既習之後。又識其理之所以然。則能知夫道矣。○新安陳氏曰。天下事物有當然之則。必有所以然之故。行而不明當然之則。習而不察所以然之故。此為凡人言也。易曰。百姓日用而不知。終身由之而不知其道。於凡人無責也。學者則不當然矣。孟子斯言。其亦憫凡人。而不無望於學者歟。○勿軒熊氏曰。此與上章通言。有此三等。人反身而誠。上也。強恕而行次也。此承上章而言。下等人也。


○孟子曰。人不可以無恥。無恥之恥。無恥矣。  
趙氏曰。人能恥已之無所恥。是能改行從善之人。終身無復有恥辱之累矣。

**或問**六章七章之說。曰舊說皆善矣。精義尹曰。人知其所恥。然後能改過遷善。此論六章。○又

曰。為機變之巧。以自欺者。然六章李氏以為人而無恥。則其為恥。何若人之有。此論七章。無復可恥矣。七章亦猶謂人若不恥其不及人。則終不能及人者。於義亦通。學者擇焉可也。

**大全**南軒張氏曰。恥者羞惡之心所推也。恥吾之未能進於善。則善可遷。恥吾之未能遠於過。則過可消。苟惟漠然無所恥。則為無所忌憚而已矣。故人當以無所恥為恥也。○慶源輔氏曰。恥者遷善改過之機也。人能以已之無恥為恥。則思去其恥而恥可無。否則安於其恥。而恥終不可免。

○孟子曰。恥之於人大矣。  
恥者。吾所固有。羞惡之心也。存之則進於聖賢。失之則入於禽獸。故所係為甚大。慶源輔氏曰。存之則有所不為。故可進於聖賢。失之則無所不為。故至入於禽獸。讀之使人凜凜。百





孟子通考卷之三十三  
為機變之巧者無所用恥焉

為機械變詐之巧者所為之事皆人所深恥而彼方且自以為得計故無所用其愧恥之心也

**文集**答何叔京書曰機變之巧所論甚當更欲增數語云乘時逐便以快其欲人所甚羞而已方且自以為得計蓋惟知有利而已何所復用其愧恥之心哉如此乃盡其情何如

**大全**慶源輔氏曰陷溺其心於機械變詐之巧則是無所不為者也故人雖以為深恥而已方且自以為得計其愧恥之心雖其固有亦自窒塞而不復發見矣○雲峯胡氏曰為機變之巧此巧字便與恥字相反恥則守正而有所不為巧則行險而無所不為雖其本心未嘗無恥而彼方自矜其為之之巧則無所用其恥矣周夫子拙賦正是深貶此一巧字

不恥不若人何若人有  
但無恥一事不如人則事事不如人矣或曰不恥其不如人則何

能有如人之事其義亦通新安陳氏曰前說以不恥為無恥不如人則何能如人之有或問人有恥不能之心如何程子曰恥其不能而為之可也恥其不能而掩藏之不可也慶源輔氏曰程子是用後說恥不能而為

之則終必能是以貴夫恥也恥不能而掩藏之則終不能矣是不能擴充夫恥也

**大全**朱氏公遷曰此自其固有之心而言無恥之恥則無恥所以勸也不恥不若人則不若人所以戒也二章正相表裏

○孟子曰古之賢王好善而忘勢古之賢士何獨不然樂其道而忘人之勢故王公不致敬盡禮則不得亟見之見且猶不得亟而况得而臣之乎

言君當屈已以下賢士不枉道而求利二者勢若相反此勢字與字不而實則相成蓋亦各盡其道而已新安陳氏曰致敬內致敬致敬盡禮於賢是能好善而忘勢屈已以下賢也賢士必待君致敬盡禮而後應之是能樂道忘人之勢不枉道而求利也慶源



輔氏曰君好善則不知勢之在己。士樂道則不知勢之在人。兩盡其道則雖若相反而若相成不然。君挾其勢而驕夫士。士懾于勢而徇乎君。則兩失其道矣。尚何足與有為哉。○雲峯胡氏曰使為君者有以成賢士樂道之志而為士者肯出而成其君好善之美。則上下交而為泰矣。此集註所謂相成也。

**精義** 張子曰不資其力而利其有則能忘人之勢。若資仰其富貴而欲有所取則不能矣。○尹曰人君能下賢而好善賢者不慕勢而好利如是而相遇然後可以有為於時。

**大全** 南軒張氏曰在上者忘其勢而惟恐不得天下之善。在下者忘人之勢而惟義是從。此為俱得其道使二者一日而相合。則上下交而為泰矣。故王公不致敬盡禮於賢士。雖欲數見之且不得。况可得而臣之。蓋士非以此自高也。其道固當爾也。

○孟子謂宋句踐曰子好遊乎吾語子遊

宋姓句踐名遊遊說也

人知之亦囂囂人不知亦囂囂

趙氏曰囂囂自得無欲之貌。慶源輔氏曰遊說之士大病是不識義理而惟欲其言之售故往往以人

之知不知為欣戚是以孟子語以自得無欲之貌。○新安陳氏曰自得於己而無所欲於人非內重而外輕者不能也。丙重外輕意下節方見

曰何如斯可以囂囂矣曰尊德樂義則可以囂囂矣

德謂所得之善尊之則有以自重而不慕乎人爵之榮義謂所守之正樂之則有以自安而不徇乎外物之誘矣。慶源輔氏曰尊如

樂天知命之樂。○新安陳氏曰能如是則自得無欲之氣象自然著見而不可掩矣。自重自安一層即申自得意不慕不徇以下即申無欲意。總釋則可以囂囂一句尊德樂義是囂囂本領下三節又是尊德樂義實用。白文註理逐節逐層遞出有虛寔隱顯之別不容徑盡又不容分外添設也。

故士窮不失義達不離道

言不以貧賤而移不以富貴而淫此尊德樂義見於行事之實也

新安陳氏曰尊德樂義內存於心無迹可見必窮有定守而不失義所謂貧賤不能移達有實用而不離道所謂富貴不能淫此乃



尊德樂義著見於  
行事之實迹也。

窮不失義故士得已焉達不離道故民不失望焉

得已言不失已也。如云不  
失其身。民不失望言人素望其興道致治而今

果如所望也。慶源輔氏曰窮不失義則在我者得其所守。達  
不離道則能興道致治以慰斯民平日之所望。

古之人得志澤加於民不得志修身見於世窮則獨善其身達則兼

善天下

見謂名實之顯著也。新安陳氏曰內盡修身之實而名自著見於  
世。蓋實之不可掩者非君子願乎其外而欲

以是自見也。此又言士得已民不失望之實。新安陳氏曰得志兼善此  
民不失望之實不得志獨

善此士得已之實也。○此章言內重而外輕則無往而不善。雲峯胡氏曰內  
重是德義外輕

是窮達嚴內外輕重之分者既不失其本性之善故窮亦善。  
達亦善但達則能使民皆歸於善窮則此身自不失其善耳。

**或問**九章之說曰范尹之說皆善。精義尹曰古之人得志澤加於  
民不得志修身見於世此其所

以囂囂也如此則無怨尤不改樂。而范氏所謂孟子言道德必以義配者尤有功

**大全**南軒張氏曰句踐狗名而求外者孟子使求之吾身而已夫  
士達所不離之道即窮所不失之義也。道言體義言用。互相

明耳窮不失義則無慕於外故有以自得於已。一違於義則失已

矣。達不離道則凡其注措設施無非道之所在故有以副民望也。

得志澤加於民其道得行也。不得志脩身見於身惟義之安也。其  
曰得志不得志云者蓋澤加於民雖所性不存焉而道行固亦君  
子本志之  
所欲也。

○孟子曰待文王而後興者凡民也若夫豪傑之士雖無文王猶興

興者感動奮發之意凡庸常之人也豪傑有過人之才智者也

蓋降衷秉彝人所同得惟上智之資無物欲之蔽為能無待於教

而自能感發以有為也

**語類**豪傑質美生下來便見這道理何用費力今人至於沉迷而

不反而聖人為之屢言之方始肯求已是下愚了况又不知求之



則終於為禽獸而已。蓋人為萬物之靈。自是與物異。若述其靈而昏之。則是與禽獸何別。本旨只以凡民豪傑較量。朱子又降下一層。以禽獸較量。此又出凡民下者。本旨不及此。朱子特為有文。王而不興者。激厲耳。

**精義** 尹曰言君子之特立也。

**大全** 南軒張氏曰興者興起於善道也。文王風化之盛者。必待風化之盛。薰陶漸漬而後興起。此眾民耳。若夫豪傑之士。則卓然自立。無待於人。雖無文王。固自興起也。此章勉人使自立耳。○慶源輔氏曰文武興則民好善。此中人以下之資也。蓋無特立之操。教之善則為善。否則為惡矣。惟豪傑之士。無物欲之累。以蔽其秉彝之天。有過人之才。以致其為善之力。雖無聖人在上。以教率之。自能奮其特立之操。以有為也。孟子此言。蓋欲學者不以凡民自棄。而以豪傑自期耳。

○孟子曰附之以韓魏之家如其自視飲然則過人遠矣


附益也。韓魏晉卿富家也。史記韓世家云韓之先與周同姓。姬氏其後苗裔。事晉得封于韓。原曰韓武子。武子後三世有韓厥。從封姓為韓氏。後韓康子與趙襄子魏桓子共滅智伯。三分晉地。俱列為諸侯。○魏之先畢公高之後也。畢公

高與周同姓。武王之伐紂而高封於畢。於是為畢姓。其後絕封為庶人。或在中國。或在夷狄。其苗裔曰畢萬。事晉獻公。獻公之十六年。趙夙為御。畢萬為右。以伐霍耿魏滅之。以耿封趙夙。以魏封畢萬。為大夫。卜偃曰畢萬之後必大。晉獻公卒。四子爭更立。晉亂而畢萬之世彌大。從其國名為魏氏。飲然不自滿之意。尹氏曰言有過人之識。則不以富貴為事。

**大全** 南軒張氏曰以外物為重輕者。不得其欲則不足。得則滿矣。其滿與不足。係乎外物者也。若益以韓魏之家。而自視飲然。則是不以外物為重輕。志存乎道義而已。所進又可量乎。其過人也遠矣。

○孟子曰以佚道使民雖勞不怨以生道殺民雖死不怨殺者

程子曰以佚道使民謂本欲逸之也。播種乘屋之類是也。以生道殺民謂本欲生之也。除害去惡之類是也。蓋不得已而為其所當為。則雖拂民之欲而民不怨。其不然者反是。慶源輔氏曰播種乘為則雖拂民之欲而民不怨。其不然者反是。慶源輔氏曰播種乘然其本意。則乃欲佚之而已。故雖勞而不怨。除害去惡之類。雖不免於殺。然其本意。則乃欲生之而已。故雖死而不怨。殺者不得已





孟子通分大全卷一  
者事也。爲其所當爲者理也。事雖不得已。而吾但爲其理之所當爲。故雖勞之殺之。可謂拂民之欲矣。而民自不怨。不然。則是私意妄作而已。民之怨怒。其可得而逃乎。君子其亦謹其所謂勞與殺之事哉。○新安陳氏曰。事雖不得已。而理實所當爲。則雖拂民之私欲。而實契民之公心。故民雖勞且死。而自不怨也。

**或問** ○曰。去惡除害。固尹氏所引程子之說也。而程子又自有救焚拯溺之說。精義程子曰。且如救水火。是求所以生之也。或有焚溺而死者。却雖死不怨。二者不同。子之去彼取此。何也。曰。救焚拯溺。非常有之事。所指者狹。不當以此爲說。若曰。去惡除害。則正所謂辟以止辟者。彼爲惡以害人。其罪當死。吾求所以生之者。不得而後殺之。以安衆而厲其餘。凡此皆以生道殺之也。彼亦何怨之有。且或去惡如伐叛。除害如救水火。往者不幸而死。亦無所怨。此又足以兼彼之說。而彼不足以兼此也。

○孟子曰。霸者之民驩虞如也。王者之民皞皞如也。

驩虞。與歡娛同。皞皞。廣大自得之貌。程子曰。驩虞有所造爲而然。

豈能久也。耕田鑿井。帝力何有於我。帝王通曆帝堯之時。有老人擊壤於路曰。吾日出而作日

入而息。鑿井而飲。耕田而食。帝力於我何哉。風土記云。擊壤者。以木爲之。長三四寸。形如履。臘節。童少以爲戲。先側一壤於地。遙於

三四十步。以手中壤擲之。中者以爲上。如天之自然。乃王者之政。楊氏曰。所以致人

驩虞。必有違道干譽之事。若王者則如天。亦不令人喜。亦不令人

怒。楊氏曰。上文曰。伯者之民驩虞如也。治民使之驩樂。有甚不得。但所謂皞皞如也。則氣象與伯者之世不同。

**精義** 程子曰。易比之九五曰。顯比。王用三驅。失前禽。言王者顯用

其比道。天下自然來比。來者撫之。固不煦煦以求比乎物。若田之三驅。禽之去也。從而不追。來者則取之也。此王道之大。所以其民皞皞而不知爲之者也。

**語類** 自王者之民皞皞如也。而下至豈曰小補之哉。皆說王者之

功用如此。



**大全** 慶源輔氏曰伯者亟民之從規模狹窄時下雖得民之驩娛然豈能久哉事過意息則忘之矣至於王者則如天道之自然當生則生當殺則殺而民自忘其喜怒也○新安陳氏曰二如字似恂恂如蹶蹶如之如語助辭也○不徒是語助辭有形容氣象意伯者之民感上之惠而歡娛如伯功淺近易悅故也王者之民忘上之德而皞皞如王道廣大深遠而無迹故也○推原說尚宜渾之。

殺之而不怨利之而不庸民曰遷善而不知為之者

此所謂皞皞如也庸功也周禮曰民功曰庸豐氏曰因民之所惡而去之

非有心於殺之也何怨之有新安陳氏曰即上章以生道殺民之意因民之所利而

利之非有心於利之也何庸之有輔其性之自然使自得之故民

曰遷善而不知誰之所為也慶源輔氏曰因民之性輔其自然使自得夫善如堯所謂匡之直之輔之

翼之使自得之是也惟其如是故民曰遷於善而不知誰之使我如此也此即程子所謂耕田鑿井帝力何有於我之事

夫君子所過者化所存者神上下與天地同流豈曰小補之哉

君子聖人之通稱也所過者化身所經歷之處即人無不化如舜

之耕歷山而田者讓畔陶河濱而器不苦窳也語類問集註引舜事如何曰舜在下

只得如此及見用則賓四門之屬皆是化聖人豈能家至戶曉蓋在吾化中者皆是過所存者神心所存主

處便神妙不測如孔子之立斯立道斯行綏斯來動斯和莫知其

所以然而然也問集註云所存主處便神妙不測所經歷處皆化

化之之化有病則是過了者化物未過時却凝滯於此只是所經

歷處才露着些便化也雷一震而萬物俱生動霜一降而萬物皆

成實無不化者書曰俾予從欲以治四方風動亦是此意○又曰

存神過化程說甚精正是孟子本意過是身所經歷處無不感動

如黎民於變便是化存是存主處不是主宰是存這事這事便來

應意又曰程子經歷之說甚好蓋不獨是所居久處只曾經涉處

便見化所存者神存是自家主意處便不測亦是人見其如此是其德業之盛慶源輔氏曰德以

以其見於乃與天地之化同運並行舉一世而甄陶之非如伯者

但小小補塞其罅漏而已此則王道之所以為大而學者所當盡



心也

**或問**程子以所過者化為及物精義程子曰所存者在已也所過者化及物也而於易傳

又有所過者化如虎豹炳蔚之說易革卦九五象曰大人虎變其文炳也上六象曰君子豹變其

文蔚也其指明矣蓋言所過者化則凡所經歷物無不化不必久於

此而深治之然後物從其化也然其曰經歷亦不必為經行之地

凡其身之所臨政之所及風聲氣習之所被皆所經歷也所存者

神前說既以立之斯立等語明之則其意亦明矣其曰在已者蓋

以化者無意而及物此則誠於此而動於彼如所謂從欲以治也

但其感應之速如影響形聲之召有不知其所以然者是則所謂

神耳

**語類**此才有所存彼便應言感應之速也所以荀子云仁人之兵

所過者化所存者神只是簞食壺漿以迎王師處便是神子功曰

如舞于羽於兩階七旬有苗格亦是此理曰然○問經歷處則無

不化不經歷處何如曰此言經歷處便化如在鄉則一鄉化在天

下則天下化過者言其感人之速如此化是人化也神是事之成

就如神也○又曰所過者化只是身所經歷處如舜耕歷山陶河

濱者是也略略做這裏過便是感化不待久留言其化之速也謙

之云所存者神是心中安恁地便恁地否曰是上下與天地同流

重新鑄一番過相似○問同流是與天地同其神化否曰此難言

各有一分在裏曰是個參贊意否曰亦不是參贊○問過化存神

有先後否曰初無先後○問尋常人說皆云所過者化便能所存

者神曰他是就心說據孟子意乃就事上說此本上蔡之說橫渠云性性為能存神物



物為能過化，亦有此意。朱子皆不取。

**大全** 南軒張氏曰：伯者之為利，小而近；目前之利，民歡樂之。王者之化，大而遠，涵養斯民，富而教之，民安於其化，由於其道而莫知其所以然也。○新安陳氏曰：孟子辨王霸，屢矣。此又言王霸之民，其不同如此。首以霸與王對說，中言王而不及霸，末方以小補繳王伯之事，按新安上條謂所過者化，以其所存者神，又謂王者功用之大，其本在於過化存神，而此二者，又以存神為主，又將二句串說，又推本說張子謝氏有此說，語類皆闕過，故不錄。

○孟子曰：仁言不如仁聲之入人深也。

程子曰：仁言謂以仁厚之言加於民，仁聲謂仁聞，謂有仁之實而為眾所稱道者也。此尤見仁德之昭著，故其感人尤深也。慶源輔氏曰：仁言如書所載訓誥誓命之類是也，仁聲如郊人聞太王為仁人，伯夷、太公聞文王為仁人之類是也。

**或問** 仁聲之說曰：程子得之矣。精義程子曰：仁言為政者道其所出於上之言也，仁聲得於下之聲也。善政制民，善教化民也。

善政不如善教之得民也

政謂法度禁令，所以制其外也。教謂道德齊禮，所以格其心也。慶源輔氏曰：善政亦非徒尚夫法度禁令也，固亦有德行乎其間，但道之以政，齊之以刑，終不若道之以德，齊之以禮者。得民之心感而誠服也。善政說深一層，剝出善字來，見與管商之政不同，言下當自有分寸。若說得過火，便反着迹。

善政民畏之，善教民愛之，善政得民財，善教得民心

得民財者，百姓足而君無不足也。得民心者，不遺其親，不後其君也。慶源輔氏曰：百姓足而君無不足者，取之有道，用之有節，故民先自足而君亦無不足也。不遺其親，不後其君，使民之於君，親之如父母，愛之如四體，四體之喻，不愛尊而敬之，則得其財，與無不足。又有不足道者矣。○雲峯胡氏曰：孟子之意，蓋謂使民畏，不如使民愛，得民財，不如得民心。然善政得民財，一句集註又恐後世貪君污吏，借此以藉口，訓之曰：得民財者，百姓足而君無不足也，意謂無善政，則百姓不足，君孰與足矣。然有善政，以得民財，孟子猶以為不如善教之得民心。况後世無善政而取民之財者哉。

**大全** 南軒張氏曰：善政立而後善教可行，所謂富而教之者也。孟子論得民心，必歸之善教者，蓋至此而後為得民之至也。政



教本並衡而較量其得民之淺深輕重南軒申說非是。

○孟子曰人之所不學而能者其良能也所不慮而知者其良知也

良者本然之善也程子曰良知良能者皆無所由乃出於天不係於人。西山真氏曰善出於性故有本然之能不待學而能本然之知不待學而知也。

孩提之童無不知愛其親也及其長也無不知敬其兄也

孩提二三歲之間知孩笑可提抱者也愛親敬長所謂良知良能也。慶源輔氏曰孩提而下又所以指其良知良能之在人者曉之是豈待學而後能慮而後知哉。○新安陳氏曰孩提知愛親敬兄與能愛親敬兄此蓋指良知良能之先見而切近者以曉人也。按白文止言知愛敬陳氏補出能愛敬一層以與上文應蓋知之自即能之明補亦得渾括亦得。

親親仁也敬長義也無他達之天下也

言親親敬長雖一人之私然達之天下無不同者所以為仁義也。

**或問**

○曰程子至矣楊氏說固善然有未盡處

精義或問孟子言惻隱之心仁之端

也。又曰孩提之童無不知愛其親只說愛與惻隱何也。楊曰孟子但言發處乃若未發之前便只是中。蓋既曰惻隱

之心仁之端也又曰親親仁也則惻隱親親固仁之發而仁則惻

隱親親之未發者也未發者其體也已發者其用也以未發言則

仁義禮智渾然在中者非想象之可得又不見其用之所施也指

其發處而言則日用之間莫非切要而其未發之理固未嘗不行

乎其間要之體用未嘗相離故孟子因用以明體正欲學者即是

而默識之耳尹氏大意得之。尹曰良知良能與生俱生者也仁義出於人心之所同然君子能不失是

而達之天下也其曰能不失者則又言外之意也

**語類**

至之問達之天下也方為仁義曰親親仁也敬長義也不待

達之天下方始謂之仁義。未着人功說無他達之天下只說達之天下



無別道理

**大全** 問仁義不止於孝弟而孟子以為達之天下還是推孝弟之意所謂達乃達道達德之達言人心所同然也親親仁之發敬長義之發仁義之道無他人心之所同然耳○新安陳氏曰親吾親敬吾長雖是一人之私然推而達之天下則人人皆親親長長無不同者此人心天理之公也親親仁之實敬長義之實仁義不待外求不過即人之本心可通乎天下之人心而仁義不可勝用矣正以愛親敬長出於良知良能者凡人之性無不同此本然之善故也此二條最明暢能補語類之所未及

○孟子曰舜之居深山之中與木石居與鹿豕遊其所以異於深山之野人者幾希及其聞一善言見一善行若決江河沛然莫之能禦也

居深山謂耕歷山時也蓋聖人之心至虛至明渾然之中萬理畢具○新安陳氏曰此由其感而應之用一有感觸則其應甚速而無而推原其未感未應之體如此

所不通○又曰善言善行皆是感觸我者聞而急聽之見而急行非孟子造道之深不能形容至此也

**語類** 問舜聞善言見善行若決江河沛然莫能禦其未有所聞見時氣象如何曰湛然而已其理充塞具備一有所觸便沛然而莫可禦問學者未有聞見之時莫須用持守而不可放逸否曰纔知持守已自是聞善言見善行了

**大全** 南軒張氏曰所謂善言善行者豈有外於舜之性哉惟舜之心純乎天理故聞善言見善行不待勉強而自趨沛然若決江河之莫禦也○新安陳氏曰孟子又嘗曰大舜有大焉善與人同舍己從人樂取諸人以為善與此章寔互相發蓋舜之心萬善之感會也聞見天下之善因感觸吾心之善即勇於從之合而為一人之善此大舜之所以為大歟

○孟子曰無為其所不為無欲其所不欲如此而已矣  
李氏曰有所不為不欲人皆有是心也至於私意一萌而不能以



禮義制之則為所不為欲所不欲者多矣。能反是心則所謂擴充其羞惡之心者而義不可勝用矣。故曰如此而已矣。雲峯胡氏曰有所不為有

所不欲是本來羞惡之心無為其所不為無欲其所不欲是能擴充其羞惡之心為是一身之動欲是一念之動不惟謹其動而且謹其動之幾是眞能擴充其羞惡之心而義不可勝用矣。○新安陳氏曰李氏之說上言禮義下獨言義者蓋以義制事則能不為其所不當為以禮制心則能不欲其所不當欲故兼以禮義言之然義者心之制也施之斷制義為尤切斷然不為其所不當為不欲其所不當欲則在充其羞惡之心以達夫義之用而已。○常論義有兩項工夫一在擴充一在克治。此章集註主擴充之說擴充則當補出為所當為欲所當欲一層如此則義不可勝用或問取范氏之說與此正相發明語類主截斷之說截斷即克治之意謂知其所不當為所不當欲即斷然不為不欲如此即是義。大全收熊氏克治之說與此亦相發明兩說皆可用或補或不補隨主一說可也。此如非禮勿視聽言動一般非禮者既在所禁制則凡所視聽言動者必在於禮矣必無中立之介也。

**或問** 七十八章之說曰范氏之言如此。范曰君子所當為者義也所不可為者不義也。義不欲不善則所欲皆善君子之道止於如此而已矣。亦可謂

惻怛而懇至矣。誨爾諄諄聽我藐藐嗚呼難哉。附精義尹曰羞惡是非之心人皆有之。不夫其心而已。

**語類** 敬之問無為其所不為無欲其所不欲曰人心至靈其所不當為不當欲之事何嘗不知。但初間自知了。到計較利害却自以為不妨便自冒昧為之欲之耳。今既知其所不當為所不當欲者便要來這裏截斷斷然不為不欲故曰如此而已矣。

**大全** 勿軒熊氏曰此大學誠意章事無為其所不為是就躬行上發念處克治所謂哲人知幾誠之于思也。

○孟子曰人之有德慧術知者恒存乎疾疾

德慧者德之慧術知者術之知。疾疾猶災患也。言人必有疾疾則能動心忍性增益其所不能也。慶源輔氏曰德之慧謂慧德也與昏正相反術之知謂知術也與愚



正相反。疾疾則非真是病。故曰猶災患也。人惟有災患。疎動其仁義禮智之心。堅忍其食色臭味之性。故能增益其所不能。而有夫德慧術知也。按德以本心之理言。術以處事之方言。有體用之分。德有慧。便能灼事理之本然。術有智。便能審事理之當然。有知明處。當意在。然此意直至下節方透。觀註末繳句可見。

**語類**或問德慧術知曰德慧純粹術知聰明須有朴實工夫方磨得出。

### 獨孤臣孽子其操心也危其慮患也深故達

孤臣遠臣孽子庶子皆不得於君親而嘗有疾疾者也。達謂達於事理即所謂德慧術知也。

**大全**南軒張氏曰人平居無事漠然不省惟疾疾加焉則動心忍性有所感發故慧知由此而生危故專一而不敢肆深故精審而不敢忽專精之極故於事能通達也處安樂者誦斯言可不思逸豫之溺人而深戒懼乎當憂患者誦斯言可不念其為進德之地而自勉勵乎。新安陳氏曰此章與舜發猷章互相發故集註及南軒之說皆引動心忍性以釋此章人苟履憂患之境處

孤孽之勢當知天以是玉成於我勿自沮而深自力於以進其德益其術庶幾操心危而卒無危慮患深而卒免患而至於達乎達則德必慧術必知而疾疾不能為吾患矣。

### ○孟子曰有事君人者事是君則為容悅者

阿狗以為容逢迎以為悅此鄙夫之事妾婦之道也。慶源輔氏曰阿狗為容謂

長君之惡以求容其身者逢迎為悅謂逢君之惡以求君之悅者。

### 有安社稷臣者以安社稷為悅者也

言大臣之計安社稷如小人之務悅其君眷眷於此而不忘也。慶源

輔氏曰此即所謂天理人欲同行而異情也其眷眷不忘雖同而其情則異一則務為容悅之私一則務安社稷以為忠也。

### 有天民者達可行於天下而後行之者也

民者無位之稱以其全盡天理乃天之民故謂之天民。雲峯胡氏曰伊尹為天民之先覺此則曰有天民者旨意不同蓋前所謂天民者皆必秉氣乎天均之為天生之民此則以其全盡天理乃天之民也



其道可行於天下然後行之。不然則寧沒世不見知而不悔。不肯小用其道以徇於人也。張子曰必功覆斯民然後出。如伊呂之徒。新安陳氏曰伊耕莘。呂釣渭之時。可當天民之名。使不遇湯武則沒世不出必矣。此其天民主其不輕出而言。非以伊呂等後來出當大任而言也。

### 有大人者正己而物正者也

大人德盛而上下化之。所謂見龍在田天下文明者。慶源輔氏曰謂君下謂民大人德盛故君民無不化大人一出而天下文明是聖人之事也。○此章言人品不同略有四等容悅佞臣不足言安社稷則忠矣然猶一國之士也天民則非一國之士矣然猶有意也無意無必惟其所在而物無不化惟聖者能之。慶源輔氏曰猶有意如程子所謂伊尹雖聖人終是有任底意思在是也大人則聖人矣如周公孔子者能當之。周公在上而能使天下文明者也孔子在下而能使萬世文明者也。至公無私進退以道周公之無意無必也。仕止久速無可不可孔子之

無意無必也。○新安陳氏曰志於道德者功名不足以累其心。志於功名者富貴不足以累其心。事君為容悅志於富貴者也。安社稷為悅志於功名者也。春秋列國各卿可以當之。若天民者則志於道德矣。然猶未能純乎道德而無意於功名也。至於大人則純乎道德之自然而功名不足以累其心矣。此并論論語鄙夫章註意。

**或問** ○曰程子至矣。精義程子曰天民云者蓋是全盡得天生斯民底事業。達可行於天下者其全盡天生斯

民之理其術亦足以治天下國家也。○又曰天民者能盡天民之道者踐形者是也。如伊尹可當之矣。民之名則似不得位者必達可行於天下而後行之者也。大人者則如乾之九二。利見大人天下文明者也。天民大人亦係乎時與不時耳。然於天民之名亦少有未盡處。其曰天民大人亦係乎時與不時者蓋天民專指潛隱未得位者大人則其德已著如乾之二五通上下而言

之也。呂氏論天民之異者得之。呂曰如伊尹乃得天民之稱孟子所謂天民之先覺止謂天生之民與此義皆異。其第二說與楊氏說亦皆善也。呂曰為政之道備則不求於民而民歸之故大人之政正己而已。○楊曰孟子言大人正己而物正荆公却云正己而不期於正物則無義正



已而必期於正物則無命。若如其說。孟子自當言正已以正物。不止言而物正矣。物正物自正也。大人只知正已而已。若物之正何可必乎。惟能正已物自然正。此乃篤恭而天下平之意。荆公之學本不知此。荆公無義無命之說。不可用。若用兩路夾翻出而物正之意。亦可存。參曰。然則此其不言聖人何也。曰。大人蓋亦通言之矣。如乾

之大人。豈必以為充實光輝而未化者耶。此亦闢程子之說。○附伊曰。以事君為容悅者。佞臣也。以安社稷為悅者。忠臣也。天民則若伊尹。傳說之未遇也。所過者化。所存者神。大人其能之矣。

**文集** 答馮作肅書曰。以伊尹為天民。蓋以其事言之。如耕莘應聘

之事。即分明見得有此蹤跡也。治亦進亂亦進。是指五就湯五就桀而言。乃是就湯之後。以湯之心為心。非不逮可行而遽行之謂也。此闢作肅問辭。傳說是大賢。比伊尹須少貶。其見可而後行。雖同。但所

以行者。或不及耳。周孔又高。此是正已而物正之事。可行而行。亦有所不及道矣。

**大全**

南軒張氏曰。以事是君為容悅者。慕爵祿而從君者也。以安社稷為悅。則志存乎功業者也。與為容悅者固不同矣。然未及乎道義也。蓋志存功業者。則苟可就其功業而遂其志。則亦所屑為矣。古之人。惟守道明義而已。雖有蓋世之功業。在前可為。而在我者。有一毫未安。則不敢徇也。天民者。必明見夫達而其道可行於天下。而後行之。蓋其所主在道。而非必於行世。謂之天民者。言能全夫天理者也。天之生民者。其理無不具。而人之虧欠者多矣。故程子謂天民為能踐形者也。以其在下而未達。故謂之民。若伊尹之在莘野。是也。正已而物正者。正已而物自正也。若規規然有意於正物。則其道狹矣。至正而天下之感無不通焉。固有不言而信。不令而從者矣。秦漢而下。其間號為賢臣者。不過極於以安社稷為悅而已。語夫天民事業。則鮮也。

○孟子曰。君子有三樂。而王天下不與存焉。

**大全**

南軒張氏曰。君子之樂。樂其天也。於下文三者得其樂。則視王天下之事。如太虛中浮雲耳。果何與於我。而况其他哉。

父母俱存。兄弟無故。一樂也。

此人所深願而不可必得者。極平常事。然亦極難得事。從古聖賢。致憾於其際者多矣。今既得之。其樂可知。有孝于親。友于兄弟。極家庭敘順之樂。方足以當之。不然。世人之際此境者。亦不少矣。豈盡見其樂乎。



仰不愧於天俯不忤於人二樂也

程子曰人能克己則仰不愧俯不忤心廣體胖其樂可知有息則  
新安陳氏曰本文無克己之意此程子所以推原能不愧不  
餒矣作之由而示人以其要也人所以俯仰愧忤累於己私耳克  
去己私則內不愧於心所以仰不愧於天俯  
不忤於人心廣體胖之樂不期其然而然矣

得天下英才而教育之三樂也

盡得一世明睿之才指資質言而以所樂乎已者指不愧不忤教而養之則  
斯道之傳得之者衆而天下後世將無不被其澤矣聖人之心所  
願欲者莫大於此今既得之其樂為何如哉

**大全**慶源輔氏曰此樂與朋自遠來之樂同而有大有焉○新安陳

氏曰朋自遠來其言平而易遂得天下英才其言高而難必  
孟子之門僅一樂正子亦恐未足以當此韓子曰軻  
之死不得其傳焉是孟子於此一樂亦終不能得也

君子有三樂而王天下不與存焉

林氏曰此三樂者一係於天天倫一係於人傳道其可以自致者惟不

愧不忤而已學者可不勉哉

**精義**尹曰父母俱存兄弟無故樂得於天也仰不愧俯不

忤樂得於己也得天下英才而教育之樂得於人也  
南軒張氏曰三樂之中仰不愧俯不忤其本歟蓋不愧不忤  
在我可得而勉者也使吾胸中多所愧忤則雖處父母兄弟  
之間固亦不得而樂其樂也所以教育天下之英才者是吾之不  
愧不忤者也自不能無愧忤則雖得英才亦何以爲教而有此樂  
哉

○孟子曰廣土衆民君子欲之所樂不存焉

地闢民聚澤可遠施故君子欲之然未足以爲樂也

中天下而立定四海之民君子樂之所性不存焉

其道大行無一夫不被其澤故君子樂之然其所得於天者則不  
在是也



**大全** 慶源輔氏曰二者皆施仁之事。但有一國與天下之辨。故所

欲未足以為樂。至於樂則博施濟眾。聖人之事也。所欲極於所樂。固亦非性外之事。但於吾性所受之全體。則初無增損也。○雲峯胡氏曰前章君子三樂。所樂在所性之中。此章君子樂之所性。在所樂之外。何也。曰。中天下而立。達而上者。君子之所性。固不以達而在上有所加也。故君子雖樂乎此。而其所得乎天者。不在此也。或曰。集註前謂斯道傳之者眾。而天下後世將無不被其澤。此謂其道大行。無一夫不被其澤。皆曰道曰澤。而此則所性不存焉。何也。曰。斯道傳之者眾。萬世之澤也。其道大行。一時之澤也。況其道大行。必中天下而立。能之。其道有待於位而後行。不如是則不能行。此君子雖樂乎此。而所性不存焉。若夫盡得一世明睿之才。而以所樂乎已者。教而育之。以已之天。覺彼之天。聖人之心。深樂乎此。而其樂即在性分之內。且孟子於三樂。則曰。王天下不與存。於中天下而立。則曰。所性不存。分而言之。故自大有間哉。君子所性雖大行不加焉。雖窮居不損焉。分定故也。

分者所得於天之全體。故不以窮達而有異。

**或問** ○曰。程子至矣。宜深玩之。精義程子曰。天理云者。這一個道

亡。人人得之者。故大行不加。窮居不損。是他原無少欠。百理具備。又曰。仁義禮智。根心生色。言四者本於性而生色也。睟于面。益于

背。施於四體。四體不言而喻。孟子非自及此。焉能道得到此。又曰。得之於心。謂之有德。自然睟面。益背。施於四體。四體不言而喻。豈待勉。楊氏以仁義禮智根於心。為本來如此者。或問根於心。說本強也。楊氏曰。只是說本來如此。亦曰其所稟者然耳。蓋孟子所養之功。楊氏曰。只是說本來如此。亦曰其所稟者然耳。蓋孟子所若睟面益背。則充養之功存焉。謂性猶性之之云也。

**語類** 敬之問。君子所性。雖大行不加焉。雖窮居不損焉。君子但當

自盡吾心之天理。雖達而在上。做出事業功名。亦只是浮雲於太虛之中。於我何有哉。曰。中天下而立。定四海之民。固是人之所欲。與其處猷猷之中。孰若進而得行其道。使天下皆被其澤。要得出行其道者。亦是人之所欲。但其用。其舍。於我性分之內。本不相關。進而大行退而窮居。於我性分之內。無所加損。○問。君子所性。章曰。只是這一個道理。雖達而為堯舜在上。亦不是添加些子。窮而為



孔孟在下亦不是減少些子蓋這一個道理合下都定了更添減不得又云這所性字說得虛如堯舜性之性字

君子所性仁義禮智根於心其生色也睟然見於面盎於背施於四體四體不言而喻

上言所性之分與所欲所樂不同此乃言其蘊也仁義禮智性之四德也根本也語類安卿問何謂根曰養得到見得明便自然生根此是人功夫做來又曰看文字當看大意又看

語句中何字是切要孟子謂仁義禮智根於心只根字甚有意如此用心義理自出生發見也睟然清和潤澤之貌盎豐厚盈溢之意施於四體謂見於動作威儀之間也喻

曉也四體不言而喻言四體不待吾言而自能曉吾意也問四體不言而喻曰是四體不待命令而自然如此謂手容恭不待自家教他恭而自然恭足容重不待自家教他重而自然重不待教他如此而自如

蓋氣稟清明無物欲之累此指大賢以上質地說則性之四德根本於此也

心其積之盛而發而著見於外者不待言而無不順也新安陳氏曰順謂順其則也當玩味根字生字其根深則其積盛其積盛則其生發自不可遏矣程子曰睟面盎背皆積盛

致然四體不言而喻惟有德者能之○此章言君子固欲其道之大行然其所得於天者則不以是而有所加損也新安陳氏曰道之

固所樂也而於性分亦何加窮居如孔孟亦非所戚也其於性分亦何損此君子所以惟求盡其性分之內者而無所慕於勢分之外

者也在外

**語類**問君子所性曰此是說生來承受之性仁義禮智根於心便見得四端着在心上相離不得才有些子私意便剗斷了那根便無生意譬如木根着在土上方會生其生也睟然都從那根上發

出來且性字從心便見得先有這心便有許多物在其中○問仁義禮智根於心曰上說君子是通聖人言蓋君子氣稟清明無物



欲之累故合下生時。這個根便着土。所以生色形見於外。此着自然說。

衆人則合下生時便為氣稟物欲一重隔了。這個根便未着土在。

蓋有殘忍底心便沒了仁之根。有頑鈍底心便沒了義之根。有忿

恨底心便沒了禮之根。有黑暗底心便沒了智之根。都各有一重

隔了。而今人只要去其氣質物欲之隔。教四者之根着土而已。此

勉然如堯舜性之便是根已着了土了。湯武反之便是元氣未曾着

說土而今方移得來着了土了。此合安勉為証。○論孟子本文只着現

義方○問仁義禮智根於心曰雖是自家合下都有這個物。若有

些子私欲夾雜在其中便把好底和根都剝去了。

○孟子曰伯夷辟紂居北海之濱。聞文王作興曰盍歸乎來吾聞西

伯善養老者太公辟紂居東海之濱。聞文王作興曰盍歸乎來吾聞

西伯善養老者天下有善養老則仁人以為已歸矣。

已歸謂已之所歸。餘見前篇。新安陳氏曰仁人指伯夷太公前篇

居其二。大老以齒

五畝之宅樹牆下以桑。匹婦蠶之則老者足以衣帛矣。五母雞二母

彘無失其時。老者足以無失肉矣。百畝之田匹夫耕之。八口之家可

以無饑矣。

此又王之政也。一家養母雞五。母彘二也。餘見前篇。

**大全**趙氏德曰孟子言五畝之宅者三。梁惠上首尾言之。此首篇

之首尾也。至七篇又言而語加詳。此一書之首尾也。孟子拳

所謂西伯善養老者制其田里教之樹畜導其妻子使養其老五十

非帛不煖七十非肉不飽不煖不飽謂之凍餒。文王之民無凍餒之



孟子通考大全卷十三  
老者此之謂也

田謂百畝之田。里謂五畝之宅。樹謂耕桑。畜謂雞彘也。趙氏曰善養老者。教導之使可以養其老耳。非家賜而人益之也。

**精義**

尹曰王政之始。必本於民無凍餒其本不治。未有能成善政者也。孟子見之明言之屢也。

**大全**

南軒張氏曰以伯夷太公之事觀之。則知天下有善養老者矣。仁人必歸之。蓋善養則其仁心之所存。仁政之所行。可知矣。仁人見其然是以樂從之。○慶源輔氏曰若無孟子此說。則人將謂文王之養老。只如後世尊養三老五更之禮文而已。

○孟子曰易其田疇薄其稅斂民可使富也

易治也。疇。耕治之田也。

教民務本與薄稅斂俱主在上人說。此開財源也。

**或問**


○曰范氏極陳堯舜三代養民之法而歸之欲治天下。先治

其心者可謂至富之言矣。

范氏曰先王養天下之民。非人人衣食之也。惟不奪農時。則皆得治其田疇。恭

儉節用則可以薄其稅斂。此二者使富足之道也。又曰聖人之治天下。既庶而又富之。既富而後教之。倉廩實而知禮節。衣食足而







流水之爲物也不盈科不行君子之志於道也不成章不達

言學當以漸乃能至也成章所積者厚而文章外見也達者足於此而通於彼也○此章言聖人之道大而有本學之者必以其漸乃能至也

**語類**至之問孔子登東山而小魯一節曰此一章如詩之有比興比者但比之以他物而不說其事如何興則引物以發其意而終說破其事也如孔子登東山而小魯至遊於聖人之門者難爲言此興也觀水有術至容光必照焉此比也流水之爲物也至不成章不達此又是興也比者如鶴鳴於九臯之類興者如他人有心予忖度之上引龜兔桑木之類是也流水之爲物也不盈科不行君子之志於道也不成章不達蓋人之爲學須是務實乃能有進



若這裏工夫欠了些分毫。定是要透過那裏不得。

**大全**朱子曰成章是做得成片。段有文理可觀。故孝真個是做得孝成。忠真個是做得忠成。子貢之辨。子路之勇。都是真個做得成了。不是半上落下。今日做得。明日又休了。慶源輔氏曰。如自有諸已之謂信。至於大而化於彼。須寔體之。方知其味。非妄想虛空者所能測識也。○又曰。聖道之大。固有其本矣。然自學者言之。則又豈能一蹴而至哉。故又以水必盈科而後行。君子之志於道。必成章而後達者。曉之以見學者當務寔而有漸。不可躡等陵節。懸空妄想。而卒歸于無所得。○東陽許氏曰。第一節兩言登山。謂所處地位高。則視下愈小。觀海難為水。謂所見大。則小者不足觀。聖門難為言。謂既聽聖人之言。則餘人之言皆不足聽。第二節言聖人之道有本。故用不窮。第三節言學者當學聖人。以漸而進。不可躡等也。○朱氏公遷曰。此章不成章不達。是進道必以其序。中庸行遠自邇。登高自卑。及孟子子身不行道。不行於妻子。皆是行道必以其序。進道不以序。則必躡等而陵節。行道不以序。或至於倒行而逆施。斯所以貴乎有序也。此舉其本體而用。以用功之道言之。

○孟子曰雞鳴而起孳孳為善者舜之徒也

孳孳勤勉之意。言雖未至於聖人。亦是聖人之徒也。

雞鳴而起孳孳為利者蹠之徒也

蹠盜蹠也。

欲知舜與蹠之分。無他利與善之間也。

程子曰言間者。謂相去不遠。所爭毫末耳。善與利公私而已矣。才出於善。便以利言也。○楊氏曰舜蹠之相去遠矣。而其分乃在利善之間而已。是豈可以不謹。然講之不熟。見之不明。未有不以利為義者。又學者所當深察也。或問雞鳴而起。若未接物。如何為善。程子曰只主於敬。便是為善。語類用之問舜孳孳為善。未接物時。只主於敬。便是為善。以此觀之。聖人之道。不是默然無言。聖人之心。純亦不已。雖無事時也。常有個主宰。在這裏。固不是放肆。亦不是如稿木死灰。曰這便如夜來說。只



是有操而已一段。如今且須常存個誠敬做主。學問方有所歸着。如有屋舍了。零零碎碎。方有頓處。不然却似無家舍人。雖有千萬之寶。亦無安頓處。今日放在東邊草裏。明日放在西邊草裏。終非已物。○新安陳氏曰。未接物時。敬以直內。以立其本。及接物時。義以方外。以達其用。此動靜交養。內外交持之功。皆所謂為善也。必如是而後為善之功始密矣。不然則未接物時。為無所用。其為善之力乎。○慶源輔氏曰。程子又教人以靜時功夫也。動靜相涵。敬義相立。孳孳不已。則亦庶乎可以進於聖人之學矣。

**或問** ○曰。諸說皆善。精義程子曰。孟子辨舜蹠之分。只在義利之間。只那計較。便是為有利害。何用計較。利害者。天下之常情也。人皆知趨利避害。聖人則更不論利害。惟看義當為與不當為。便是命在其中也。又曰。大凡出義則入利。出利則入義。天下之事。惟義利而已。○呂曰。天下之言善者。必稱舜。舜者善之至也。天下之言利者。必稱蹠。蹠者不善之至也。聚黨數千。橫行天下。以不義謂之盜蹠。蹠所以為盜者何也。貪利而已。雞鳴而起。孳孳為善。惟日不足者。蹠之徒黨也。與舜為徒。則入於舜。與蹠為徒。則入于蹠。人皆可以為舜。亦可以為蹠。惟在利與善而已。故曰。欲知舜與蹠之分。無他。利與善之間也。孟子曰。道二。仁與不仁而已矣。天下之道。惟善與惡。惟義與利。好善則終於為舜。好利則終於為蹠。君子小人。各趨一途。故君而程子未接物時之論。尤能發明言外之意。學子憂其不如舜。

者所當深念也。然程子又嘗言不獨財利之利。凡有利心。便不可。如作一事。須尋自家穩便處。皆利心也。善利之辨。如此則善利之間。相去毫髮。上合正註。下歸重致。知邊。卽外註。楊氏意。苟辨之不明。其不反以利為善者鮮矣。此大學之道。所以雖以誠意正心為重。而必以格物致知為先也。或問為善為利處。因舉龜山答廖尚書用中一段。曰。龜山說得鶻突。廖公認得。不仔細。後來於利害上。頗不分別。紹興間。秦氏主和。建議不決。召廖公來。他愔然不知。却去問他。平日所友善之人。如鄭邦達之輩。邦達亦不思量。便云。和是好。事故廖公到關。卽主和議。遂為中丞。然他亦不肯為秦氏鷹犬。秦嘗諷令言趙公鼎。廖竟不從而出。此以時事。寔証利善難辨。

**語類** 敬之問。利與善之間也。這個利。非是有心於為利。只見利不明。才差些。便入那邊去。曰。然才差向那邊去。只見利之為美。○或問利與善之間。曰。問是兩者相並在這裏。一條路做這邊去。一條路做那邊去。所以謂之間。○利與善之間。不是冷水。便是熱湯。無

盡心上



那中間温吞煖處也。○利與善之間。若纔有心要人知。要人道好。要以此求利祿。皆爲利也。這個極多般樣。雖所爲皆善。但有一毫欲慕外物之心。便是利了。善利之辨。又極周備。凡有爲而爲者皆是。如一塊潔白物事。上面只着一點黑。便不得爲白矣。又如好底物事。如腦子之屬。上面只着一點糞穢。便都壞了。不得爲香矣。若是糞穢上面。假燒着一堆腦麪。亦不濟事。做善須是做到極盡處。方喚做善。○利善若只是利善。則易理會。今人所爲處。都是利。只管硬差排道是善。今人只是差處多。只一條大路。其餘千差萬別。皆是私路。

**大全**新安陳氏曰。善與利之間。察之貴乎精。而爲善之力。守之貴乎一。察之精。致知之事也。守之一。力行之事也。察之不精。則認利爲義。認人欲爲天理者有矣。守之一。則今日爲善。明日怠焉者有矣。必精以察乎善利之間。而不雜。一以守其爲善之力。而不移。則庶乎不流爲躋之歸。而人皆可爲舜者。將真可以爲舜矣。此章亦所以還人欲擴天理也。

○孟子曰楊子取爲我拔一毛而利天下不爲也

楊子名朱。取者。僅足之意。取爲我者。僅足於爲我而已。不及爲人也。列子稱其言曰。伯成子高。不以一毫利物是也。此失之不及者。○列子楊朱篇

楊子曰。伯成子高。不以一毫利物。舍國而隱。大禹不以一身自利。一體偏枯。古之人。損一毫利天下。不與也。悉天下奉一身。不取也。人人不損一毫。人人不利天下。天下治矣。禽子問楊朱曰。去子體之一毫。以濟一世。汝爲之乎。楊朱曰。世固非一毛之可濟。禽子曰。假濟爲之乎。楊朱不應。

**語類**楊朱乃老子弟子。其學專爲己。問老子似不與楊朱同。曰。老子窺見天下之事。却討便宜。置身於安閑之地。云清靜自治。豈不是與朱同。又問伊川說老子先語大道。後却涉些奸詐。如云知其雄。守其雌。知其白。守其黑之說。曰。孔孟亦知天下有許多事。何以不厭他。曰。孔孟見實理。把作合做底看。他不見實理。把做無故不



孟子通義卷之三  
肯爲問孔子曾有他書否曰未必見厚之間孔子何爲問禮於他  
曰他本是周家史官自知禮只是以爲不足道故一切掃除了曾  
子問中自見孔子問他處卻康節亦有些小似他○問墨氏兼愛  
楊氏爲我夫兼愛雖無差等不合聖人之正道乃是刻已爲人滅  
去已私猶足立教若爲我乃是小已自私之事果何足以立教耶  
曰莊子素稱楊子居之爲人恐楊氏之學如今道流修煉之士其  
保嗇神氣雖一句話也不妄與人說正孟子所謂拔一毛而利天  
下不爲是也

### 墨子兼愛摩頂放踵利天下爲之

墨子名翟兼愛無所不愛也摩頂摩突其頂也放至也此失于太  
過者○南  
軒張氏曰摩其頂以至踵一身之  
間凡可以利天下者皆不惜也

### 子莫執中執中爲近之執中無權猶執一也

子莫魯之賢人也知楊墨之失中也故度於二者之間而執其中  
近近道也權稱錘也所以稱物之輕重而取中也執中而無權則  
膠於一定之中而不知變是亦執一而已矣程子曰中字最難識  
須是默識心通且試言一廳則中央爲中一家則廳非中而堂爲  
中一國則堂非中而國之中爲中推此類可見矣又曰中不可執  
也識得則事事物物皆有自然之中不待安排安排着則不中矣  
語類問楊墨固是皆不得中至子莫又要安排討個中執之日子  
莫見楊墨皆偏在一處要就二者之中而執之正是安排尋討也  
原其意思固好只是見得不分明依舊不是○新安  
陳氏曰安排者以私意揣度之而不順其自然也

**或問**

○曰程子張子之言至矣精義程子曰子莫見楊墨過不及  
於過不及二者之間執之却不知  
有當摩頂放踵利天下時有當拔一毛利天下不爲時執中而不  
通變與執一無異又曰且如初寒時則薄裘爲中如在盛寒而用




初寒之衣則非中也。或曰：男女不授受之類皆然。曰：是也。男女不授受，中也。在喪祭則不如此矣。又曰：欲知中庸無如權。須是時而為中。若以手足胼胝，閉戶不出，二者之間取中，便不是中。若當手足胼胝，則於此為中。當閉戶不出，則於此為中。權之為言，稱錘之義也。何物為權？義也。又曰：君子不以天下為重，而身為輕。亦不以身為重，而天下為輕。凡盡其所當為者，如可以仕則仕之類是也。此孔子之道也。蔽焉而而張子之言尤精且詳。其論無忌憚者，所以憂後學者至矣。可深玩也。

張子說未詳 謝楊之說亦善。謝曰：君子而為權，豈不壞了權字。○楊曰：聖人所謂權者，猶權衡之權。量輕重以取中也。用之無銖兩之差，則物得其平矣。今夫物有本重而未輕者，執其中而不知其權，則物失其平，非所以用中也。世人以用智為知權，則悞矣。又曰：如一尺之物，約五寸而執之，中也。一尺而厚薄小大之體殊，則所執者輕重不等矣。猶執五寸以為中，是無權也。蓋五寸之執，長短多寡之中，而非厚薄小大之中也。欲求中，行中，因權立中庸之書，不言權。

呂氏論文義處得之 呂曰：二子不明，流於異端。楊子所取者為我而已，為我所以愛其身。雖拔一毛利天下不為也。墨子所取者兼愛而已，兼愛所以為仁。至於摩

頂放踵，利天下為之。子莫不為楊子之為我，不為墨子之兼愛。是能執中也。為近於道，執中適權，則至於道矣。執中無權，無異楊子之為我。無異墨子之兼愛，是猶執一也。孟子所以惡執一端之見者，謂之賊道也。如楊子執為我之見，是賊其仁。墨子執兼愛之見，是賊其義。執一則不該不偏，是以舉一而廢百也。夫道非窮天以為高，非極地以為深，人之所性之中，固有之矣。其體則純而不雜，其用則施至。謂雖為我而與天下同其利，雖兼愛而立愛自親始。則其文義尤不可曉。夫既專於為我，則安能與天下同利。能與天下同利，則不得為為我矣。既兼愛則安能立愛自親始。則亦不得為兼愛矣。兩者相攻如水火之不相入，乃欲兩取而兼存之，推尊孟子而并容楊墨，得無亦有不叛聖賢而兼取老佛之微意耶。

**大全** 朱子曰：三聖相授，允執厥中。與子莫執中文同而意異。蓋精一之餘，無適非中。其曰允執，則非徒然執之也。子莫之執中，其為





孟子通考卷之三  
我不敢為楊朱之深其兼愛不敢為墨翟之過而於二者之中執其一節以為中耳故由三聖以為中則其中活由子莫以為中則其中死中之活者隨時隨事而無不中中之死者非學聖人之學不能有以權之而常適於中也權者權衡之權言其可以稱物之輕重而遊移前却以適其中蓋所以節量仁義之輕重而時措之者也程子謂子莫執中比楊墨為近而中則不可執也當知子莫之執中與舜禹湯之執中不同則知此說矣蓋聖人義精仁熟非有意於執中而自然無過不及故有執中之名而實未嘗有所執也以其無時不中故又曰時中若學未至理未明而徒欲求夫所謂中者而執之則所謂中者果何形狀而可執也殆見愈執而愈失矣子莫是也既不識中乃慕夫時中者而欲隨時以為中吾恐

其夫之彌遠未必不流而為小人之無忌憚也此是發明中庸但張子之說

言擇善而不言擇中其曰擇乎中庸亦必繼之曰得一善豈不以

善端可求而中體難識乎夫惟明善則中可得而識矣慶源輔氏曰楊氏資

質畧偏於剛毅墨氏資質畧偏於寬厚只緣不知至理之所在而各流於一偏淪胥不已遂至各極其偏一則為我一則兼愛至于子莫又自其末流觀之而知楊墨之皆失中也乃度於兼愛為我之間而執其中其意固善而於道亦近矣然時有萬變事有萬殊物有萬類而中無定體若但膠於一定之中而執之不能如稱錘之因物輕重而前却以取平則與二子之執一者亦無以異矣若子莫者是要安排個中來執之也

### 所惡執一者為其賊道也舉一而廢百也

賊害也為我害仁兼愛害義新安陳氏曰為我者惟知有己不知有人似義非義而有害于仁兼愛者

愛無差等似仁非仁而有害於義執中者害於時中皆舉一而廢百者也言其多也

此章言道之所貴者中中之所貴者權楊氏曰禹稷三過其門而



不入苟不當其可。則與墨子無異。顏子在陋巷不改其樂。苟不當其可。則與楊氏無異。子莫執為我兼愛之中而無權。鄉鄰有鬪而不知閉戶同室有鬪而不知救之。是亦猶執一耳。故孟子以為賊道。禹稷顏回易地則皆然。以其有權也。不然則是亦楊墨而已矣。朱子曰。且如三過其門而不入。在禹稷之時則可在。顏子則不可。居陋巷。在顏子之時則是在。禹稷之時則非中矣。居陋巷則似楊氏。三過其門而不入。則似墨氏。要之禹稷似兼愛而非兼愛。顏子似為我而非為我。道夫云。嘗記先生云。中一名而函二義。這個中要與時中之中同。曰然。

**大全** 南軒張氏曰。為我兼愛皆道也。當為我則為我。當兼愛則兼愛。是乃道也。彼墮於一偏者。固賊夫道而於其間取中者。是亦舉其一而廢其百耳。○雲峯胡氏曰。吾儒亦有所謂中者。是但吾儒之中也。隨時以取中。異端之中也。執中而無權。吾儒之一也。以貫萬異端之一也。○朱氏公遷曰。子莫執中。與聖人之中不同。聖人隨事即理。而有自然之中。子莫則膠於一定以為中。所以然者。以其無權故也。若有權以稱之。斯得事理自然之中矣。

○孟子曰。饑者甘食。渴者甘飲。是未得飲食之正也。饑渴害之也。豈惟口腹有饑渴之害。人心亦皆有害。

口腹為饑渴所害。故於飲食不暇擇而失其正味。人心為貧賤所害。故於富貴不暇擇而失其正理。朱子曰。饑渴害其知味之性。則飲食雖不甘亦以為甘。利欲害其仁義之性。則所為雖不可亦以為可。○甘是不暇擇飲食正味。如不得其醬不食之類。

**文集** 潘子善曰。饑者甘食。渴者甘飲。某竊謂此章是借饑渴之害以言人心之害。所謂人心之害。恐不止為貧賤而已。凡一切欲有求之。不得而遂。不暇擇焉。皆是也。所謂人能無以饑渴之害為心害者。謂人能無以饑渴害口腹之類為其心害。則不憂其不及人矣。未知。曰此章從來有兩說。以意則此說勝。蓋不欲人以利欲害其心。如饑渴之害口腹也。以語則不以饑渴之害動其心者為切。於文義未知果孰是。但後說差不費力耳。朱子兩說兼存而多從之。蓋如註意白文。只作比照說。未免言外起意。如此說轉覺渾融。隨主一說可也。



人能無以饑渴之害爲心害則不及人不爲憂矣

人能不以貧賤之故而動其心則過人遠矣

**大全**慶源輔氏曰人若能不以貧賤動其心而於富貴辨其所當得而受之其不當得則不受之則過於常人遠矣過人之遠則不憂其不及人矣○新安陳氏曰富貴有當得不當得之正理知之在心如飲食有美惡之正味知之在口口腹因饑渴而失其正味人易知之人心因貧賤而失其正理人多未知也孟子因舉人之易知者以曉人之未知者此正喻對舉以饑渴貧賤作兩種說即註說也夫貧賤不與饑渴期而饑渴必至自非有守之君子必不能忍饑渴遂厭貧賤而求富貴以害其心之正理矣是害口腹者饑渴也害心者亦饑渴也饑渴能害口之正味不當以害心之正理此君子所以可饑可寒可貧可賤而不可與爲不義也人能不以貧賤動其心不以饑渴之害害其心則必不厭貧賤以脫饑渴必不冥受富貴以圖甘肥而不患不及人矣凡此皆孟子所以過人欲而存天理也此即正即喻以饑渴貧賤作一串說與文集說合

○孟子曰柳下惠不以三公易其介

介有分辨之意慶源輔氏曰介有分辨意則與界限之界同凡事各有界限甚分明不可踰越○新安陳氏曰介有

剛介之時廉介之意惟其有分辨所以能如此亦如廉本訓廉隅惟其廉隅分辨所以清廉廉潔也○尙書立太師太傅太保茲爲三公論道經邦燮理陰陽則三公乃官柳下惠進不隱賢必以其之至尊者也又周三公太師太傅太保柳下惠進不隱賢必以其道遺佚不怨阨窮不憫直道事人至於三黜是其介也○新安陳氏曰不以三公之貴移奪其所守之介和而不流故也○此章言柳下惠和而不流與孔子論夷齊不念舊惡意正相類皆聖賢微顯闡幽之意也○新安陳氏曰微顯

繫辭杜預春秋傳序引用以言孔子作春秋之意于顯明者則微之幽昧者則闡之集註以爲孔孟之論夷齊柳下惠亦得此意蓋夷齊之清惠之和此其顯而易見者夷齊之不念舊惡惠之介此其幽而難見者今則微其顯而闡其幽聖賢之至公至明如此

**或問**柳下惠不辭小官楊氏既以爲和又以爲介何也曰不辭小官和而介也人知其和而不知其爲介焉楊氏之說爲有功矣○精

楊曰不惡汗君不辭小官可謂和矣和而不以三公易其介則雖和而不流此所以爲柳下惠也○語類問柳下惠不以三公易其介此與聖人之和互相發耶乃所以爲和耶曰若觀其和疑若不介故此持言之曰何以知其介曰只不卑小官之意便自可見如



柳下惠之才。以為大官。何所不可。而樂於小官。則其剛介可知矣。此與註解不同。註中介字。從直道看出。此即從和字看出。○附呂曰。介者。殊俗特立之行也。孟子嘗稱柳下惠。聖人之和。異乎衆人之和。此所以為介。此孔子所謂和而不流。論語載其為士師三黜。人曰。子未可以去乎。曰。直道而事人。焉往而不三黜。枉道而事人。何必去父母之邦。由是考之。則柳下惠不以三公易其介矣。此所以為百世師也。

**大全** 汪氏曰。伯夷餓於首陽。伊尹祿以天下。弗顧。皆能不以三公易其介。獨稱柳下惠。何也。以惠之和。謙於不介。故也。○雲峯胡氏曰。人皆知夷齊之清。而不知夷齊之清而有量。人皆知柳下惠之和。而不知惠之和而不流。孔孟之言。皆闡幽之意也。

○孟子曰。有為者辟若掘井。掘井九仞。而不及泉。猶為棄井也。

八尺曰仞。新安陳氏曰。集註於語。夫子之牆數仞。下云。七尺曰仞。愚按。周書為山九仞。孔安國云。八尺曰仞。鄭玄云。七尺曰仞。集註兩存其說。歟。蔡氏傳。從孔說。愚証之。周禮。匠人為溝洫。廣四尺。深四尺。謂之溝。廣八尺。深八尺。謂之洫。廣二尋。深二仞。謂之澮。蓋其為溝洫澮。是加一倍之數。尋八尺也。仞亦八尺也。度修廣。則計之以尋。度高深。則計之以仞。是澮之廣與深。各一丈六尺也。以此觀之。則孔言鑿井雖深。然未及泉而止。猶為自棄其井也。說為是。鄭說恐非。

○呂侍講曰。仁不如堯。孝不如舜。學不如孔子。終未入於聖人之域。終未至於天道。未免為半途而廢。自棄前功也。

**精義** 尹曰。君子之所為。貴乎有成也。五穀不熟。不如萑稊。亦猶是也。

**大全** 雲峯胡氏曰。當與論語譬如為山一章通看。學問垂成。而不至於成者。可為戒矣。

○孟子曰。堯舜性之也。湯武身之也。五霸假之也。

堯舜天性渾全。不假修習。湯武修身體道。以復其性。五霸則假借仁義之名。以求濟其貪欲之私耳。

**或問** ○曰。諸說皆善。精義程子曰。堯舜性之。生知也。湯武身之。學有間也。曰。無間。又曰。身踐履也。假之者。身不行而假借之也。○楊曰。堯舜性之。由之而行者也。湯武身之。體之者也。五霸假之而已。非已有也。又曰。王道本於誠意。管仲亦有是處。但其意別耳。如伐楚。責之以包茅不貢。其名則是。若其意。豈為楚不勤王。然後加兵。但欲楚尊齊。假此為說耳。故孟子曰。集註二說。雖若未有定論。然五霸假之也。蓋言其不以誠為之也。



孟子通考卷十三  
皆庶幾其不悖於孟子之本意云

**語類**性之是合下如此。身之是做到那田地。○堯舜性之也。性字似稟字。湯武身之也。是將這道理做成。這個渾身將這渾身做出這道理。○黃仁卿問性善之性與堯舜性之之性如何。曰性善之性字實。性之之性是虛。性之只是合下稟得。合下便得來受用。又曰反之是先失着了。反之而後得身之。是把來身上做起。○聖人之心。不會有個起頭處。堯舜性之。合下便恁地去。初無個頭。到湯武反之。早是有頭了。但其起處甚微。五伯則甚大。○又曰假之非利之之比。若要識得假與利。只看真與不真切。與不切。如好好色。如惡惡臭。正是利之之事也。道夫云安仁便是性之。利仁便是反之。假之之規模。自與此別。曰不干涉。如勉強而行。亦非此比。安利

勉強皆是真切。但有熟有不熟耳。項之歎曰。天下事誰不恁地。且如漢祖三軍縞素。為義帝發喪。他何嘗知所謂君臣之義所當然者。但受教三老。假此以為名而濟其欲耳。問如夫子稱管仲如其仁。也是假字上說來否。曰他只是言其有仁之功。未說到那假字上。且如孺子入井。有一人取得出來。人且稱其仁。亦未說到那納交要譽惡其聲。而然道夫問如此說。則如字如何解。曰此直深許其有仁耳。道夫云假之之事。真所謂幽沉仁義。非獨為害當時。又且流毒後世。曰此孟子所以不道桓文而卑管仲也。且如興滅繼絕。誅殘除暴。懷諸侯而尊周室。百般好事他都做。只是無惻隱之誠心。他本欲他事之行。又恰有這題目入得。故不得不舉行。道夫云此邵子所以有功之首罪之魁之論。曰他合下便是恁地。



**大全** 朱子曰性是自然有底身是從身上做得來底湯武固皆身之但細觀其書湯身之功恐更精密湯有慙德如武王恐未必有此意理固如是然此處湯武不分優劣○新安陳氏曰孟子論堯舜湯武曰堯舜性者也湯武反之也與此章為二而互相發明反之即復其性也論五伯者不一莫切於假之一辭曰以力假仁者伯與此章為三乃是以一字斷盡五伯心事得春秋以一字為褒貶與誅心之法者也

**久假而不歸惡知其非有也**


歸還也有實有也言竊其名以終身而不自知其非真有或曰蓋歎世人莫覺其偽者亦通按文集五伯假之至于功施當時名顯其非真有哉孟子之言蓋疾矯偽之亂真傷時人之易惑而非子五伯之辭也此即集註第二說朱子嘗以此商之蔡季通欲如此入註而終未定者舊說久假不歸即為真有則誤矣語類問久假然不如前說之當非有舊解多謂使其能久假而不歸惡知終非其有曰○尹氏曰諸家多如此說遂引惹得司馬溫公東坡來闢孟子

性之者與道一也身之者履之也及其成功則一也五霸則假之而已是以功烈如彼其卑也

**語類** 或問仁人心也若假借為之焉能有諸已哉而孟子却云五

伯久假而不歸惡知其非有何也曰此最難說前輩多有辨之者然卒不得其說惡知二字為五伯設也如云五伯自不知也五伯久假而不歸安知其亦非已有也○問假之之事如責楚包茅不貢與夫初命三命之類否曰他從頭都是無一事不是如齊桓公尚自白直恁地假將去至晉文公做了千般蹉跌所以夫子有正誦之論

**大全** 慶源輔氏曰其初不過以之欺人而其終遂至以之自欺○雲峯胡氏曰性之者自然而然而然身之者當然而然假之者似然而寔不然自然者所性而有當然者能復其有似然者不自知其非真有





○公孫丑曰伊尹曰予不狎於不順放太甲於桐民大悅太甲賢又反之民大悅

予不狎於不順太甲篇文書太甲篇伊尹曰茲乃不義習與性成子弗狎于弗順營于桐宮密邇先王其訓無俾世迷王祖桐宮居憂克終允德惟三祀十有二月朔伊尹以冕服奉鬯王歸于亳狎習見也不順言太甲所為不順義理也言不欲習見其如此餘見前篇

賢者之為人臣也其君不賢則固可放與孟子曰有伊尹之志則可無伊尹之志則篡也

伊尹之志公天下以為心而無一毫之私者也慶源輔氏曰公天下以為心豈一朝夕勉強所能為哉非道全德備其素行有以信于人至誠有以通于天者不能也據或問駁楊氏之說不重素行上  
**或問** ○曰程子之說曲折詳盡其處義精矣精義程子曰伊尹受湯之委寄必期天下安治而已太甲始終不惠可廢也孟子言貴戚之卿與此同然則始何不擇賢蓋外丙二歲仲壬四歲惟太甲長耳使太甲有下愚

之質初不立也苟無三人必擇於宗室宗室無人必擇於湯之近戚近戚無人必擇于天下之賢者而與之伊尹不自為也劉備托孔明以嗣子不可使自為之非權數之言其利害昭然也立者非其人則劉氏必為曹氏屠戮寧使孔明為之也霍光廢昌邑不待放知其下愚不移也始之不擇則光之罪天矣若尹與光是太甲昌邑所用之臣不受先王之委寄而諫不用則去之可也放廢之事不可為也楊氏以伊尹惟知有忠者亦為得之楊曰伊尹所以義理自昭然惟知忠而已所以能為放太甲之事然如此而天下不疑者誠意素著故也因問孟子云有伊尹之志則可後世之為人臣者不幸而適遇此事而有伊尹之志不知行得否若行不得是伊尹之事不可法於後也曰若有伊尹之志其素行足信何為不可但觀蜀先主當時以其子屬諸葛孔明曰嗣子可輔輔之如不可輔君自取之備死孔明操一國之權當時軍國大務人才進退惟孔明是聽而蜀之人亦莫之疑也蓋孔明自非篡弒之人其素行足信也若如司馬懿其誰信之伊尹之事自後世觀之以為異其寔亦所謂中道然孟子但論在我者有是心則伊尹之事可為一有毫髮之偽雜乎其間則不免為篡弒耳不以素行之著不著天下之疑不疑為可否也其曰中道者則善雖不重素行然至誠亦自素行發出素行槩舉終身而言自躬耕樂



道大而干駟萬鍾不顧不受小而一介取與不苟故遇湯之聖主能伐夏救民遇太甲之弗順能至誠感格但就事論事只重至誠當下立說不重推原素行耳

**大全**南軒張氏曰伊尹之事志存乎宗祀變而得其正者也方是時太甲在諒陰故徙之先王墓側使之動心忍性而深思焉是伊尹以豕宰攝政而太甲居憂於桐耳太甲克終允德則於練除之際奉而歸亳焉其克終雖由其自怨艾以改過實亦尹之至誠有以感格之無尹之志徒以君不賢而放之是篡亂之所為耳後世惟霍光放昌邑王賀而立宣庶幾乎心存宗祀者然始也建立之不審而至誠敦篤又不加焉其于尹之志蓋有愧也是以嚴延年劾之以為擅廢立無人臣禮而識者有取焉霍光且爾况他人本為一身利害計者乎所謂元惡大憝必誅而無赦者也○覺軒張氏曰孟子此兩語不惟見伊尹之心如青天白日而百世之下奸臣亂賊亦無所逃其罪矣味則可之辭亦見處變僅可之意而非正法也

○公孫丑曰詩曰不素餐兮君子之不耕而食何也孟子曰君子居是國也其君用之則安富尊榮其子弟從之則孝弟忠信不素餐兮孰大於是

詩魏國風伐檀之篇詩人美賢者厲志非其力不食故述其事而歎之其首章曰坎坎伐檀兮置之河之干兮河水清且漣漪不稼不穡胡取禾三百廛兮不狩不獵胡瞻爾庭有縣貆兮彼君子兮不素餐兮素空也無功而食祿謂之素餐此與陳相彭更之意同

**精義**尹曰不素餐兮刺無功而受祿之詩也其君安富尊榮子弟孝弟忠信則有功也孰若南軒張氏曰伐檀之詩非必欲君子稼穡而後食也公孫丑許行之徒之論矣故孟子告之以不素餐之大者夫君子仁義修乎身居是國也其君用之則安富尊榮如其未用此句可刪子弟從之則亦薰陶乎孝弟忠信之習而足以善俗若夫飾小廉而妨大德猶未流而忘正義非君子之道也四句總見君子之有功於人國不當以用不用分配○朱氏公遷曰仕不受祿與不受萬鍾則義之中有見後之智孟子之于齊宋薛子思之于魯繆公則義之中見交際之禮傳食諸侯一章則言人之有功者我當食於人主於食人者而言也○不素餐兮一章則言食於人者必有功於人主於食人之食者而言也○是皆孟子自道之辭所以解門人之惑者如此皆因論辭受而見處物之義萬章問交際章亦兼辭受之義與交際之禮

盡心上 五十五



○王子墊問曰士何事

墊齊王之子也。上則公卿大夫，下則農工商賈，皆有所事。而士居其間，獨無所事。故王子問之也。

**或問** ○曰：范氏詳而盡矣，未詳但孟子之言，乃理之當然，非有為而

孟子曰尚志

尚，高尚也。志者，心之所之也。士既未得行公卿大夫之道，又不當為農工商賈之業，則高尚其志而已。

**文集** 潘謙之尚王子墊以人之為士，下既不為農工商賈之事，上位以行道，而其志之所尚，則有仁義焉。曰：尚志之說甚善，此志字與父在觀其志之志同，未見於所行方見其所存也。

曰：何謂尚志？曰：仁義而已矣。殺一無罪，非仁也；非其有而取之，非義也。居惡在？仁是也；路惡在？義是也。居仁由義，大人之事備矣。

非仁非義之事雖小不為，而所居所由無不在於仁義。此士所以尚其志也。大人謂公卿大夫，言士雖未得大人之位，而其志如此，則大人之事體用已全。若小人之事，則固非所當為也。

**語類** 王子墊問士尚志一段，中間反覆說仁義二字，都有意須思量得。

**大全** 慶源輔氏曰：士雖未得位以行其道，而其志則須高尚方可。志于仁義，則高尚溺於利欲，則卑污。○南軒張氏曰：殺一無罪而非仁，由是而體之，則仁之所以能愛者，可得而推矣。非其有而取之為非義，由是而體之，則其義之所以為宜者，可得而推矣。居仁由義，居則不違，由則不他，居仁則體立，由義則用行。大人之事亦不越此而已。○新安陳氏曰：此章因王子問士何事，對以士志乎仁義，已備大人之事，蓋志者，事之本，未為者也。事者，志之用，有為者也。志之所尚，素高則事之大本已立，一旦得大人之位。



舉而措之耳。何必待有事迹可見。而後始謂之有所事哉。若農工商賈小人之事。不特非所當為。亦不屑為。且不暇為也。

○孟子曰仲子不義與之齊國而弗受人皆信之是舍簞食豆羹之義也人莫大焉亡親戚君臣上下以其小者信其大者奚可哉

仲子陳仲子也言仲子設若非義而與之齊國必不肯受齊人皆信其賢然此但小廉耳其辟兄離母不食君祿無人道之大倫罪莫大焉豈可以小廉信其大節而遂以為賢哉

**大全**

南軒張氏曰仲子節小廉而廢大倫其不知義已甚矣。慶源輔氏曰觀前篇所論仲子之事其介然自守如此則不義與之齊國必不肯受。此徇名而矯強者或能之。故孟子以為是特舍簞食豆羹之義而已。蓋未足以為賢也。若夫安于大倫使之各盡其道則非盡性而樂循理者不能。故孟子言此以曉齊人使之勿迷於小。而必察其大耳。○新安陳氏曰孟子于陳仲子其對匡章既深非之。此又深言之。二章當參看前篇止責其不成廉其辟兄離母不食君祿是為廢倫。未及責也。故此復責之。○朱氏公遷曰伊尹之一介不取予亦其義之合于聖人者故孟子稱之如此。若微生之與害於直仲子之操害于廉則皆不合於義者也是故

夫子以微事斷之。孟子以大節斷之。欲人以之為戒耳。皆因論人而見處物之義。比照未甚喫緊。尚小廉而廢大倫。註自斷得明透。無用他辭。

○桃應問曰舜為天子臯陶為士瞽瞍殺人則如之何

桃應孟子弟子也其意以為舜雖愛父而不可以私害公。臯陶雖執法而不可以刑天子之父。故設此問以觀聖賢用心之所極。非以為真有一事也。

孟子曰執之而已矣

言臯陶之心知有法而已。不知有天子之父也。

然則舜不禁與

桃應問也

曰夫舜惡得而禁之夫有所受之也



言臯陶之法有所傳受非所敢私雖天子之父亦不得而廢之也然則舜如之何

桃應問也

曰舜視棄天下猶棄敝屣也竊負而逃遵海濱而處終身訢然樂而忘天下

踐草履也遵循也言舜之心知有父而已不知有天下也孟子嘗言舜視天下猶草芥而惟順於父母可以解憂與此意互相發○此章言為士者但知有法而不知天子父之為尊為子者但知有父而不知天下之為大蓋其所以為心者莫非天理之極人倫之至雲峯胡氏曰臯陶但知有天子之法天理也君臣人倫之至也舜但知有父天理也父子人倫之至也學者察此而有得焉則不待較計論量而天下無難處之事矣

或問

○曰范氏所論得其大意

未詳

而楊氏之說則又詳矣

精義楊曰子讀

周世宗家人傳至守禮殺人世宗不問史氏以為知權子竊思之以為父子者一人之私恩法者天下之公義二者相為輕重不可偏舉也故恩勝義則誑法以伸恩義勝恩則掩恩以從法恩義輕重不足以相勝則兩盡其道而已此泛論常人亦可取着舜說便不可舜為天子瞽瞍殺人臯陶執之而不釋為舜者豈不能赦其父哉蓋殺人而釋之則廢法誅其父則傷恩其意若曰天下不可一日而無法人子亦不可以一日而忘其父民則不患乎無君也故寧與其執之以正天下之公義竊負而逃以伸己之私恩此舜所以兩全其道也方守禮殺人有司不能執之而徒以聞故世宗得而不問也有如臯陶者執之而不釋則雖欲不問得乎哉然世宗取天下於百戰之餘未易以舜之事望之也然則宜奈何亦置諸法而已矣法有八議而貴居其一焉為天子父可謂貴矣此禮律之通議也一置諸法而不傷焉何為不可哉○或問使舜不去位臯陶遂行法否曰此亦須自有法周禮人臣猶有議貴議親之辟豈有天子之父殺人便置之死且如周官八議豈是周公撰出亦須有個來處然孟子所說只是論舜心耳然桃應之問孟子之答皆非以為真有是事也蓋特相與極論聖賢之心以為臯陶知有法而不知有天子之父舜知有父而不知有天下各



盡其道而不相悖耳。而楊氏以為舜之於此猶待於權其輕重而計其不可以忘父也。則非所以論聖人之心矣。又謂與之執以正法。則何以異於楚人之直躬者。又謂既執而後竊負以逃焉。則臯陶之獄何以異於灞上棘門之軍哉。是皆以辭意之過。是以徒為紛紛而反病於理也。夫孟子之為此言。或者既不信之矣。指溫而公說而信之者。其為說又如此。則聖賢之心終亦何自而明哉。予于辨惑論之已詳。學者考之可也。文集溫公疑孟子之說。作寔事說。故余隱之辨之曰。桃應之問。乃設事耳。非謂已有是事也。桃應之意。蓋謂法者天下之大公。舜制法者也。臯陶守法者也。脫或舜之父殺人。則如之何。孟子答之曰。執之者。士之所當然也。舜不敢禁者。不以私恩廢天下之公法也。夫有所受云者。正如為將。闔外之權。則專之。君命有所不受。士之守法亦然。蓋以法者。先王之制。與天下公共。為之士者。受法于先王。非可為一人而私之。舜既不得私其父。將置之於法。則失為子之道。將置而不問。則廢天下之法。寧屏棄天下。願得竊負而逃。處於海濱。樂以終其身焉。更忘其為天子之貴也。當時固無是事故。既設為問目。

使孟子不答。則其理不明。孟子之意。謂天下之富。天下之貴。不能易事父之孝。遂答之以天下可忘而父不可暫舍。所以明父子之道也。其為名教。豈曰小補之哉。朱子曰。龜山先生嘗言。固無是事。此只是論舜心耳。愚謂執之而已矣。非洞見臯陶之心者。不能言也。此一章之義。見聖賢所處無所不用其極。所謂止於至善者也。隱之之辨。處專以父子之道為言。却是寔有此事。于義未瑩。按朱子此條。當為正論。下或問語類之說。皆作天下不聽舜竊負而逃說。此皆言外意。故特補錄此以存正意。曰。然則楊氏八議之說如何。曰。是則然矣。而其說施於周世宗。而不及於舜。何哉。向使臯陶必執而不釋。舜必去而不留。則朝廷公卿海內臣庶之心。吾知其亦必出於此矣。蓋法非天降地出。亦生於人情而已矣。但臯陶必不為此。以私於舜。舜亦不以此祈於臯陶。此又不可不知耳。楊氏後說。以為孟子只是論舜心者。為愈于前。然為舜慮而不及乎臯陶。則其說亦未周也。尹氏之說。雖約然極有味。學者宜深玩之。尹曰。聖人之心。至公。至當而已。大抵當知必有渾然天理。而超然不累。



於物之心者焉。則天下無難處之事矣。議貴之說言外斡旋孟子之說存此以備處事之方

則可若孟子本說下入此反為畫蛇添足

**語類**問瞽瞍殺人在臯陶則只知有法而不知有天子之父在舜

則只知有父而不知有天下此只是聖賢之心坦然直截當事主

一不要生枝節否曰孟子只是言聖賢之心耳聖賢之心合下是

如是權制有未暇論然到極不得已處亦須變而通之蓋法者天

下公其在臯陶亦只得執之而已若人心不許舜棄天下而去則

便是天心臯陶亦安能違天。此亦或問末層意與舜避位而朝觀訟獄謳歌皆來歸舜禹亦不得不來

就位一般法與理便即是人心底亦須是合下有如此底心方能為是

權制今人於事合下無如此底心其初便從權制去則不可○桃

應之問孟子之對楊氏有議貴之說如何曰使舜欲為天子又欲

免瞽瞍則生議貴之法矣。據此條朱子亦不主議貴之說

**大全**朱子曰某嘗問李先生以此事先生曰崩贖父子只是無此

心所以為法律所縛都轉動不得若舜之心則法律縛他不住終

身訢然樂而忘天下求仁得仁何怨之有。南軒張氏曰舜之有天下初不以天下與于已

循天理之當然而已為瞽瞍殺人而在其法則失天下之公若致舜於瞽瞍則廢父子之倫是皆雖有天下不可以一朝居者也舜

寧去天下而存此義耳舜非輕天下也義所當去視天下猶敝屣也

是故在臯陶則使舜得以伸其竊負之義在舜則以此而可以終身夫何求哉循天理而已善發明舜之心者其惟孟子乎若後

世以利害之見論之則謂天下方戴舜而賴其治舜乃去之得無廢成業而孤眾望乎若汨於利害而失天理之所在雖舜亦何以

治天下哉下即楊氏之說或問已闢之不可復從或者以為臯陶既執瞽瞍舜烏得而竊之蓋未之思也臯陶既執瞽瞍于前而使

舜得以伸其竊負之義於後是乃天理時中全君臣父子之倫者也微孟子執能推之○汪氏曰竊負而逃畏天故也訢然而樂樂

天故也孟子之對示後世為人臣子之道而已以天子之父殺人且不可舍况其卑者乎以天下之大且可棄况其小者乎



孟子通考卷之三十三  
○孟子自范之齊望見齊王之子喟然歎曰居移氣養移體大哉居乎夫非盡人之子與

范齊邑居謂所處之位養奉養也言人之居處所係甚大。大哉居。關於氣。王子亦人子耳。特以所居不同故所養不同。而其氣體有異也。

**語類**問孟子言居移氣養移體後却只論居不論養豈非居能移人之氣亦如養之能移人之體乎曰有是居則有是養居公卿則自有公卿底奉養居貧賤則自有貧賤底奉養言居則養在其中

孟子曰

張鄒皆云美文也

王子宮室車馬衣服多與人同而王子若彼者其居使之然也况居

天下之廣居者乎

廣居見前篇尹氏曰睟然見於面盎於背居天下之廣居者然也

**大全**

新安陳氏曰居仁宅者之氣象必德潤身而心廣體胖與王子特借景感觸耳非羨慕王子也但勢位之居尚移氣移體如此居廣居者益可知矣

魯君之宋呼於埳澤之門守者曰此非吾君也何其聲之似我君也此無他居相似也

埳澤宋城門名也孟子又引此事為証新安陳氏曰引魯君事為証証王子也然居廣居意

亦自見於言外

**大全**

南軒張氏曰居天下之廣居宅乎天理者也宅之之久則其氣質變化有不期然而然者矣夫聖賢相去雖有先後而玩其氣象如出一人者以其所居之同故也○新安陳氏曰此章重在居廣居一句勢位之居猶足移氣與賤者異廣居之居其能充吾正氣而與常人異也必矣按周禮有候人之役凡賓客往來且為之道况魯君乎此必別有呼召守者聞之而云然非必魯君自



呼門而使之啟也。直作魯君自呼。未免近俗。蓋發號施令。呵護傳呼。聲氣相類。事或有之。此說近雅宜從。

○孟子曰食而弗愛豕交之也愛而不敬獸畜之也

交接也畜養也獸謂犬馬之屬

恭敬者幣之未將者也

將猶奉也詩曰承筐是將小雅鹿鳴篇程子曰恭敬雖因威儀幣帛而後發見然幣之未將時已有此恭敬之心非因幣帛而後有也

恭敬而無實君子不可虛拘

此言當時諸侯之待賢者特以幣帛為恭敬而無其實也實指愛敬言

拘留也慶源輔氏曰世衰道微在上者皆不知有恭敬待賢之誠而惟恃其有幣帛之聘在下者惟知有幣帛之可慕而不知察夫上之人所以待之之誠上下之情交驚於利而不知有義理焉故孟子發此論以警之○東陽許氏曰恭敬者之恭敬以發於心者言恭敬而無實之恭敬以幣帛言

精義 尹曰苟無其實是偽恭敬而已何足以留君子

○孟子曰形色天性也惟聖人然後可以踐形

人之有形有色無不各有自然之理所謂天性也踐如踐言之踐

禮記曲禮修身踐言謂之善行○語類問形色曰有這形便自有這色所以下文只說踐形蓋色便在形裏面色猶言容貌也○敬

之問形色天性形是耳目口鼻之類色是如何曰一頓一笑一語一默皆有至理形字重色字輕故下面但云惟聖人然後可以踐

形直卿云形是動容貌色是正顏色曰固是問色字如何曰有形便有有色如動容周旋中禮則色自正如祭則必有敬之色臨喪則

必有哀之色故蓋衆人有是形而不能盡其理故無以踐其形惟

聖人有是形而又能盡其理然後可以踐其形而無歉也程氏復

誠盡性充其形程子曰此言聖人盡得人道盡人道包得五而

能充其形也蓋人得天地之正氣而生與萬物不同既為人須盡

得人理然後稱其名衆人有之而不知賢人踐之而未盡能充其



形惟聖人也。文集曰人皆有是形。便有是理。性即理之謂也。然衆人有是形而不能全其形之理。故有形雖是人而心實禽獸。是不足以踐其形矣。惟聖人能全其形之理。故可以踐其形也。伊川先生所以充人之形。充字極分明。○新安陳氏曰程子之說。蓋自踐字推廣之。衆人全不能踐者也。賢人雖能踐之而未盡者也。聖人則極能踐之。而無不盡者也。如洪範五事。則貌言視聽思極於蕭又哲謀。聖皆踐形之意也。楊氏曰天生蒸民。有物有則。物者形色也。則者性也。各盡其則。則可以踐形矣。

**或問**踐形之說曰人之生於天地之間也。莫不有形。其有是形也。莫不有色。而本其所得於天者。則是形是色。莫不有所以然之故焉。莫不有所當然之則焉。是則所謂天性者也。然衆人梏於氣稟之偏。狃於習俗之蔽。而不能無人欲之私。是以視則不明。聽則不聰。貌則不恭。言則不從。蓋不能盡其形色本然之理。則雖有是形。而無以踐其形也。惟聖人能盡其性。而無一毫人欲之私。雜于其

間。是以視則極明。聽則極聰。貌則極恭。言則極從。蓋凡形色本然之理。無一不盡。既有是形。而又可以踐其形焉。踐形者。本有是物。而又能修其寔。以副之。如踐言之踐也。程子張子游楊尹氏。蓋皆

此意。精義程子曰惟聖人可以踐形者。人生稟五行秀氣。頭圓足方。以肖天地。則形色天性也。惟聖人爲能盡人之道。故可以踐形。人道者。君臣父子夫婦兄弟之類皆是也。此兼五倫說。更完備。又曰形色性所有也。聖人人倫之至。故可以踐形。○游曰形者性之質也。能盡其性。則踐其形。而無愧矣。蓋萬物皆備於我。則其所有。何物不備。反身而誠。樂莫大焉。爲其能盡性而踐形也。若反身而未至於誠。則是於性有所不盡。未能盡性。則於質有所不充矣。故曰惟聖人然後可以踐形。箕子曰視曰明。聽曰聰。視謂之明。聽謂之聰。皆耳目之本然也。能盡其視聽之性。則能踐耳目之形。苟視聽不足於聰明。則是有耳目之形。而無視聽之實德也。豈不慊於形哉。此即衆人有之而不知者。楊子曰聖人耳不順乎非。口不隸乎不善。若非禮勿聽。非禮勿言。則於口耳猶有所擇。是未足以踐形。此即賢人踐之而未盡者。○楊曰莫非形也。自聖人言之。目之所視。耳之所聽。以至口之所言。身之所動。不待着意。莫不合則。所謂動容周旋中禮者也。未至於聖。則未免有克焉。若孔子告顏淵非禮勿視等語是也。故曰惟聖人然後可以踐形。



**語類**形色上便有天性。視便有視之禮。聽便有聽之禮。○踐形是有這個物事。腳踏着不闕了他個。有是形便有是理。盡得這個理便是踐得這個形。耳目本有這個聰明。若不盡其聰明時便是闕了這個影。不皆踐得。○論踐形云天生形色便有本來天理在內。賢人踐之而未盡。聖人則步步踏着路來也。○人之有形有色無不各有自然之理。所謂天理也。惟聖人能盡其性。故即形即色無非自然之理。所以人皆有是形。而必聖人然後可以踐其形。而無歉也。伊川以為充人之形是也。○盡性性有仁。須盡得仁。有義須盡得義。無一些欠闕。方是盡。踐形人有形。形必有性。耳形也。必盡其聰。然後能踐耳之形。目形也。必盡其明。然後能盡目之形。盡性踐形只是一事。○蜚卿問既是聖人如何却方可以踐形。曰踐

如掩覆得過底模樣。如伊川說充其形色。自是說得好了。形只是這形體。色如臨喪則有哀色。介冑則有不可犯之色。之類。天之生人人之得於天。其具耳目口鼻者。莫不皆有此理。耳便必當無有不聰。目便必當無有不明。口便必當盡別天下之味。鼻便必當盡別天下之臭。聖人與常人都一般。惟衆人有氣稟之雜。物欲之累。雖同是耳也。而不足於聰。雖同是目也。而不足於明。雖同是口鼻也。而不足以別臭味。是雖有是形。惟其不足。故不能充踐此形。惟聖人耳則十分聰。而無一毫之不聰。目則十分明。而無一毫之不。明。以至於口鼻。莫不皆然。惟聖人如此。方可以踐此形。惟衆人如彼。自不可以踐此形。

**大全**

潛室陳氏曰聖人盡性地位。方償得他本來形色。學未至於聖人。則於性分道理。未免虧欠。才於性分有虧欠。即是空具



此形色不能充踐滿足也。○問孟子曰形色天性也。告子曰食色性也。二者之分如何。曰形色為性是引氣入道理中。來食色為性是逐道理。出形氣外。去霄壤之分。

○齊宣王欲短喪公孫丑曰為甚之喪猶愈於已乎

已猶止也。新安陳氏曰丑附其說謂三年短而為甚猶勝於止而不為者乎。

孟子曰是猶或紵其兄之臂子謂之姑徐徐云爾亦教之孝弟而已矣

紵戾也。教之以孝弟之道則彼當自知兄之不可戾而喪之不可短矣。孔子曰子生三年然後免於父母之懷。子也有三年之愛於其父母乎。所謂教之以孝弟者如此。蓋示之以至情之不能已者。非強之也。

王子有其母死者其傅為之請數月之喪公孫丑曰若此者何如也

陳氏曰王子所生之母死。厭於嫡母而不敢終喪。其傅為請於王。欲使得行數月之喪也。大功九月。小功五月。時又適有此事。丑問如此者。是非何如。按儀禮公子為其母練冠麻衣。縗緣既葬除之。

其母練冠麻衣。縗緣為其妻練冠。葛經帶麻衣。縗緣皆既葬除之。疑當時此禮已廢。或既葬而未忍即除。故請之也。

曰是欲終之而不可得也。雖加一日。愈於已。謂夫莫之禁而弗為者也。

言王子欲終喪而不可得。其傅為請。雖止得加一日。猶勝不加我前所譏。乃謂夫莫之禁而自不為者耳。○此章言三年通喪。天經地義。不容私意有所短長。示之至情。人心天理之真切處。則不肖者有以企而及之矣。



**精義**

尹曰三年之喪天下之通喪聖人制禮其可改乎。

○孟子曰君子之所以教者五

下文五者蓋因人品高下或相去遠近先後之不同。慶源輔氏曰如時雨化品之高者成德達財其次也。答問下者也。私淑艾有同時而相去或遠不同時而其生也後不能及門受業者也。

**語類**

或問君子之所以教者諸先生說得如何曰諸先生不曾說

得分明曾子學到孔子田地故孔子與他說一貫之道此所謂如時雨化之者也。時雨化者不先不後適當其時而已。成德如冉雍閔子騫者是也。達財如冉求季路是也。答問如孟子於公孫丑萬章之徒是也。有私淑艾者此言為不曾親聖人者設也。彼雖不曾承聖人之誨私得於善治孔子之道者亦足以發也。故又在答問之下。數語未瑩按私淑艾只當着學者私取於人以善治其身不着彼人說雖序在答問之下不可謂人品之下以其未及親

受業於君子之門故序在後耳。如後兩証陳亢夷之固是下者若孟子則在顏曾之列而所處更有難焉者。

有如時雨化之者

時雨及時之雨也。草木之生播種封植人力已至而未能自化。所少者雨露之滋耳。及此時而雨之則其化速矣。教人之妙亦猶是也。若孔子之於顏曾是已。新安陳氏曰惟人力已至而後時雨可施。使他弟子而遽以是告之是猶種植之力未至雖有時雨不能速化也。

**精義**

張子曰有如時雨化之者當其可乘其間而施之不待彼有求有為而後教之也。如天之雨豈待望而後雨但時可雨而

有成德者有達財者

財與材同此各因其所長而教之者也。成德如孔子之於冉閔。達財如孔子之於由賜。朱子曰成德成就其德如孔子於冉閔德則天資純粹者達財通達其材如孔子於由賜



孟子通考卷十三  
才是明敏者。答問則早費言語私淑艾却是不曾及門。聞風而善者。○雲峯胡氏曰孔門四科。顏曾冉閔皆以德行稱。孟子五教集註則以夫子之於冉閔為成德而顏曾為時雨之化。何也。蓋自顏曾以下皆在夫子教之中。而顏曾二子。獨得夫子化之之妙也。  
**精義** 程子曰在易坎之六四曰樽酒簋二。獨得夫子化之之妙也。進結於君之道。自牖言自通明之處也。人臣以忠信善道結於君心。必自其所明處告之。取信則易也。教人亦然。夫教必就人之所長。所長者心之明也。從其心之所明而入。然後推及其餘。孟子所謂成德達財也。

### 有答問者

就所問而答之。若孔孟之於樊遲萬章也。慶源輔氏曰樊遲之粗必候其問而後告教之是也。

**大全** 南軒張氏曰成德達財。答問固在其中。而又有所謂答問者。此則專為凡答其來問者也。雖鄙夫之空空。所以答之者。亦無非竭兩端之教也。

### 有私淑艾者

私竊也。淑善也。艾治也。朱子曰艾讀為艾。說文云艾草也。從人左。右。艾草之狀。故六書為指事之屬。自艾淑艾皆有斬絕自新之意。意懲艾創艾亦取諸此。人或不能及門受業。但聞君子之道於人而竊以善治其身。是亦君子教誨之所及。若孔孟之於陳亢夷之是也。孟子亦曰予未得為孔子徒也。予私淑諸人也。

**語類** 伯豐問私淑艾如何。曰孟子所謂予未得為孔子徒也。予私淑諸人也。此人者是孟子指其師布子思之類。以謂予不得親見孔子而師之。只是我私竊傳其善於人。此重人自取益邊。如有私淑艾者。却是君子所以教者五。此重君子之教邊。然亦有次序。有如時雨化之者。他地位已到。因而發之。孔子於顏曾是也。其次成德達財。又隨人資質成就。有答問者。未及師承。只是來相答問而已。前註以樊遲也。師承也。私淑艾者。未嘗親見面授。只是或聞其風而思慕之。或私竊

也。



傳其善言善行學之以善於其身。是亦君子之教誨也。橫渠集中有祭文云。私淑祖考之遺訓。說得文義却順。

此五者君子之所以教也

聖賢施教各因其材。小以成小。大以成大。無棄人也。趙氏曰君子之教人。如天

地之生物。各因其材而篤焉。天地無棄物。聖賢無棄人。

**精義** 尹曰君子之教各因其材而誨之。是亦不倦之意。

○公孫丑曰道則高矣美矣宜若登天然似不可及也何不使彼為可幾及而日孳孳也

孟子曰大匠不為拙工改廢繩墨羿不為拙射變其彀率

彀率。彎弓之限也。言教人者皆有不可易之法。不容自貶以徇學者之不能也。

君子引而不發躍如也中道而立能者從之

引引弓也發發矢也躍如如踴躍而出也。朱子曰君子引而不發躍如也。下三字屬君子

言雖引而不發。而其言意中躍躍然會動。如所謂活潑潑地也。及入解又云。躍躍然於動靜語默之間。躍如是道理活潑底發出在面前。如甲中躍出。又曰引而不廢。謂漸啟其端而不竟其說。躍如謂義理昭著。如有物躍然於心目之間。因上文彀

率而言君子教人。但授以學之之法。而不告以得之之妙。如射者之引弓而不發矢。然其所不告者。已如踴躍而見於前矣。中者無

過不及之謂中道。而立言其非難非易。能者從之。言學者當自勉也。○此章言道有定體。教有成法。卑不可抗。高不可貶。語不能顯

默。不能藏。雲峯胡氏曰道有定體。故卑不可抗。高不可貶。是之謂中道。而立教有成法。故語不能顯。默不能藏。而在乎人之能者從之。○新安陳氏曰道有定體。謂中道而立。教有成法。謂繩墨彀率。卑者不可抗之使高。高者不可貶之使卑。申言道有定體也。雖語有不能顯者。謂引而不發。雖默有不能藏者。謂躍如也。熟玩索之。有無窮之妙。



孟子通考卷十三  
**語類**君子引而不發躍如也。須知得是引個甚麼。是怎生地不發。又是怎麼物事躍在面前。須是聳起這心與他看。教此心精一。無些子夾雜。方見得他那精微妙處。又曰道理散在天下事物之間。聖賢也不是不說。然也全說不得。自是那妙處不容說。然雖不說。只纔挑動那頭了時。那個物事自跌落在面前。如張弓十分滿而不發箭。雖不發箭。然已知得真個是中這物事了。須是精一其心。無些子他慮夾雜。方看得出。○引而不發躍如也。與舉一隅不以三隅反同意否。曰這般有問答處儘好看。這也得恁地問。便恁地答。最是酬酢處見意思。且自去看。○或問范謂君子之射。引而不發。以待穀與的之相偶。心欲必中。故躍如也。此說如何。曰范氏此說最好笑。豈有君子之射。常引而不發者乎。只管引而不發。却成

甚射也。引而不發之語。只緣上文說射。故有此語。此只是言君子之教人。但開其端以示人而已。其中自有個躍如底道理。學者須是識得這個道理。方知君子教人爲甚忠。故下文中道而立能者從之。

**大全**南軒張氏曰。聖人之道。天下之正理。不可過。不可不及也。自卑者視之。以爲甚高。而不知其高之甚中也。自隘者視之。以爲甚大。而不知其大之爲常也。猶彼而遷就。則非所以爲道矣。能與不能。則存乎其人耳。中道而立能者從之。此正大之體。而天地之情也。學者循繩墨。穀率而勿舍焉。及其久也。將自有得。不然。所獲助長。爲害甚矣。○汪氏曰。君子雖不貳道以殉人。然亦未嘗離人絕物。而使

人不可幾及也。  
○孟子曰。天下有道。以道殉身。天下無道。以身殉道。

殉。如殉葬之殉。以死隨物之名也。身出則道在必行。道屈則身在必退。以死相從而不離也。



孟子通考卷十三

**大全**

趙氏曰道弗可離也。雖時有治亂。已有窮達。非道殉身。卽身殉道。以死相從。豈可得而離哉。

未聞以道殉乎人者也

新安陳氏曰妾婦以順從爲道。故亦曰道。孟子見有身徒顯而道不行。道不行而身猶不知隱者。故發此論。言當隨時之理。亂而酌身之進退。非道殉身。則身殉道。身與道不可須臾離也。使道不殉身。身不殉道。卽是以道殉乎人矣。

**或問**

○曰張子初說於文義盡之矣。

精義張子曰天下有道。道隨身出。天下無道。身隨道屈。

其後一說。則所以明雖天下之有道。而不求身之必顯也。范氏引

守死善道。得殉字之義矣。其論人君用人之法亦甚善。至謂以道

殉人者。雖得之無所用。則尤切中於事理矣。范曰君子遭世之治

澤加於民。故以道從身。遭世之亂。則身隱而道不行。不得志修身

見於世。故以身從道。以道殉乎人者。陳氏所謂枉尺而直尋也。古

之聖賢。以道殉身。伊尹周公是也。以身殉道。孔子孟子是也。君子

窮達不離乎道。道可以處。則處。道可以出。則出。故人君用人。不用

其身。惟用其道。以道殉人者。雖得之。無所用也。

**大全**

南軒張氏曰身與道不可離也。以道殉人。則是可離矣。烏有所謂道哉。

○公都子曰滕更之在門也。若在所禮。而不答何也

趙氏曰滕更滕君之弟來學者也。

孟子曰挾貴而問挾賢而問。挾長而問。挾有勲勞而問。挾故而問。皆

所不答也。滕更有二焉。

趙氏曰二。謂挾貴挾賢也。尹氏曰有所挾。則受道之心不專。所以

不答也。新安陳氏曰挾者兼有而恃之之稱。勲勞已嘗有。功勞於

師。故謂已與師有故。舊好恃此以來學。望師待以異意。而

教之。皆所不當答。○此言君子雖誨人不倦。又惡夫意之不誠者。

**大全**南軒張氏曰受道者。以虛心爲本。則能受有所挾。則私意先

橫於中。而不能入矣。故空空之鄙夫。聖人亦竭兩端之教。而

滕更挾二。故不答也。使能思所以不答之故。於所挾致力以消之。

是亦誨之矣。○慶源輔氏曰學者之心。須是專一。方有受教之地。



有所挾。則  
二三也。

○孟子曰於不可已而已者無所不已於所厚者薄無所不薄也

已止也。不可止謂所不得不為者也。所厚所當厚者也。朱子曰厚薄是以家

國對言之。此處厚薄。泛言活看為是。不必如大學鑿定以家國分也。○又曰所厚謂父子兄弟骨肉之恩。理之所當然而人之所不能已者。入之不能已。不必貫合上條。

說須善會之。只當以處事接物對看。此言不及者之弊。

其進銳者其退速

進銳者用心太過。其氣易衰。故退速。○三者之弊。理勢必然。雖過

不及之不同。然卒同歸於廢弛。雲峯胡氏曰前二者是當用心而不用心之弊。後一者是過用其心

之弊。不用其心。固宜廢弛。過用其心者。亦同歸於廢弛。過猶不及也。

**語類**進銳退速。其病正在意氣方盛之時。已有易衰之勢。不待意

氣已衰之後。然後見其失也。

大全

勿軒熊氏口前二句。則見之處事接物之間。後一句。則本於立心講學之際。○慶源輔氏曰不及者之弊。則愈見其不及

流於欲者之所為也。過者之弊。則其退也可立而待。役於氣者之所為也。欲肆則無極。氣過則易衰。循理而行。則有漸而可繼也。此

是推原其所以然。亦分得不甚清楚的當。只當以過不及。分不當以氣稟物欲分。

○孟子曰君子之於物也愛之而弗仁於民也仁之而弗親親而

仁民仁民而愛物

物。謂禽獸草木。愛謂取之有時。用之有節。新安陳氏曰當取則取。但不過取而有時。當用

則用。但不過用而有節。○仁山金氏曰集註草木禽獸皆舉之。取之有時。用之有節。此先王愛物之政也。若釋氏雖例以不殺為愛

物。然知施於動物。而不知施於植物。此之謂不知類。况滅絕親親之倫。此之謂不知本。墨氏猶愛無差等。釋氏則又倒行逆施矣。

程子曰仁推已及物。此正訓仁字。以體而言。推字輕看。以已所如。有推行出去耳。章內四仁字。皆以用而言。如

老吾老以及人之老。於民則可於物則不可。統而言之則皆仁。分

而言之則有序。慶源輔氏曰統而言之。則皆自吾一性之仁。分而

孟子述朱大全卷十三  
盡心上



之序。有由之而不知者。有得於此而失於彼者。又有倒行逆施。雜亂無次者。要當因聖賢之言。反求之心。涵養於未發之前。體察於已發之後。學者用功當如此。可與遠庖廚節祭。看毋惑於異端。毋汨於私欲。然後是聖賢工夫。楊氏曰其分不同。故所施不能無差等。所謂理一而分殊者也。西山真氏曰。凡生於天地間者。莫非天地之子。而吾之同氣者也。是之謂理一。然親者吾之同體。民者吾之同類。而物則異類矣。是之謂分殊。故仁愛之施則有差。尹氏曰。何以有差等。一本故也。無偽也。尹氏上文云。于物則愛之。于民則仁之。于親則親之。此之謂差等。此合夷子章來論斷。此為一本無偽。彼為二本而偽矣。

**或問** ○曰程子張子至矣。楊氏推明所以論西銘之意甚善。楊氏論西銘言河南先生曰。理一而分殊。知其理一。所以為仁。知其分殊。所以為義。其分不同。故所施不能無差等。或曰。如是則體用果離而為二矣。曰。用未嘗離體也。且以一身觀之。四體百骸皆具。所謂體也。至其用處。則屢不可加之於首。冠不可納之於足。則即體而言。分在其。其答程子書時未及此也。豈其晚年所見始益精詣也與。尹氏一本無偽之說亦善。

**大全** 朱氏祖義曰。不以待人者施之物。以其有貴賤之分也。不以待親者施之他人。以其有親疎之殺也。於無所不愛之中。而不失其貴賤親疎之差等。此聖人之仁。所以歷萬世而無弊也。○新安陳氏曰。暴殄者。固非愛物矣。梁武之宗廟不用犧牲。亦非愛物之宜。蓋愛之而仁。是以仁民者。仁物也。無怪其於民。反不仁也。墨氏之愛無差等。施由親始。亦非仁民之宜。蓋仁之而親。是以親親者。親民也。無怪其無父。而於親反不親也。是皆倒行逆施之道。無次序。無差等。非仁矣。○朱氏公遷曰。愛親是愛之所由立。愛人愛物是愛之所由施。皆偏言之仁也。○東陽許氏曰。愛之而弗仁之愛。愛惜之義。不輕用物。不暴殄天物之意。仁民之仁。乃愛之本義。親又重於仁。

○孟子曰。知者無不知也。當務之為急。仁者無不愛也。急親賢之為務。堯舜之知而不徧物。急先務也。堯舜之仁不徧愛人。急親賢也。

知者固無不知。然常以所當務者為急。則事無不治。而其為知也大矣。仁者固無不愛。然常急於親賢。則恩無不洽。而其為仁也博矣。



**語類**知者無不知也問知在先否曰也是如此亦不專如此固是用知得審若知不審以賢為否以否為賢少間那仁上便安頓不着此將仁智交互看非正旨也○正淳問急先務一段如何曰人人各有當務之急或勞心或勞力勞心者治人勞力者治於人此各有所急也堯以不得舜為已憂舜以不得禹臯陶為已憂此聖人之所急也此只作急先務項下說上好禮則民莫敢不敬上好義則民莫敢不服上好信則民莫敢不用情若學圃學稼則是不急今人讀書中亦自有合着急處若是稍慢處理會未得也且放過不妨緊要處須着理會又問急親賢也急先務也治天下莫過於親賢知却隨時因事為之故不指言如舜之舉相去凶是舜之先務禹之治水是禹之先務何如曰大畧是如此下文云此之謂不知務須是

凡事都有輕重緩急如眼下修緝禮書固是合理會若只知有這一個都困了也不得又須知自有緊要處乃是當務又如孟子答今之樂猶古之樂這裏且要得他與百姓同樂是緊急若就這裏便與理會今樂非古樂便是不知務○問如舜舉臯陶湯舉伊尹所謂親賢者乃治天下者不易之務若當務之急是隨其時勢之不同堯之曆象治水舜之舉相去凶湯之伐夏救民皆所務之急者曰然

**大全**新安陳氏曰上四句言知仁之理下六句舉堯舜之知仁以實之○朱氏公遷曰博施濟眾者聖人之所病為天下得人者聖人之所能故曰堯舜之仁不偏愛人急親賢也

不能三年之喪而緦小功之察放飯流歠而問無齒決是之謂不知務



三年之喪服之重者也。總麻三月，小功五月，服之輕者也。察致詳也。放飯，大飯，流歠，長歡，不敬之大者也。齒決齧斷乾肉，不敬之小者也。曲禮曰：毋放飯，毋流歠。又曰：濡肉齒決，乾肉問，講求之意。○不齒決，濡濕也。宜齧斷之。乾肉堅，宜用手。此章言君子之於道，識其全體，則心不狹，知所先後，則事有序。胡氏曰：集註之意，以為識智之全體，則其用宜無所不知。識仁之全體，則其用宜無所不愛。然智之用，有當務之為急，仁之用，當急親賢之為務。故不識其全體者，知之不周，愛之不廣，狹用其心者，也。不知所先後，則知之雖周，而精神散於無用，愛之欲廣，而德澤壅於下流。泛用其心者也。輔氏以為識其全體，是言仁，知所先後，則為知，非集註意。豐氏曰：知不急於先務，雖徧知人之所知，徧能人之所能，徒做精神而無益於天下之治矣。仁不急於親賢，雖有仁民愛物之心，小人在位，無由下達，聰明日蔽於上，而惡政日加於下。此孟子所謂不知務也。

**語類**問是之謂不知務，却止說知不說仁，曰便是併與仁說，所謂

急親賢之為務，豈不為務乎？先生因推言學者亦有當務。如孟子論今樂古樂，則與民同樂，乃樂之本。學者所當知也。若欲明其聲音節奏，特樂之一事耳。又如修緝禮書，亦是學者之一事。學者須要窮其源本，放得大水下來，則如海潮之至，大船小船，莫不浮泛。若上面無水來，則大船小船，都動不得。如講學既能得其大者，則小小文義，自是該通。若只於淺處用功，則必不免沉滯之患矣。

**大全**南軒張氏曰：孟子所譬，特言舍大徇小者為不知務耳。非謂能三年之喪，則總小功有不足察。無放飯流歠，則齒決有不必問也。先後具舉，本末畢貫，此所以為道。此恐學者有偏滯之弊，故云然。非要人先後本末，其舉畢貫也。○新安陳氏曰：上文言智之知急務，仁之急親賢為務，乃智仁之大者。此取譬於喪服飲食，以議不能其大而求其細，非知務者也。不知務，是併結上文當務親賢為務二務字。○又曰：當務為急，與親賢為務相對，以臯謨能哲而惠及樊遲問仁，知章之意推之，謂智之所當務者，即是急親賢之為務。仁之所為，智之所知，亦儘可通。南軒即此說也。但孟子朱子之意，本不如此。蓋知所當務，所包甚濶，不可竟以親賢當知。



孟子 卷十四  
此章乃平論智仁。非  
論仁智相爲用也。

孟子 卷十四

盡心章句下

凡三十八章

孟子曰不仁哉梁惠王也仁者以其所愛及其所不愛不仁者以其所不愛及其所愛

親親而仁民仁民而愛物所謂以其所愛及其所不愛也。此補仁者正而

一層對照下節

公孫丑曰何謂也梁惠王以土地之故糜爛其民而戰之大敗將復之恐不能勝故驅其所愛子弟以殉之是之謂以其所不愛及其所愛也

梁惠王以下孟子答辭也糜爛其民使之戰鬪糜爛其血肉也復



之復戰也。子弟謂太子申也。即所謂東敗於齊長子死焉者。以土地之故及其民。

以民之故及其子。皆以其所不愛及其所愛也。○此承前篇之末。

三章之意。雲峯胡氏曰承所厚者薄。親親仁民仁者無不愛言。言仁人之恩自內及外。不仁

之禍由疏逮親。慶源輔氏曰仁人之恩自內以及外者。自本而推之也。惟其自本而推之。故雖無所不愛。而輕重等

差蓋不可紊也。不仁之禍由疏逮親者。猶欲而從流者也。惟其猶欲而從流。故橫放逆施。莫之紀極也。始也糜爛其民人。而殘賊其

子弟。終不至殺身覆族不已也。

**大全**南軒張氏曰仁者推其愛親者以愛人。不仁者以其忍於他人者忍於其親。仁與不仁之分其端甚微。而其流如此。

○孟子曰春秋無義戰。彼善於此則有之矣。

春秋每書諸侯戰伐之事。必加譏貶。以著其擅興之罪。無有以為

合於義而許之者。但就中彼善於此者。則有之。如召陵之師之類

是也。召陵說見論語齊桓章。○南軒張氏曰春秋無義戰。如齊桓公侵蔡伐楚。如晉文公城濮之戰。在當時其事雖若善。至於

不稟王命而擅用其師。則均為不義而已矣。○雲峯胡氏曰春秋書戰皆以著諸侯無王之罪。召陵之師。猶知假尊王之義。

征者上伐下也。敵國不相征也。

征所以正人也。諸侯有罪。則天子討而正之。此春秋所以無義戰

也。

**精義**尹曰征也者。王者之正天下也。春秋之際。敵國相殘耳。皆王者之罪人也。

**大全**新安陳氏曰春秋以道名分。使征伐自天子出。春秋不作矣。惟不自天子出而自諸侯出。春秋所以作也。無義戰三字斷

盡春秋諸侯兵爭之罪。

○孟子曰盡信書則不如無書。

程子曰載事之辭。容有重稱而過其實者。學者當識其義而已。苟

執於辭。則時或有害於義。不如無書之愈也。

吾於武成取二三策而已矣。



武成周書篇名武王伐紂歸而記事之書也

周書曰惟一月壬辰

王朝步自周於征伐商底商之罪告於皇天后土所過名山大川曰惟有道曾孫周王發將有大正於商今商王受無道暴殄天物害虐烝民為天下逋逃主萃淵藪予小子既獲仁人敢祗承上帝以遏亂畧華夏蠻貊罔不率俾惟爾有神尚克相予以濟兆民無作神羞既戊午師渡孟津癸亥陳於商郊俟天休明甲子昧爽受率其旅若林會於牧野罔有敵於我師前徒倒戈攻於後以北血流漂杵一戎衣天下大定乃反商政政由舊釋箕子囚封比于墓式商容間散鹿臺之財發鉅橋之粟大賚于四海而萬姓悅服策竹簡也取其二三策之言其餘不可盡信也程子曰取其奉天

伐暴之意反政施仁之法而已

下文又云雖曰其徒之自相攻不

辭忘義不獨施於書也

仁人無敵於天下以至仁伐至不仁而何其血之流杵也

杵春杵也

古人凡行兵之人須各携番鋪板杵之屬為營

或作鹵

楯也武成言武王伐紂紂之前徒倒戈攻於後以北血流漂杵孟

子言此則其不可信者然書本意乃謂商人自相殺非謂武王殺

之也孟子之設是言懼後世之惑且長不仁之心耳

設是言以下亦程子之說

**或問**武成血流漂杵之云乃紂之前徒倒戈之所為荀子以為殺

者皆殷人非周人者是也而孟子之不信何哉曰此亦拔本塞源

之論蓋雖殺者非我而亦不忍言也程子以為孟子設為是言蓋

得其微意矣張子教人讀詩書之說亦甚善

張子曰不以文害辭不以辭害意此教人

讀詩法也於武成取二三策而已此教人讀書法也

**語類**孟子說盡信書不如無書者只緣當時恁地戰鬪殘戮恐當

時人以此為口實故說此然血流漂杵看上文自說前徒倒戈攻

其後以北不是武王殺他乃紂之人自蹂踐相殺荀子云所以殺

之者非周人也商人也

即說商人亦大家要從仁人寧有不肯從者自相攻耶亦不可盡信蹂踐相殺事或



有之。

**文集**

李公常語曰孟子云云紂一人惡耶衆皆善而紂獨惡則去耶紂亡則逋逃者曷歸乎其欲拒周者又可數耶血流漂杵未足多也或曰前徒倒戈攻於後以故荀卿曰殺者皆殷人非周人也然則商人之不拒周也審矣曰如皆北也焉用攻又曰世人之好異也孔子非吾師乎衆言驩驩千徑百道幸存孔子吾得以求其是虞夏商周之書出於孔子其誰不知孟子一言人皆畔之畔之不已故今之人取孟子以斷六經矣嗚呼信孟子而不信六經是猶信他人而疑孟子也余隱之辨曰魯語曰俎豆之事則嘗聞之矣軍旋之事未之學也孔子之意可見矣客自問陶弘景註易與註本草孰先陶曰註易誤不至殺人註本草誤則有不得其死者世以為知言唐子西嘗曰弘景知本草而未知經註六草誤其禍疾而小註六經誤其禍遲而大前世儒臣引經誤國其禍至於伏屍百萬流血千里武成曰血流漂杵武王以此自多之辭當時倒戈攻後殺傷固多非止一處豈至血流漂杵乎孟子深慮戰國之君以此藉口故曰盡信書則不如無書而謂血流漂杵之言未足為多豈示訓之意哉經註之禍正此類也反以孟子為畔經是亦惑矣夏商周之書出於孔子人宜取信詩非孔子之刪乎雲漢之詩曰周餘黎民靡有子遺信斯言也則是周無遺民也請以此詩為證朱子曰此辨已得之無可議

者矣。

○孟子曰有人口我善為陳我善為戰大罪也

制行伍曰陳交兵曰戰以帝王之世律之大罪人也

國君好仁天下無敵焉南面而征北狄怨東面而征西夷怨曰奚為後我

此引湯之事以明之解見前篇

武王之伐殷也革車三百兩虎賁二千人

又以武王之事明之也兩車數一車兩輪也千書序作百

王曰無畏寧爾也非敵百姓也若崩厥角稽首

書秦誓文與此小異孟子之意當云王謂商人曰無畏我也我來伐紂本為安寧汝非敵商之百姓也於是商人稽首至地如角之



崩也

征之爲言正也各欲正已也焉用戰

民爲暴君所虐皆欲仁者來正已之國也

**大全**

南軒張氏曰戰國之際以功力相勝善爲戰者則謂之能臣矣而孟子前以爲當服上刑今又以爲大罪蓋所謂深救當時之弊使之循其本也循其本有道焉其惟好仁乎好仁則無敵於天下若不志於仁而徒欲以功力取勝則天下孰非吾敵勝與負均爲殘民而逆天也○雲峯胡氏曰觀此復引書而言則可知前章所謂盡信書則不如無書者矣大抵此四章亦相承而言一章以梁王之戰爲不仁二章以春秋之戰爲無義三章言武王仁義之師必無血流漂杵之事四章言湯武仁義之師必不用我善爲戰之人○東陽許氏曰孟子之時皆尙攻戰能者爲賢臣而孟子乃以爲大罪蓋國君苟能行仁政以愛其民使之飽煖安佚則下民親戴其上矣其他國之民受虐於君者心必歸於此人既樂歸於我我以親上之民而征虐民之君則其民豈肯與我爲敵故引湯武之事以証之

○孟子曰梓匠輪輿能與人規矩不能使人巧

尹氏曰規矩法度可告者也巧則在其人雖大匠亦未如之何也

已蓋下學可以言傳上達必由心悟莊周所謂斲輪之意蓋如此

莊子大道篇桓公讀書於堂上輪扁斲輪於堂下釋鋌鑿而上問桓公曰敢問公之所讀者何言也公曰聖人之言也曰聖人在乎公曰已死矣曰然則公之所讀者古人之糟粕也夫公曰寡人讀書輪人安敢議乎有說則可無說則死輪扁曰臣也以臣之事觀之斲輪徐則甘而不固疾則苦而不入不徐不疾得之於手而應之於心口不能言有數存焉於其間臣不能以喻臣之子臣之子亦不能受之於臣是以行年七十而老斲輪古之人與其不可傳者死矣然則君之所讀者古人之糟粕已夫

**大全**

南軒張氏曰聖賢之教人自洒掃應對進退而上皆規矩也規矩舍規矩以求巧無是理也○新安陳氏曰巧卽規矩熟後自得之妙未有舍規矩而可以得巧者上達卽下學之覺悟處未有舍下學而可以上達者但巧與上達非教者所能致力耳未嘗以爲出於規矩與下學之外也又云本文如詩六義之比未嘗說破此乃以吾道之教者與學者言之也

○孟子曰舜之飯糗茹草也若將終身焉及其爲天子也被袵衣鼓



琴二女果若固有之

飯食也。糗乾糧也。茹亦食也。衿畫衣也。趙氏曰畫繡之衣。二女堯之二

女也。果女侍也。朱子曰趙氏以果為侍。廣韻從女從果者亦曰侍。言聖人之心不以貧賤

而有慕於外。不以富貴而有動於中。隨遇而安。無預於已。所性分

定故也。慶源輔氏曰所性謂天所與我之性。分定謂雖大行不加

性。故湛然無所欣戚於其間。隨遇而安。不

以物動已也。無預於已。不以已隨物也。

**大全** 南軒張氏曰若將終身若固有之。可謂善形容舜者。蓋所欲

一毫之加。故無適而不得也。

○孟子曰吾今而後知殺人親之重也。殺人之父人亦殺其父。殺人之

兄人亦殺其兄。然則非自殺之也。一聞耳。

言吾今而後知者。必有所為而感發也。一聞者。我往彼來。間一人

耳。其寔與自害其親無異也。范氏曰。知此則愛敬人之親。人亦愛敬其親矣。

**大全** 南軒張氏曰天有顯道。厥類惟彰。感應之理。未有不以類者。

方其殺人之親。豈知人殺吾親。其機固已在此乎。觀魏晉南

北朝之君。互相屠戮。自今觀之。屠戮他人者。寔自絕滅而已矣。孟

子斯言。欲使時君無動於忿欲。寡怨息爭。以保其宗廟親族。是仁

術也。

○孟子曰古之為關也將以禦暴

譏察非常。

今之為關也將以為暴。

征稅出入。○范氏曰古之耕者什一。後世或收大半之稅。此以賦

歛為暴也。文王之囿與民同之。齊宣王之囿為阱國中。此以園囿

為暴也。後世為暴不止於關。若使孟子用於諸侯。必行文王之政。



凡此之類皆不終日而改也。慶源輔氏曰關則一而古今所以為理也。征稅出入為利也。人欲也。天下之事莫不然。孟子舉關之一事言之。范氏推言及賦稅苑囿之事。且曰使孟子用於諸侯必行文王之政者尤說得孟子之事寔蓋孟子言語句是事寔言之則必行之。

**大全**新安陳氏曰關有議有征。古者禁異服。譏異言。以譏為主。今則以征為主而已。○南軒張氏曰古以義理為國。後世徇私而已。古人創法立制。與天下公共。凡以為民耳。以利為國。雖古法之尚存者。亦皆轉而為一己之計矣。本原不正。無往不失。先王之意。豈特為關之暴而已哉。

○孟子曰身不行道不行於妻子使人不以道不能行於妻子身不行道者以行言之不行者道不行也使人不以道者以事言之不能行者令不行也。

**精義**程子曰易家人上九之象曰威如之吉。反身之謂也。言治家之道。以正身為本也。爻辭謂治家當有威嚴。而夫子又復戒云。當先嚴其身也。威嚴不先行於己。則人怨而不服。故云威如而吉者。能自反于其身也。孟子所謂身不行道不行於妻子也。○尹

曰妻子至親且近而不能行。况可行於他人乎。故曰其身不正雖令不從。

**大全**朱子曰身若不行道則妻子無所取法。全無畏憚了。然猶可使也。若使人不以道則妻子亦不可使矣。○問不行於妻子百事不可行。不可使亦在其中。不能行於妻子却只指使人一事言之。

否曰然。南軒張氏曰順理之事。則人易從。否則雖妻子亦不能使之必從也。前言不躬行則無以化之。後言使之非道。則不得而強之。然使之以道。而躬行未至。彼亦未必信從。均于不行而已。是行道為本也。然使行道者言之。使人以道。亦行道之見于一事者也。古人謂進德者必考之于妻子。其是之謂與。

○孟子曰周於利者凶年不能殺周於德者邪世不能亂周足也言積之厚則用有餘。

**大全**慶源輔氏曰德貴蓄積。然後有餘用。而外物不足以亂之。若夫挾一善一長而自以為足。而欲以遊於邪世。則鮮有不為其所亂者矣。然良農不患乎年之有凶。而惟患乎蓄糧之不厚。君子不患乎世之難處。而患乎德之不周。戰兢自持。死而後已。凡皆



孟子通朱子全卷十四  
以周其德也。○新安陳氏曰積利厚者。豐凶皆給。積德厚者。理亂皆正。孟子不言利而此言之。主周於德而言。借以爲喻而引起耳。


○孟子曰好名之人能讓于乘之國苟非其人簞食豆羹見於色

好名之人。矯情于譽。是以能讓于乘之國。然若本非能輕富貴之人。則於得失之小者。反不覺其真情之發見矣。蓋觀人不於其所勉而於其所忽。然後可以見其所安之寔也。慶源輔氏曰矯情者。至誠者。不忽於其小而有常。是以觀人之法。不於所勉而于所忽。人之誠與僞見矣。所安即誠也。○新安陳氏曰所安對所勉言。勉強者多矯情於大。而不免發露于小。安焉者則貫小。大皆出於真寔也。

**或問**好名之人能讓國矣。而不能忘情於小物何哉。曰于乘之國。辭受之間。十目所視。十手所指之地也。簞食豆羹。得失之際。則微矣。人亦何暇注其耳目於斯哉。此好名之人。所以飾情於彼。以取美名。而不意其鄙吝之真情寔態。乃發露於所忽易而不虞之地也。

也。

**語類**讓于乘之國。惟賢人能之。然好名之人。亦有時而能之。然若不是真個能讓之人。則於小處不覺發見矣。蓋好名之人。本非真能讓國也。徒出一時之慕名。而勉強爲之耳。然這邊雖能讓于乘之國。那邊簞食豆羹。必見於色。東坡所謂人能碎千金之璧。而不能不失聲於破釜。正此意也。苟非其人。其人指真能讓國者。非指好名之人也。○徐孟寶問好名之人能讓于乘之國。曰會得東坡說得碎千金之璧。而不能不失聲於破釜否。曰如此則能讓于乘之國。只是好名。至簞食豆羹。見於色。却是寔情也。曰然。曰如此說時。好名大故。未是好事在。曰只李守約之祖光祖。刪定曾如此說來。某嘗把此一段對向爲身死而不受一段爲義。蓋前段是好名。





之人於大處打得過小處漏綻也。動於萬鍾者，是小處遮掩得過大處發露也。

○孟子曰不信仁賢則國空虛

空虛言若無人然。慶源輔氏曰仁者德之首。賢者總言其有德耳。○新安陳氏曰仁賢分言則仁仁人也。賢有德之人也。合言則仁德之賢人也。

無禮義則上下亂

禮義所以辨上下。定民志。禮必有義。義即其所以為是禮者之義也。上下亂謂上替下僭。

無政事則財用不足

生之無道。取之無度。用之無節。故也。如周禮九職任萬民。是生之道。九賦歛財賄。是取之道。九式節財用。是用之道。三者皆無。無以開財源而節財流。故財用不足。○尹氏曰三者以仁賢為本。無仁賢則禮義政事處之皆不以其道矣。南軒張氏曰信仁賢則君有所輔。民有所庇。社稷有

所托。奸宄有所憚。國本植立而堅固矣。有禮義則自身以及國。君君臣臣。父父子子。而上下序。所謂治也。有政事則先後綱目。粲然具舉。百姓足而君無不足焉。此三者為國之大要。然信仁賢其本也。信仁賢而後禮義興。禮義興而後政事修。雖三王之所以治。亦不越是矣。○新安陳氏曰禮義由賢者出。為政在人。三者所以以仁賢為本也。何代不生賢。在人君能信用之耳。有之而不信用。與無人同。孟子不曰無仁賢而曰不信仁賢。見仁賢。信。用。之。則。有。不。信。用。則。無。此。不。信。二。字。之。深。意。

○孟子曰不仁而得國者有之矣。不仁而得天下未之有也。

言不仁之人。騁其私智。可以盜千乘之國。須看盜字而不可以得丘民

之心。雲峯胡氏曰騁私智可以盜之於一時。非至仁不能得之於悠久。鄒氏曰自秦以來。不仁而

得天下者有之矣。秦隋五代是也然皆一再傳而失之。猶不得也。所謂得

天下者。必如三代而後可。慶源輔氏曰不仁而得天下。如曹操司馬氏及五代之君皆是也。鄒氏斷以得

天下。必如三代而後。可。此得孟子之旨矣。

**大全**南軒張氏曰不仁而得國。得其土地而已。豈得其民心哉。然是終可保乎。孟子之言。所當深味。不可執辭以害意也。後之



孟子通考卷之四  
取天下而立國。差久者。其始所行。亦必庶幾於仁。不然。雖得土地於一時。亂亡亦相踵而至。是其得也。適以速其滅亡耳。

○孟子曰民為貴社稷次之君為輕

社土神。稷穀神。建國則立壇壝以祀之。周禮地官大司徒設其社稷之壇而樹之。田主各以其野之所宜木。遂以名其社。與其野。○封人掌設王之壇壝。為畿封而樹之。聚土曰封。壝謂壇及楨埒也。白虎通曰天子社壇方五丈。取五方五色土。封之。諸侯半之。各以其所守之方。一色土。封之。皆冒以黃土。○周禮圖社稷壇相並。社壇在東。稷壇在西。各三級。壝在四隅。蓋國以民為本。社稷亦為民而立。而君之尊。又係於二者之存亡。故其輕重如此。

**或問**民貴君輕之說。得不啟後世篡奪之端乎。曰以理言之。則民貴以分言之。則君貴。此固兼行而不悖也。各於其時。視其輕重之所在而已耳。若不惟其是。而姑借聖賢之說。則亦何辭之不可借。而所以啟後人之禍者。又豈止於斯言乎。

**大全**趙氏曰社所以祭五土之神。稷所以祭五穀之神。稷非土無以生。土非稷無以見生之之效。以其同功。均利以養人故也。

○新安陳氏曰此以理言。非以分言也。

是故得乎丘民而為天子。得乎天子為諸侯。得乎諸侯為大夫。

丘民田野之民。至微賤也。司馬法云六尺為步。步百為畝。畝百為夫。夫三為屋。屋三為井。井十為通。通十為成。是一丘為十六井。而一井為九夫之地也。今云十六井。蓋有一萬四千四百畝。為一百四十四夫所受者也。然得其心。則天下歸之。天子至尊貴也。而得其心者。不過為諸侯耳。是民為重也。

諸侯危社稷則變置

諸侯無道。將使社稷為人所滅。則當更立賢君。是君輕於社稷也。犧牲既成。粢盛既潔。祭祀以時。然而旱乾水溢。則變置社稷。祭祀不失禮。而土穀之神。不能為民禦災捍患。則毀其壇壝。而更



置之。雲峯胡氏曰兩變置字不同集註釋之亦異變置諸侯者改立其人也變置社稷者改立其祀神之壇壝而非改立其神也亦年不順成。雨暘不時曰不順。八蜡不通之意。禮記郊特牲云者氏始為蜡。蜡也者索也。歲十二月合聚萬物而索饗之也。蜡之祭也。主先嗇而祭司嗇也。祭百種以報嗇也。饗農及郵表。啜禽獸仁之至。義之盡也。古之君子使之必報之。迎猫為其食田鼠也。迎虎謂其食田豕也。迎而祭之也。祭坊與水庸事也。八蜡以詔四方。四方年不順成。八蜡不通。以是社稷雖重於君而輕於民也。謹民財順成之方。其蜡乃通。

**或問**變置社稷。程子以為變其所配之人諒乎。曰以湯變夏觀之。則固有其事。然初不為水旱也。且以水旱之故。不自省已而遽廢其配祭之人於理。亦有未安者。語類問伊川云。勾龍配食於社。弃祀之。今以其水旱故易之。夫二神之功。萬世所賴。早乾水溢。一時之災。以一時之災而遽忘萬世之功。可乎。曰變置社稷。非是易其人而祀之也。蓋言遷社稷壇壝於他處耳。若集註之說。則出於彭城陳無已之論。曰有為句容令多盜。改置社稷而加禮焉。既而盜止。愚竊以為此或有

合於古人之意。故取之以為說焉。庶乎其少安也。

**大全**南軒張氏曰人君惟恃崇高之勢。而忽下民之微。故肆其私欲。輕失人心。以危其社稷。使其知民之貴。社稷次之而已。不與焉。則必兢兢業業。不敢自恃。惟懼其失之也。則民心得而社稷可保矣。是以明王畏其民。而闇主使民畏已。畏其民者昌。使民畏已者亡。驕亢自居。民雖迫於勢而憚之。然其心自離。民心離之。是天命去之矣。慶源輔氏曰天生民而立之。君以司牧之。是君為民而立也。世衰道微。至戰國時。為君者不知其職。視民如草芥。而不知恤也。故孟子發此輕重之論。而并及夫社稷焉。蓋社稷亦為民立故也。于是反覆明辨之。其丁寧緊切之意。可謂仁矣。

○孟子曰聖人百世之師也。伯夷柳下惠是也。故聞伯夷之風者頑夫廉懦夫有立志。聞柳下惠之風者薄夫敦鄙夫寬奮乎百世之上。百世之下聞者莫不興起也。非聖人而能若是乎。而况於親炙之者乎。興起感動奮發也。親炙親近而薰炙之也。餘見前篇。

**或問**程子以為夷惠聖人傳者之誤。精義有今考之孟子之言此此說



者非一豈皆誤乎曰未必誤也其曰聖之清聖之和則固不思不  
勉而從容自中矣但其所至出於一偏而不若孔子之備所以不  
得班於孔子耳曰孟子學孔子者也乃屢稱夷惠而深嘆仰之何  
也曰夷惠之行高矣然偏勝而易能有迹而易見且世人之貪懦  
鄙薄者衆一聞其風而興起焉則其爲效也速而所及者廣譬如  
薑桂大黃之劑雖非中和然其於去病之功爲捷而田夫販婦大  
寒大熱者之所便也若孔子之道則廣大而中正渾然而無迹非  
深於道者不能庶幾其萬一如參苓芝朮之爲藥平居有養性之  
益而緩急伐病之功未必優於薑桂大黃非所以施於閭巷之間  
危急之候也孟子屢稱夷惠而不及孔子其意殆以此耶評論譬  
曉確當  
不易然本章不重不足夷惠願學  
孔子意但贊美處自當有分寸

**大全**朱子曰孟子於二子論之詳矣雖以爲聖之清和然又嘗病  
其隘與不恭且以其道不同於孔子而不願學也及其一旦發爲  
此論乃以百世之師歸之而孔子反不與焉蓋孔子道大德中而  
無迹故學之者沒身鑽仰而不足二子志潔行高而迹著故慕之  
者一日感慨而有餘也潛室陳氏曰伯夷柳下惠皆入聖來故其  
清爲聖人之清和爲聖人之和作用處與  
常人萬萬不侔但比孔子猶爲小成之聖耳○汪氏曰聖人達則  
澤及當時窮則風傳後世於此不及伊尹者夷惠不爲政於天下  
所可言者風而已伊尹異於是故不及之○雲峯胡氏曰四時之  
風莫和於春莫清於秋物無不動者然在物猶有迹也仲尼元氣  
也渾然  
無迹矣

○孟子曰仁也者人也合而言之道也

仁者人之所以爲人之理也然仁理也人物也以仁之理合於人  
之身而言之乃所謂道者也程子曰中庸所謂率性之謂道是也



語類問合而言之道也。曰只說仁，不說人，則此道理安頓何處。只說人，不說仁，則人者特一塊血肉耳，必合將來說，乃是道也。或曰外國本人也，之下有義也者，宜也。禮也者，履也。智也者，知也。信也者，實也。凡二十字，今按如此，則理極分明，然未詳其是否也。尤延之云：孟子仁也者，人也。下高麗本云：然此說近是。○新安陳氏曰：若據此本，則是合仁義禮智信言之，皆道也。且又見得仁義禮智兼信而言，五常之道，尤為明備云。

**或問**所謂合而言之者，其以人為仁之謂乎？曰：楊氏之說如此矣。非孟子之意也。孟子此章，但論仁與道之所以名耳。故本文以言之為說。程子亦以率性謂道，道是總名釋之也。精義程子曰：仁固蓋言人而不及仁，則血氣物欲之私而已。言仁而不即人之身以明之，則又徒為虛言，而無以見天理流行之實。故必以仁之理合於人之身而言。不可倒說。然後仁之為道可見。蓋仁則性而已矣。道則

父子之親，君臣之分，見於人之身而尤著。程子所謂公而以人體之，亦此意也。程子曰：仁之道，要之只消道一公字。公是仁之理，不則物我兼照，故仁所以能恕，所以能愛，恕則仁之施，愛則仁之用也。

**語類**仁者人也，人之所以為人者，以其有此而已。一心之間，渾然天理，動容周旋，造次顛沛，不可違也。一違則私欲間乎其間，為不仁矣。雖曰二物，其是一理。蓋仁即心也，不是心外別有仁也。○仁者人也，非是以人訓仁。且如君臣之義，君臣便是人，義便是仁。盡君臣之義，即是道，所謂合而言之者也。○人之所以得名，以其仁也。言仁而不言人，則不見理之所寓；言人而不言仁，則人不過是一塊血肉耳。必合而言之，方見得道理出來。因言仁字最難形容，是個柔軟有知覺相酬接之意。此須是自去體認，切問而近思，仁



在其中矣。○問仁也者人也。曰此仁字不是別物。即是這人底道理。將這仁與人合便是道。程子謂此猶率性之謂道也。如中庸仁者人也。是對義者宜也。意又不同。人字是以人身言之。仁字有生意。是言人之生道也。中庸說仁字又密。上言修身以道。修道以仁。便說仁者人也。是切已言之。孟子是統而言之。

**大全** 朱氏公遷曰。仁以天理言。仁者人身之天理也。子思以生理言。孟子以所以為仁之理言。子思欲人推之而有序。孟子欲人體之而不違。生理即天地生物之心。所以為人之理。即器中之道。物中之則也。中庸修道以仁。以仁之全體言。仁者人也。以仁之名義言。親親為大。以仁之事寔言。

○孟子曰孔子之去魯曰遲遲吾行也。去父母國之道也。去齊接淅而行去他國之道也。

重出 已見萬章下篇

**大全** 南軒張氏曰。當其可即是道。當去魯之時。則遲遲其行為道。當去齊之時。則接淅而行為道。孟子學孔子去齊也。非父母國而有三宿出晝之濡滯。何也。孟子於宣王蓋有望焉。故其去有眷眷不能已者。夫其不能已。是固道之所在也。

○孟子曰君子之厄於陳蔡之間。無上下之交也。君子孔子也。厄與厄同。君臣皆惡。無所與交也。

**大全** 慶源輔氏曰。陳蔡之厄。聖人之極否也。是亦氣數之窮。在聖人則何與焉。

○貉稽曰。稽大不理於口。

趙氏曰。貉姓。稽名為眾口所訕。理賴也。今按漢書無俚方言。亦訓賴。前漢季布贊賢者。誠重其死。夫婢妾賤人。感慨而自殺。非能勇也。其畫無俚之至耳。○慶源輔氏曰。大不理於口者。言大為眾口所訕也。

孟子曰無傷也。士憎茲多口。

趙氏曰。為士者。益多為眾口所訕。按此則憎當從士。今本皆從心。



蓋傳寫之誤

憎字註作增字解新安直作憎字解則悖註矣故不錄

詩云憂心悄悄愠於羣小孔子也肆不殄厥愠亦不隕厥問文王也

詩邶風栢舟

婦人不得於其夫故以栢舟自比疑莊姜不見答於莊公而作其四章曰憂心悄悄愠于羣小觀閔既多

受侮不少靜言

及大雅綿之篇也此周公戒成王之詩道述太王

思之寤辟有標

始遷岐周以開王業而文王因

之以受天命也

七章以上專言太王事八章以下兼言文王事其

八章曰肆不殄厥愠亦不隕厥問

柞械拔矣行道兌矣混夷駟矣

維其喙矣其九章曰虞芮質厥成

文王蹶厥生予曰有疏附悄悄

子曰有先後予曰有奔走予曰有禦侮

餘見上孟梁惠王篇

憂貌愠怒也

本言衛之仁人見怒於羣小孟子以為孔子之事可

以當之肆發語辭

肆猶言遂也承隕墜也問聲問也本言太王事

昆夷雖不能殄絕其愠怒亦不自墜其聲問之美

孟子以為文王之

之事可以當之

如見囚於羑里是也○語類或問肆不殄厥愠亦

不隕厥問此綿之八章

孟子以是稱文王無足怪

憂心悄悄愠于羣小

此邶風栢舟之詩何與孔子而以此稱孔子

何也曰此不必疑

如見毀于叔孫幾害于桓魋皆愠于羣小也辭

則衛詩意似孔子之事

故孟子以此言孔子○尹氏曰言人顧自處何如盡

其在我而已

尹氏上文曰文王孔子大聖人也不能免羣小之愠

聖人之德亦不免為眾口所誦

而其所以處之者如此然人雖

誦之終不能損其令名

孟子意謂稽雖為眾口所誦但當自修其

德而已○新安

說復尹氏刪之

○孟子曰賢者以其昭昭使人昭昭

今以其昏昏使人昭昭

昭昭明也昏昏闇也

尹氏曰大學之道在自昭明德而施於天下

國家其有不順者寡矣

尹氏下文曰欲以昏昏而使人昭昭未之

者求之已也以已昏昏

使人昭昭者求之人也尹氏引大學之說

當矣能明明德則施於天下

國家其有不順者寡矣若不自明其

德則如面牆一物無所見

一步不可行

○孟子謂高子曰山徑之蹊間

介然用之而成路為閒不用則茅塞

之矣今茅塞子之心矣



徑小路也。蹊人行處也。介然倏然之頃也。用由也。路大路也。爲閒小頃也。茅塞茅草生而塞之也。言禮義之心不可少有間斷也。

**精義** 尹曰仁義人心之所固有。安可舍其良心哉。或作或輟。而欲成德。是茅塞之類也。

**大全** 慶源輔氏曰禮義之心。人所固有。雖易發而亦易塞。善端發欲所誘。而遂窒之矣。○新安陳氏曰學問漸進。則禮義日開。學問纔止。則理義日窒。氣習物欲。皆塞理義之心之茅也。學問廢弛。譬之茅又生而塞子之心矣。高子爲人。如前篇論小弁。後章論禹文王之樂。其固陋窒塞可見。○東陽許氏曰山間之小徑。倏然有人行而不斷。卽成大路。少頃無人行。則茅長而遂塞之。學問之道。才有間斷。私欲便生。而塞天理之路矣。○朱氏公遷曰此因儆戒學者。而以理義之心言之也。失其本心。人心有害。放其良心。放心不求。皆是此類。蓋情者不能自強。慾者不能自克。此其所以爲衆人也。嘗論心之塞與放不同。心馳於外。而不知求。則曰放心。室於中。而不知思。通則曰塞。高子之心病。觀論詩論樂可見。其固陋閉塞。直不知用心於學問。所以致此。故孟子以茅塞箴之。朱氏以與放心者類看。則未當放心者。任情縱欲。如斬伐怙亡之類。高子之塞不類此。是當有辨。

○高子曰禹之聲尙文王之聲

尙加尙也。豐氏曰言禹之樂過於文王之樂。

孟子曰何以言之曰以追蠡

豐氏曰追鐘紐也。周禮所謂旋蠡是也。按周禮考工記鐘縣謂之旋。旋蠡謂之幹。蓋懸鐘之紐也。其形如環。環有盤旋之義。於旋之上。爲蟲形以飾之。自漢以來。鐘旋之上。以銅篆作蹲熊及盤龍獸名。辟邪皆旋蟲之類也。蠡者齧本蟲也。言禹時鐘在者。鐘紐如蟲齧而欲絕。蓋用之者多。而文王之鐘不然。是以知禹之樂過於文王之樂也。

曰是奚足哉城門之軌兩馬之力與

豐氏曰奚足言此何足以知之也。軌車轍迹也。兩馬一車所駕也。城中之涂容九軌。八尺爲軌。廣九軌。積七十二尺。則此涂十二步也。考工記匠人營國方九里。旁三門。國中九經。九緯。野度以步。涂度以軌。路門不容乘車之五個。應門二轍。三個。經涂九軌。環涂七軌。野涂五軌。車可散行。故其



轍迹淺借淺以形深。只重下以城門之軌。喻禹樂非以城中之軌。喻文樂也。城門惟容一車。車皆由

之。故其轍迹深。蓋日久。車多所致。非一車兩馬之力能使之然也。

借此以明鐘。言禹在文王前千餘年。故鐘久而紐絕。文王之鐘則歷年久之譬。

未久而紐全。不可以此而議優劣也。○此章文義本不可曉。舊說

相承如此。而豐氏差明白。故今存之。亦未知其是否也。

○齊饑陳臻曰國人皆以夫子將復為發棠始不可復

先時齊國常饑。孟子勸王發棠邑之倉以賑貧窮。至此又饑。陳臻

問言齊人望孟子復勸王發棠。而又自言恐其不可也。

**或問**發棠之說。曰范氏言之詳矣。范氏曰孟子在賓師之位。方以仁義說齊王。幸而聽其言。故發

棠邑之粟。然而不行王政。孟子言終不令。及再饑。孟子遂不復言。度其不可言也。然其所以止為不可復

之故者。雖未可以臆說定。顧其事勢則或然耳。魯按此章不可復之故。不必說王不

用孟子。即請復而王不聽。方為不可。即再請再發。亦有所不可。何也。孟子初請。望王行王道也。但王道之成。如分里授田。為久遠之

計。固要需之五年七年。方可冀其有成。即王道之始。因天地自然

之利。樽節愛養。亦要朞月三年。方能有濟。而目前饑荒。正所謂塗

有餓殍。而不知發者。此時正有老稚轉乎溝壑。壯者散而之四方

之患。故孟子先為此請。以救目前之急。而後王道之始。王道之成

可勸。王次第舉行耳。奈孟子已將王道陳于王前矣。而王終不能

用。若復沾沾發粟為歡。虞小補之計。以博齊人一日之歡。豈君子

識。進退語默之宜哉。此不可中之寔義也。孟子既未明說。借馮婦

以寓意。集註或問亦未明補。大全諸儒亦僅以知幾守義言之。不

可寔義。終未見得。孟子未經說破。固不必添入。而學者不可不知也。因為拈出。

孟子曰是為馮婦也。晉人有馮婦者。善搏虎。卒為善士。則之野有眾

逐虎。虎負嵎。莫之敢撻。望見馮婦趨而迎之。馮婦攘臂下車。眾皆悅

之。其為士者笑之。

手執曰搏。卒為善士。後能改行為善也。之適也。負依也。山曲曰嵎。撻觸也。笑之。笑其不知止也。疑此時齊王已不能用孟子。而孟子



亦將去矣故其言如此

**大全**南軒張氏曰世固有勇于為善事者不察夫義理之當然與否而必為之蓋亦足以悅于流俗然發不中節有害于君子之道是皆馮婦之類耳學者其無惑乎眾之悅而有動哉審諸已而已矣○慶源輔氏曰齊人之所望于孟子者利也而孟子之所自守者義也夫告君以發粟賑民是亦美事固君子所樂為者但是時齊王已不能用孟子而孟子亦將去矣故其義不當復有所言耳君子之所為與時變化不主故常惟義理如何耳豈徇其常所為者以取人之屢快哉○新安陳氏曰勸王發倉賑饑仁也知時不可言而不言智也


○孟子曰口之於味也目之於色也耳之於聲也鼻之於臭也四肢之於安佚也性也有命焉君子不謂性也

程子曰五者之欲性也性之所欲此即食色性也之性然有分不能皆如其願則是命也願即欲也命則天理之則也不可踰越其分限不可謂我性之所有而求必得之也愚按不能皆如其願不止為貧賤蓋雖富貴之極亦有品節限制

則是亦有命也新安陳氏曰此命字合理與氣言貧賤之安于分此以氣言也富貴而不過其則此以理言也

**語類**孟子亦言氣質之性如口之於味也之類是也○敬之問有

命焉君子不謂性也有命焉乃是聖人要人全其正性曰不然此分明說君子不謂性這性字便不全是就理上說夫口之欲食目之欲色耳之欲聲鼻之欲臭四肢之欲安佚如何是會恁地這固是天理之自然然理附於氣這許多却從血氣軀殼上發出來故君子不當以此為主而以天命之理為主都不把那個當事但看這理合如何有命焉有性焉此命字與性字是就理上說性也君子不謂性也命也君子不謂命也此性字與命字是就氣上說○又謂孟子謂性也有命焉此性所指謂何曰此性字指氣質而言如性相近之類此命字却合理與氣而言蓋五者之欲固是人欲





然有命分既不可謂我性之所有而必求得之又不可謂我分可以得而必極其欲如貧賤不能如願者固分也富貴之極可以無所不為然亦有限制裁節又當安之於理如紂之酒池肉林却是富貴之極而不知限節之意若以其分言之固無不可為但道理却恁地不得今人只說得一邊不知合而言之未嘗不同也

**大全**朱氏公遷曰命兼理氣言貧賤而知有分則是氣富貴而知有品節則是理此性也有命之說不徇私以滅理是命於理者我能立之不縱欲以傷命是命于氣者我能立之此修身立命之說二章皆以理御氣以理制欲也又曰性自氣稟食色而言不謂性兼為富貴貧賤者言之動心忍性專為困患難者言之皆非特地論性而推其語意脉絡則所謂性者各有所指也

仁之於父子也義之於君臣也禮之於賓主也智之於賢者也聖人之於天道也命也有性焉君子不謂命也

程子曰仁義禮智天道在人則賦於命者所稟有厚薄清濁然而

性善可學而盡故不謂之命也張子曰晏嬰智矣而不知仲尼是非命耶

朱子曰橫渠云云此命字恐作兩般看若作所稟之命則是嬰稟得智之淺者若作命分之命則是嬰偶蔽於此遂不知夫子此愚按所稟者厚而清則其仁之於父子也至義之於

當作兩般看君臣也盡禮之於賓主也恭智之於賢否也哲聖人之於天道也

無不昭合而純亦不已焉薄而濁則反是是皆所謂命也或曰者當作否人衍字更詳之

朱子曰性也有命焉性字兼氣稟而言命也有性焉此性字專言其理直卿云不謂性命章兩性字兩命字都不同上面性字是人心下面性字是道心

上面命字是氣論富貴貧賤下面命字是理論智愚賢不肖○雲峯胡氏曰此命字專指氣而言然氣亦有二清濁美惡氣質之不齊也高下厚薄修短氣數之有異也此二條者皆性之所有而命於天者也然世之人以前五者為性

雖有不得而必欲求之以後五者為命一有不至則不復致力故

孟子各就其重處言之前重在命後重在性以伸此而抑彼也前則伸命以抑性後則伸



性以張子所謂養則付命於天道則責成於已其言約而盡矣。文集  
抑命。答許順之書曰口之于味云云此固性之所欲然在人則有所賦之分在理則有不易之則皆命也是以君子不謂之性而付命于天。仁之于父子云云在我則有厚薄之稟在彼則有遇不遇之殊是皆命也。然有性焉是以君子不謂之命而責成於已。須如此看意思方圓。  
無欠闕處。

**或問**所謂性命者何不同也。曰性者人之所受乎天者其體則不過仁義禮智之理而已其發則雖食色意欲之私亦無不本于是焉。命則因大氣之厚薄而賦于人之名也。不惟智愚賢否之所係。雖貧富貴賤之所值亦無不由於是也。此便兼氣稟氣數說故君子于食色意欲之私則不謂之性而安於貧富貴賤之有命于知愚賢否之殊則不謂之命而勉於仁義禮智之有性也。曰然則此其專為貧賤愚不肖者言之耶。抑其通言之耶。曰孟子之意似若專為貧賤


愚不肖而言者。而其推之則亦無不通矣。蓋富且貴者雖所求之必得而亦必有制度之節。聖且賢者雖所稟之已厚而亦未嘗不勉其所當勉也。此通論全章曰諸說如何。曰程子至矣。張子又自為一說於義亦通。指晏嬰知矣二句說其曰付命於天責成於已者則語到而意切矣。又不以薄而不修不以賤而不勉者亦善。楊氏以性中本有聲色臭味之五者終亦未盡。蓋推其所自而本于性則可以為本有而直謂之性則不可。此亦當深察也。或問以五者之命皆謂所值之不同如舜之於瞽瞍則仁或不得於父子。文王之於紂則義或不得於君臣。孔子之於陽貨則禮或不得於賓主。子貢不能聞一知十則智或不得于賢者。孔子不得堯舜之位則聖人或不得于天道。此皆命也。然君子當勉其在已者而不歸之命。此說與張



合於義亦可通也。按此說專主氣數而言當兼氣稟說。正蒙張子有曰形而後有氣質之性善反之則天命之性存焉故氣質之性君子有弗性者焉。

**語類**命也有性焉君子不謂命也。此命字有兩說。一則以所稟言之。一則以所值言之。集註之說是以所稟言之。清而厚則仁之于父子也。至若瞽瞍之於舜則薄於仁矣。義之於君臣也。盡若桀紂之于逢干則薄于義矣。禮薄而至于賓主之失其歡。智薄而至于賢者之不能盡知其極。至于聖人之于天道。有性之反之之不同。如堯舜之盛德固備於天道。若禹入聖域而不優則亦其稟之有未純處。是皆所謂命也。○或問聖人之於天道。文勢與上文一否。曰與上文一。堯舜性之則盡矣。湯武身之則未也。○區兄問有性焉有命焉一段。以上節性字為氣稟之性。以下節性字為天命之性。先生甚喜以為某四十

歲方看透此段意思。上云性也是氣稟之性。有命焉是斷制人心欲其不敢過也。下云命也。蓋其所受亦有厚薄之不齊。有性焉是限則道心欲其無不及也。○或問君子不謂性命。曰論來口之於味。目之于色。耳之于聲。鼻之於臭。四肢之于安佚。固是性。然亦便是合下賦予之命。仁之于父子。義之于君臣。禮之于賓主。智之于賢者。聖人之于天道。固是命。然亦便是各得其所受之理。便是性。孟子恐人只見得一邊。故就其所主而言。舜禹相授受。只說人心惟危。道心惟微。論來只有一個心。那得有兩樣。只就他所主而言。那個便喚做人心。那個便喚做道心。人心如口之于味。目之于色。耳之于聲。鼻之于臭。四肢之于安佚。若以為性所當然。一向惟意所欲。却不可。蓋有命存焉。須着安於定分。不敢少過。始得道心如





仁之於父子義之於君臣禮之於賓主智之於賢者聖人之于天道若以為命已前定任其如何更不盡心却不可蓋有性存焉須着盡此心以求合乎理始得又曰口之於味目之於色耳之于聲鼻之於臭四肢之于安佚這雖說道性其寔這已不是性之本原惟性中有此理故口必欲味耳必欲聲目必欲色鼻必欲臭四肢必欲安佚自然發出如此若本無此理口自不欲味耳自不欲聲目自不欲色鼻自不欲臭四肢自不欲安佚○或問命字之義曰命謂天之賦予所謂天令之謂命也然命有兩般有以氣言者厚薄清濁之稟不同也如所謂道之將行將廢命也得之不得曰有命是也有以理言者天道流行付而在人則為仁義禮智之性如所謂五十而知天命天命之謂性是也二者皆天所付與故皆曰

命命也有性焉此命字專指氣而言氣字兼氣稟氣數此條以氣數亦作氣稟說此性

字却指理而言如舜遇瞽瞍固是所遇氣數然舜惟盡事親之道期於底豫此所謂盡性大凡清濁厚薄之稟皆命也所造之有淺有深所遇之有應有不應皆由厚薄清濁之不同且如聖人之于天道如堯舜則是性之湯武則是身之禹則入聖域而不優此是合下所稟有清濁而所造有淺深不同此指氣稟言下又以氣數言仁之於父子如舜之遇瞽瞍義之于君臣如文王在羑里孔子不得位禮之于賓主如子敖以孟子為簡智之於賢者如晏嬰智矣而不知孔子此是合下來所稟有厚薄而所遇有應有不應但其命雖如此又有性焉故當盡性大抵孟子此語是各就其所重言之所以伸此而抑彼如論語所說審富貴而安貧賤之意張子所謂養則付



命於天道則責成于己是也。然又自要看得活。道理不是死的物。在人自着力也。○堯卿問君子不謂性命章。前段說性是物欲之性。命是命分。後段說性是仁義禮智之性。命是稟賦之命。似各不同。曰只是一般。此亦不難解。有甚玄妙。只將自家身看便見。且如嗜芻豢而厭藜藿。是性如此。然芻豢分無可得。只得且吃藜藿。如父子有親。有相愛底。亦有不相愛底。有相愛深底。亦有相愛淺底。這便是命。然在我有薄處。便當勉強。以至其厚。此以理制在彼有薄處。吾當致厚。感化得他亦厚。此以理制如瞽瞍之頑。舜便能使烝烝乂不格姦。叔器問瞽瞍之惡。彰彰于天下。後世舜何以謂之大孝。曰公且自與他畫策。瞽瞍頑嚚。天知地聞。舜如何掩得。且說今遇瞽瞍之父。公便要如何。○君子不謂性命一章。只要遏人欲。

存天理前一節。人以為性我所有。須要必得。後一節。人以為命則在天。多委之而不修。所以孟子到人說性處。却曰有命。人說命處。却曰有性。或曰先生嘗言前段要輕看。後段要重看。曰固有此理。想曾言之。

**文集**

吳伯豐問曰。聖人之於天道。必大嘗疑此句。比上文義例。似於倒置。伏蒙批誨云。上字在我。其下乃所得所施之不同。如此立說。亦不為倒。必大今試釋之。曰仁之所施。厚於父子。義之所施。盡於君臣。禮之所施。恭於賓主。之際。智之所施。哲於賢否。之辨。聖人之所得。全夫天理之粹。若如此解。固未為倒。但似終費注脚。斡旋之力。又仁義禮智四字。謂之在我可也。若以此例說聖人二字。意亦未安。

曰。聖人以身言。豈非在我。天道以理言。豈非所得。按聖人字。意亦未安。曰。聖人以身言。豈非在我。天道以理言。豈非所得。按聖人字。意亦未安。

道自當與上四句一例看。註中兼清濁厚薄。反正通釋之。或問語類。以堯舜湯武分性。反寔証之。最明透。見同是聖人。性反不同。安勉各異。其於天道。有自然脗合。而無間者。有勉強期其脗合。無間者。氣稟氣數。雖有不齊。要當以性矯命。同歸於脗合。無間焉。方是君子立命之學。



**大全** 潛室陳氏曰世人以上五者為性。則見血氣而不見道理。以下五者為命。則見氣數而不見道理。於是人心愈危。道心愈微。孟子於常人說性處。却以命言。則人之於嗜慾。雖所同有。却有品節限制。不可必得。而人心安矣。於常人說命處。却以性言。則人之於義理。其氣稟雖有清濁不齊。須是着力自做工夫。不可專委之天。而道心顯矣。

○浩生不害問曰樂正子何人也孟子曰善人也信人也

趙氏曰浩生姓不害名齊人也

何謂善何謂信

不害問也

曰可欲之謂善

天下之理其善者必可欲其惡者必可惡其為入也可欲而不可惡則可謂善人矣。朱子曰可欲只是說這人可愛也。○問可欲之善曰為君仁為臣敬為父慈為子孝是也。外是而求則非。○慶源輔氏曰先儒多以可欲為己之欲如書所謂敬修其可願之意獨集註不然可欲是別人以為可欲蓋若以為己

之欲則說得太輕且人之欲有善惡之不同故也。

或問○曰善者人之所欲惡者人之所惡其為入也處心造事行

已接物凡其所為一皆可欲而不可惡則是可謂善人矣然此或

其天質之美或其知及而勉慕焉未必其真以為然而果能不失

也必其用力之久一旦脫然有以真知其善之在已。句句當承善說而不

得不然決定真實而無一毫虛偽之意然後可以謂之信人矣然

亦足以自信於心而已未必其行之充足飽滿而無歉於身也然

既信之則其行必力其守必固如是而不自已焉則其所有之善

充足飽滿於其身雖其隱微曲折之間亦皆清和淳懿而無不善

之雜則是所謂美人者也然亦足以充於其內而已而未必其能

發見於外也又如是而不已焉則其善之充於內者彌滿布濩洋



孟子通義大全卷十四  
溢。四。出。而。不。可。禦。其。在。躬。也。則。睥。面。益。背。而。施。於。四。體。其。在。事。也。則。德。盛。仁。熟。而。天。下。文。明。是。則。所。謂。大。人。者。也。然。大。而。不。化。則。其。所。謂。大。者。未。能。離。乎。方。體。形。迹。之。間。必。其。德。之。盛。者。日。益。盛。仁。之。熟。者。日。益。熟。則。向。之。所。謂。大。者。且。將。春。融。凍。解。混。然。無。迹。而。與。天。地。合。德。日。月。合。明。四。時。合。序。鬼。神。合。其。吉。凶。矣。是。則。所。謂。聖。人。者。也。至。於。是。則。造。道。入。德。之。功。至。矣。盡。矣。不。可。以。有。加。矣。是。其。盛。德。至。善。之。極。無。聲。無。臭。之。妙。必。有。非。耳。目。所。能。制。心。思。所。能。測。者。是。則。所。謂。神。者。而。非。聖。人。之。上。復。有。神。人。也。夫。自。可。欲。而。至。於。大。則。思。勉。之。所。及。也。至。於。聖。且。神。焉。則。雖。非。思。勉。之。所。及。然。非。思。勉。之。而。不。已。焉。則。亦。未。有。至。焉。者。也。曰。如。子。之。說。然。程。子。張。子。之。言。可。欲。則。皆。以。其。理。言。之。若。與。子。異。何。也。曰。固。也。自。理。而。言。則。凡。可。欲。

而不可惡者皆善之理也。自人而言則亦必其知其理而志之之後得如是之人也。二先生之以理言欲學者知是理而志之以求為如是之人耳。有志於學者不可以不熟考而深思之也。但如其言則於文義微有不協。使可欲一句若無寔者。故張子又有善信二句。離則不可之說。蓋推其文義終有所未安也。故愚竊獨以人言之。庶幾不失其文義。而其理則固未嘗有違也。抑張子之言又曰。求仁必於未惻隱之前。明善必於未可欲之際。則欲學者用力於平日涵養之功。非欲使人求之恍惚窈冥之際也。曰樂正子以善名矣。而以饋歎從子敖。先館舍後長者何也。曰言在二者之中。則有餘於善而不足于信矣。此其所以未免於程子所謂受變於俗者與。



語類。可欲之謂善。人之所同愛而目爲好人者。謂之善人。蓋善者人所同欲。惡者人所同惡。其爲人也有可欲而無可惡。則可謂之善人也。○問可欲之謂善。若作人去欲他。恐與有諸已之謂信不相協。蓋有諸已。是說樂正子身上事。可欲却做人說。恐未安。曰此便是他有可欲處。人便欲他。豈不是渠身上事。與下句非不相協。○問可欲之謂善。曰橫渠說善人者。志於仁而無惡。蓋可欲底便是善。可惡底便是惡。若是好善又好惡。却如何得有諸已。此語脉亦不必深求。只是指人說。又問至大而化之。皆是指人。否。曰皆是。又問只自善推去。否。曰固是。須是有人善方推得。譬如合一藥。須先有真藥材。然後和合羅碾得來成藥。若是藥材不真。雖百般羅碾。畢竟不是。大凡諸人解義理。只知求向上去。不肯平實放下去。

求惟程子說得平寔。然平寔中其義自深遠。如中庸中解動則變。變則化。只是就外面說。其他人解得太高。蓋義理本平易。却被人求得深了。只如明則誠矣。誠則明矣。橫渠皆說在裏面。若用都收入裏面。裏面却沒許多節次。安着不得。若要強安排。便須百般撰合。都沒是處。○善人只是渾全一箇好人。都可愛可欲。更無些憎嫌處。問如此則惟已到善人地位者乃可當之。若學者可欲爲善。當如何用工。曰可欲只是都無可憎惡處。學者必欲於善字上求用工處。但莫做可憎可惡事便了。○又曰善信美大聖神。是六等人。可欲之謂善。是說資稟好。可欲是別人以爲可欲。有諸已之謂信。是說學。

有諸已之謂信



凡所謂善皆實有之。如惡惡臭。如好好色。是則可謂信人矣。○張

子曰志仁無惡之謂善。誠善於身之謂信。張子又曰善人欲仁而

雖不踐成法。亦不陷於惡。有諸已也。不入於室。由不學。故無自入

聖人之室也。○慶源輔氏曰善固多端。故集註言凡所謂善以該

之。如惡惡臭。如好好色。則表裏

誠寔。無一毫勉強假托之意也。

**語類**善人能無惡矣。然未必能不失也。必真知其善之當然而實

有於已。然後能不失。信者實有於已而不失之謂。○問可欲之謂

善。有諸已之謂信。充實之謂美。曰善人只是資質好底人。孔子所

謂不踐迹亦不入於室者是也。是箇都無惡底人。亦不知得如何

是善。只是自是箇好人而已。有諸已之謂信。是都知得了。實是如

此做。此是就心上說。心裏都理會得。充實之謂美。是就行上說。事

事都行得盡。充滿積實。美在其中而無待於外。如公等說話。都是

去外面旋討箇善來栽培放這裏。都是有待於外。如仁我本有這

仁。却不曾知得。却去旋討箇仁來註解了。方曉得這是仁。方堅執

之而不失。如義我元有這義。却不曾知得。却旋去討箇義來註解

了。方曉得這是義。堅守之而勿失。這都是有待於外。無待於外底

他善都是裏面流出來。韓文公所謂足乎已無待於外之謂德。是

也有待於外底。如伊川所謂富人多寶。貧人借看之喻是也。又曰

可欲之謂善。如人有百萬貫錢世界。他都不知得。只認有錢使。有

屋住。有飯吃。有衣着而已。有諸已之謂信。則知得我有許多田地。

有許多步畝。有許多金銀珠玉。是如何營運。是從那裏來。盡得知

了。

充實之謂美



力行其善。至於充滿而積實。則美在其中。而無待於外矣。慶源輔氏曰。有

諸已。則已是知至意誠之事。然又須見於踐履方得。故云力行其善。至於充滿其量。蓄積誠實。然後美在其中。而無所待於外矣。

**語類**問充實之謂美。充實云者。始信有是善而已。今乃充而實之。

非美乎。易曰。美在其中。而暢於四肢。此當連下句解。此之謂也。充實而有

光輝云者。和順積於中。英華發於外。故此有所形見。彼有所觀。觀

非大乎。孟子曰。大人者。正己而物正。此之謂也。

充實而有光輝之謂大。

和順積中。而英華發外。美在其中。而暢於四肢。發於事業。則德業

至盛。而不可加矣。慶源輔氏曰。大則形見於外矣。故集註以德業至盛不可加言之。

**精義**程子曰。充實而有光輝。所謂修身見於世也。又曰。中庸言其次致曲。以至著則明。謂之光輝之時也。

大而化之之謂聖。

大而能化。使其大者泯然無復可見之迹。則不思不勉。從容中道。

而非人力之所能為矣。慶源輔氏曰。大則猶可以目見。而指言。至於化則無迹。不可以目見。不可以言傳。無

待於思維。無假於勉強。從容自然。與道為一。而非人之智力所能及矣。張子曰。大可為也。化不可為

也在熟之而已矣。

**語類**古人用聖字有兩樣。大而化之之謂聖。是一般。如智仁聖義

之聖。只通明亦謂之聖。

**精義**程子曰。大而化之。只是理與己一。其未化者。如人操尺度量

是已。張子曰。氣有陰陽。推行有漸。為化。合一不測。為神。其在人

也。知義利用。則神化之事。脩矣。德盛者窮神。則智不足道。知化則

義不足云。天之化也。運諸氣。人之化也。順天時。非氣非時。則化之

名何有。化之寔何施。中庸曰。至誠為能化。孟子曰。大而化之。皆以

其德合陰陽。與天地同流。而無不通也。

**大全**雙峯饒氏曰。生知安行。是性之之聖。大而化之。是反之之聖。

○朱氏公遷曰。聖以全體至極言。亦曰專言之者。凡言資質



德性與衆人異者。性之之聖也。自學者推之。以至其極者。此說反  
之。之聖也。孔子以性之之聖。而加反之之功。斯所以爲性之之至  
也。

聖而不可知之之謂神

程子曰。聖不可知。謂聖之至妙。人所不能測。非聖人之上。又有一  
等神人也。

**語類**問。可欲之謂善。至聖而不可知之之謂神。曰。善渾全底好人。  
無可惡之惡。有可喜可欲之善。有諸已之謂信。真箇有此善。若不  
有諸已。則若存若亡。不可謂之信。自此而下。雖一節深一節。却易  
理會。充實謂積累。光輝謂發見於外。化則化其大之之迹。聖而不  
可知處。便是神也。所以明道言仲尼無迹。顏子微有迹。孟子其迹  
著。或問顏子之微有迹處。曰。如願無伐善。無施勞。皆是。若孔子無

迹。只是人捉摸不着。

**精義**程子曰。神者妙萬物而爲言。若上竿弄瓶。以至斲輪。誠至則  
不可得而知。上竿弄瓶。始於習。數尺而後至於百尺。習化其  
高。矧聖人誠至之  
事。豈可得而知。

**大全**南軒張氏曰。本領在可欲之善。信者信此者也。美者美此者  
也。犬則充此而有光輝也。化則爲聖。而其不可知。則神也。至  
於聖且神。其體亦不外此而已。又曰。可欲之善。聖人之事。脩焉。  
人生而靜。皆具此體。至於化而聖。然後爲全盡。純於此者也。

樂正子二之中四之下也

蓋在善信之間。觀其從於子敖。則其有諸已者。或未實也。朱子曰。未必皆  
實。有諸已。故不免有失錯處。慶源輔氏曰。意者樂正子雖能明  
善。而亦工夫未到。於善未誠。使其誠有諸已。則於從子敖之事。當  
如惡惡臭。而自不向邇也。張子曰。顏淵樂正子皆知好仁矣。新安陳氏曰。樂正  
子資質純粹。畧似  
顏子。故橫渠  
引此立論。樂正子志仁無惡。而不致於學。所以但爲善人。信人  
而已。顏子好學不倦。合仁與智。具體聖人。獨未至聖人之止耳。慶  
源



輔氏曰張子并顏子言之見學之不可已如此。○程子曰士之所難者在有諸已而已能有諸已則居之安資之深而美且大可以馴致矣徒知可欲之善而若存若亡而已則能不受變於俗者鮮矣慶源輔氏曰程子又已其善而若存若亡則為流俗所變而終亦必亡之矣○新安陳氏曰此條重在尹氏曰自可欲之善至於聖而不可知之神上下一理擴充而至於神則不可得而名矣。一雲峯胡氏曰須看尹氏上下始而為人之所可欲者此理也終而為人之所不可知者亦此理也善非粗淺神非高虛惟在乎寔有此善而力行以充之耳○新安陳氏曰自善信至聖神高下固懸殊矣然雖聖神之極致亦不外乎自善信而充之生知安行之聖人固不必由科級而進學知利行以下之希聖未有不由科級而進者可欲之善真能有諸已勉勉循循充而擴之以至於極雖比性之之聖有生熟之不同豈有不能如身之之聖者

○孟子曰逃墨必歸於楊逃楊必歸於儒歸斯受之而已矣

墨氏務外而不情楊氏太簡而近實故其反正之漸大畧如此歸斯受之者憫其陷溺之久而取其悔悟之新也

**或問**逃墨逃楊果若是其有序與抑其偶然言之無先後也曰張子之言則固以為有彼善於此之意然亦未可知也

**大全**朱子曰楊墨皆是邪說無大輕重但墨氏之說尤出於矯偽不近人情而難行故孟子之言如此非以楊氏為可取也南軒張氏曰兼愛者棄本而外馳為我者狹隘而私勝墨之比楊猶奢之比儉自為者固非猶愈於兼愛之泛也泛者尤難反耳

今之與楊墨辨者如追放豚既入其豎又從而招之放豚放逸之豕豚也豎闌也招罾也羈其足也言彼既來歸而又追咎其既往之失也○此章見聖賢之於異端拒之甚嚴而於其來歸待之甚恕拒之嚴故人知彼說之為邪待之恕故人知此道



之可反仁之至義之盡也。雲峯胡氏曰於異端拒之甚嚴者至正者至大可以容小仁之至也於此可見聖賢至正至大之心矣。

**精義** 尹曰聖賢不為已甚者。

○孟子曰有布縷之征粟米之征力役之征君子用其一緩其二用其二而民有殍用其三而父子離

征賦之法歲有常數然布縷取之於夏。織麻曰布析絲曰縷五畝之宅匹婦所蠶也其成在夏故夏粟米取之於秋。帶殼曰粟去殼曰米粟米出於百畝

取之於冬。力役出於同井之家丁男所賦也至冬有暇始征之力役

從工賦之便皆力役之征也。當各以時若并取之則民力有所不堪矣。

也。新安陳氏曰用其二一時并用二今兩稅三限之法亦此意也。問布縷粟米力役之征周禮皆取之而孟子言用其一而緩其

也。二朱子乃有夏秋之辨夫夏秋之說始出於唐不知何所據而

也。二朱子乃有夏秋之辨夫夏秋之說始出於唐不知何所據而

云潛室陳氏曰緩非廢其征但不作一時併征之耳。月令孟夏蠶畢而獻繭稅孟秋農乃登穀始收穀布縷征之夏粟米征之秋乃古法若唐分兩稅始於德宗楊炎非止布縷粟米之征乃是取大曆十四年應收賦歛之數併而為兩稅名同寔異失孟子之意矣。尹氏曰言民為邦本取之無度則其國危矣。慶源輔氏曰此孟子言之以警夫取民無度者。

○孟子曰諸侯之寶三土地人民政事寶珠玉者殃必及身

尹氏曰言寶得其寶者安寶失其寶者危

**大全** 新安陳氏曰諸侯寶人民而善政事以治之則有人有土而常為吾寶矣。

○盆成括仕於齊孟子曰死矣盆成括盆成括見殺門人問曰夫子何以知其將見殺曰其為人也有才未聞君子之大道也則足以殺其軀而已矣

盆成姓括名也恃才妄作所以取禍徐氏曰君子道其常而已括



有死之道焉。設使幸而獲免，孟子之言猶信也。

**語類** 益成括恃才妄作，謂不循理了，硬要胡做。

**精義** 尹氏曰：小有才智，昧於義理，鮮能免於殺身之禍。

**大全** 南軒張氏曰：不聞道則為才所役，道者義理之存乎人心者也。於此有聞，則才有所不敢恃矣。人之有才，本不足以為人害，惟無所本而徒用其才，於是才始足以病已。甚至有取殺之道，又不若魯鈍無才之愈也。下側重用人邊，是帶說。小有才而未聞道者，身且不能保，為國者乃信而用之。亡國敗家，其何日之有。慶源輔氏曰：才出於氣而有限，才本是小。道原於性而無方，道本自大。況曰小有才，則又才之小者也。不達義理而惟才是逞，則行險僥倖，無所不至，不至於顛覆不已也。王論括是正旨，下論孟子之料括是餘意。孟子之言，但述其理之當然耳，不以為奇中也不信。學者不達而以是為奇，則必以料事為明，而駸駸然入於逆詐僥矣。

○孟子之滕館於上宮，有業屨於牖上，館人求之弗得。


館舍也。上宮，別宮名。業，屨織之有次業而未成者。蓋館人所作，置之牖上而失之也。

或問之曰：若是乎從者之慶也？曰：子以是為竊屨來，與曰殆非也。夫子之設科也，往者不追來者不拒，苟以是心至，斯受之而已矣。

或問之者問於孟子也。慶，匿也。言子之從者，乃匿人之物如此乎。孟子答之，而或人自悟其失，因言此從者固不為竊屨而來，但夫子設置科條以待學者，苟以向道之心而來，則受之耳。雖夫子亦不能保其往也。門人取其言有合於聖賢之指，故記之。

**大全** 慶源輔氏曰：苟以是心至，斯受之者，與人為善之公也。至於孺悲欲見則辭以疾，滕更在門則不見答，又義之所當然也。然教亦固在其中矣。此俱是言外餘論。

○孟子曰：人皆有所不忍，達之於其所忍，仁也。人皆有所不為，達之於其所為，義也。





惻隱羞惡之心。人皆有之。故莫不有所不忍。不爲此仁義之端也。然以氣質之偏。物欲之蔽。則於他事或有不能者。但推所能達之於所不能。則無非仁義矣。

**或問**○曰張子呂氏皆得之。呂曰凡人之心。於所愛子弟親戚。皆有不忍害之之心。但能達此心施之於其所忍。所忍者謂他人也。推已愛親戚之心。達之於他人。推愛人之心。達之於禽獸。則是仁也。凡人之心。自非元惡大憝。如穿踰爲盜。皆知其不爲。但能達此心。其他所欲爲而不合於義者。皆不爲。則是義也。達者舉此心加諸彼。充者充己性之所有。惻隱之心。仁之端也。不能充之。則不能仁。民愛物。故擴而充之。此惻隱無欲害人之心。則仁不可勝用。言仁有餘也。羞惡之心。義之端也。不能充之。雖不爲穿踰小盜。萬鍾之祿。則不辨禮義而受。故擴而充之。此羞惡不爲穿踰之心。則義不可勝用。言義有餘也。餽取物也。未可以言而言。則是以言餽取人之心也。知其可以言。餽取物也。未也。如蔡澤未見應侯。先宣言而激怒也。可以言而不言。則反以不言。餽取人之心也。知其可以不言。動其心故也。如商鞅知秦孝公意在強國。而不言強國也。穿踰者不必穿人之墻。踰人之屋。以竊取其貨財。但觀人之顏色。窺測人心之向背。或順人之旨。或激人之意。抵擻伺隙。以取財利。皆是穿踰之類也。但呂氏說

爾汝之實。與仁畧義詳者。恐未然。爾汝集註已言之。仁義之詳畧。則不忍之心。與害人之心。易見。而羞惡之心。穿踰之類。多端。故彼畧而此詳。欲其於此。有以識其推擴之端耳。

**語類**問此章前面雙關說仁義。後面却專說義如何。曰前一截是衆人所共曉。到這後又却細密難曉。故詳說之。又問莫有淺深否。曰後面也是漸漸較密。

**大全**慶源輔氏曰不忍者。惻隱之事也。不爲者。羞惡之事也。是本於性。發於情。而統於心。人之所固有者也。但爲氣稟所拘。物欲所蔽。則必失其正。而不能統夫性與情。故有所當發而不發。亦有所不當發而反發。遂至於其所不忍者。或有時而忍。於其所不爲者。或有時而爲。而性亦從而牴牾之矣。今教之以推所不忍。以達於所忍。推所不爲。以達於所爲。如是則心得其職。情得其正。而性之所以爲仁義者得矣。○西山真氏曰有所不忍。不爲者。此心之正也。能卽是心而推之。雖所忍者亦不忍。卽仁也。雖所爲者亦不爲。卽義也。○勿齋陳氏曰推廣善端。滿其所受。是之謂充。理無不通。行無不得。是之謂達。理無不通。以心言行。無不達。以事言



賜也達下學而上達君子上達慮患也深故達皆理無不通也家  
邦必達欲速則不達達不離道達道達德不成章不達達之天下  
皆行無不得也授之以政不達人皆有所不忍達之於其所  
所忍人皆有所不為達之於其所為則兼心與理言之

人能充無欲害人之心而仁不可勝用也人能充無穿窬之心而義  
不可勝用也

充滿也穿穿穴窬踰墻皆為盜之事也能推所不忍以達於所忍  
則能滿其無欲害人之心而無不仁矣能推其所不為以達於所

為則能滿其無穿窬之心而無不義矣新安陳氏曰達如瀟水自  
猷澮達之川自川達之海

充如水達海而充滿於其中也惟  
達而後能充如擴而充之意

**大全**朱子曰此心之量足以包括天地兼利萬物只是人自不能  
充滿其量所以推不去或能推之於一家而不能推之於一國或  
能推之於一國而不足以及天下皆是未足以充其本然之量慶源

輔氏曰此一節因前說而教人以充滿其本然之量也無欲害人  
之心即是所不忍無穿窬之心即是所不為是心也其量甚大其  
用有常人能推所不忍以達於其所忍然後能充滿其無欲害人  
之心量推所不為以達於其所為然後能充滿其無穿窬之心量  
能充滿其心量則其用有常而仁義不可勝用矣

人能充無受爾汝之實無所往而不為義也

此申說上文充無穿窬之心之意也蓋爾汝人所輕賤之稱人雖  
或有所貪味隱忍而甘受之者然其中心必有慚忿而不肯受之  
之寔人能即此而推之使其充滿無所虧缺則無適而非義矣

**語類**不直心而私意如此便是穿窬之類又云裏面是如此外面  
却不如此外面恁地裏面却不恁地此兩條與  
本註意合○叔器問充無受

爾汝之寔曰惡不仁者其為仁矣不使不仁者加乎其身惡不仁  
而不能使不仁者不加乎其身便是不能充無受爾汝之寔此下  
三條



與本註有隱顯之別。本註不善會之易涉意氣用事。故有此三條。全從義理上說。有反躬克己工夫在。○問集註云

實誠也。無肯受爾汝之實者。羞惡之誠也。須是自治。其人無不謹

然後無爾汝之稱。否曰。這些子註中解得不分曉。記得舊時解得

好。却因後來改來改去。不分曉了。看來實字對名字說。不欲人以

爾汝之稱加於我。是惡爾汝之名也。然我反之於身而去其無可

爾汝之行。是能充其無受爾汝之實也。若我自有未是處。則雖惡

人以爾汝相稱。亦自有所愧矣。新安陳氏曰。朱子此條。乃用趙註

名。是惡人之輕已也。反身而去其可輕之行。是能充其無受爾

汝之寔也。人能充滿其無受爾汝之寔行。則所為無往非義矣。○

問人。能充無受爾汝之實。曰。某舊說恐未然。看來人皆恐爾汝之

名。須是充此心。使無受爾汝之實。又曰。須是就惡其名處。充到那

無受爾汝之實處。則無所往而不為義矣。如今面前惡穿窬之名。

而背後却為穿窬。便有穿窬之實。須是無穿窬之實。始得。莊仲問

伊川為東坡所玩侮。是如何。曰。只是倒看了。充無受爾汝之實。孔

子之伐木削迹不成。也是。有受爾汝之實。可見又要活看

**大全**慶源輔氏曰。此一節事雖微。而理愈密。夫人不受爾汝之稱。

皆。是羞惡之實心。存養之不加。體察之不至。此兼動靜說。則

不受之。雖有得於此。而或則失於彼。亦不能充滿其實心之量。而

義有時而不行矣。惟能推所不受而達之於所愛。而無所滲漏。然

後能充滿其無受爾汝實心之量。無所適而非義也。此條合註意

按。作家亦有兼用其說者。因大註原可渾括語類之說。故或主大

註。或主語類。或兼參其說。亦非偏跛騎墻之見也。

士未可以言而言。是以言。餽之也可以言而不言。是以不言。餽之也

是皆穿窬之類也。

餽。採取之也。今人以舌取物曰餽。卽此意也。便佞。未可以言。隱默。以

言而不言。皆有意採取於人。是亦穿窬之類。然其事隱微。人所忽易。故




特舉以見例明必推無穿窬之心以達於此而悉去之然後爲能充其無穿窬之心也

**語類**問語者採取之意猶言探試之探否曰語是鈎致之意如本不必說自家却強說幾句要去動人要去悅人是以言語之也如合當與他說却不說須故爲隱難要使他來問我是以不言語之也又問政使當言而言苟有悅人之意是亦穿窬之類否曰固是這穿窬之心便是那受爾汝之實又問此章首言仁義而後專言義者何也曰仁只是一路不過只是箇不忍之心苟能充此心便了義却頭項多又問人能充無穿窬之心是就至粗處說未可以言而言與可以言而不言是說入至細處否曰然能充無受爾汝之實處工夫却甚大了到這田地功夫大段周密了所以說無所

往而不爲義也使行已有一毫未盡便不能無受爾汝之實矣達者推也是展去充填滿也填塞教滿又曰此段最好看

**大全**慶源輔氏曰此一節事之微而理之密又有甚於前者故以士言之夫不爲穿窬無受爾汝在士則有所不必道然一語一默之微發於計較安排而有意探取於人則是亦穿窬之類故集註亦以爲其事隱微人所易忽故特舉以見例必推無穿窬之心而達之於此類至纖至悉處亦不容有盡方始能充其無穿窬之心也其義亦精矣○雲峯胡氏曰孟子首篇曰善推其所爲欲齊王卽其不忍之心而推之也末篇曰達曰充欲人皆卽其有所不忍不爲之心而達之充之也擴此心之用無少壅遏則謂之達滿此心之量無少欠缺則謂之充集註論此達與充二字而推之一字凡五及之達者推之始充者推之終也不推不能達不達不能充集註可謂能發孟子始終教人之本旨矣先儒云孟子平生工夫受用處只是善推其所爲一句耳非朱子孰能發之哉所以集註論達字充字節節俱本推字說○新安陳氏曰此章後二節單言義無受爾汝之實正其行也戒以言不言語之正其言也正其言行以充其羞惡之心乃於稱謂語默日用之常事以求義之精焉語曰色厲內荏其猶穿窬與表記曰君子不以色親人情疏而貌親在小人則穿窬之盜也與皆可以充廣此義所當叅玩





○孟子曰言近而指遠者善言也守約而施博者善道也君子之言也不下帶而道存焉

古人視不下於帶記曲禮下天子視不上於袷不下於帶則帶之上乃目前常見至近之處也舉目前之近事而至理存焉所以為言近而指遠也

**或問** ○曰不知道者務為高遠之言則固荒唐而無餘味然欲其

近則又鄙淺而無深遠之趣也。不知約之可守則固泛濫而少成事。然欲其約則又狹隘而無廣博之功也。然則所謂善言善道者非有道之君子其孰能知之乎。曰諸說如何。曰皆得之。精義曰君子之言至近而指意深遠則可謂善言也。所守至約而德施廣博則可謂善道也。不下帶者近在目前也。君子之言近在目前而道德存焉者言近而指遠也。修之一身可謂約矣。身正則物正而天下平。此守約而施博也。君子治身如農夫治田除草曰芸農夫治田必除

其草則苗可長君子治身必去其惡則德可進人之患在於不治已而治人不責已而責人譬如農夫舍已之田治人之田所求於人者重責人深也所以自任者輕責已薄也

**語類**言近指遠守約施博四方八面皆看得見此理本是遠近博

約如一而行之則自近約始道理只是一但隨許多頭面去說又不可不逐頭面理會也○時可問君子之言也不下帶而道存焉不下帶或作心說曰所謂心者是指箇潛天潛地底說還只是中間一塊肉底是若作心說恐未是

**大全**慶源輔氏曰言近而指遠故測之而益深窮之而愈遠是君子教人之事

君子之守修其身而天下平

此所謂守約而施博也

**大全**南軒張氏曰所謂指遠者固存乎近所謂博施者固存乎約也。不下帶而道存言近而指遠也。蓋其所言只其身中事在



目前者耳。而至理初不外是也。修身而天下平。守約而施博也。修身則本立。由是而家齊國治天下平。皆其所推耳。○慶源輔氏曰。守約施博。故推之而無不準。動之而無不化。是君子治天下之事。

人病舍其田而芸人之田。所求於人者重而所以自任者輕。此言不守約而務博施之病。

**大全**

南軒張氏曰。舍其田而芸人之田者。不治其身而治人之譬也。不務在己者而責諸人。其自任亦輕矣。蓋不知一身為天下之本。故也。

○孟子曰堯舜性者也湯武反之也

性者得全於天。無所污壞。不假修為。聖之至也。反之者。修為以復其性。而至於聖人也。程子曰。性之反之。古未有此語。蓋自孟子發之。呂氏曰。無意而安行。性也。朱子曰。呂氏說性也。性下合添之者二字。有意利行而至於無意。復性者也。堯舜不失其性。湯武善反其性。及其成功。則一

也。

**或問**

○曰程子至矣。其論堯舜禹湯文武一條。尤有功。精義程子曰。堯與舜更無優劣。及至湯武便別。孟子言性之反之。自古無人如此說。只是孟子分別出來。便知得堯舜是生而知之。湯武是學而能之。文王之德。則似堯舜。禹之德。則似湯武。要之皆是聖人。其所謂動容周旋中禮。盛德之至者。兼夫經德不回以下。而言聖人之事。行法俟命。朝聞夕死者。以言進學之方也。此其等級明矣。呂侍講說詳實。  
呂曰。生而知之。安而行之。而行之。湯武也。君子內有其德。則外有其容。禮樂交錯於中。發形於外。故動容周旋中禮者。盛德之至也。論語鄉黨篇。記孔子之容。正皆盛德之至也。經常也。回邪也。于求也。君子常一其德。不為回邪。不欺鬼神。不愧屋漏。所以誠意正心。非求福祿也。哭死者。或以德。或以親。哭之以哀。非為生者為禮也。顏淵死。子哭之。慟從者曰。子慟矣。曰。有慟乎。哀發於誠心。是以慟而不自知。此非為生者也。言語必信。所以存誠。不欲欺人。非以正行為名也。仁義禮智。君子之法也。法在己。命在天。君子修其在己者。聽其在天者。故曰行法以俟命。而已矣。呂正字說皆精密。見集註。謝氏所謂當然而為之。當然而已。



矣。當然而為之，是為天之所為也。聖門學者，大要以此克己為本。克己復禮，無私心焉，則天矣。及楊氏所謂如惡

惡臭如好好色，出於誠心之自然，非為人。其說亦善。尹氏不論性之之德，而專言反之之功，其意亦善。尹曰：反之者，修為而復性也。反之而至于動容周旋

中禮，則至矣。行法者在己，命則聽之而已。不以係乎己也。惟能反之者為然。而語有未到，讀者審擇而

精思焉可也。然是理也。三代以降，惟董子嘗言之，而諸葛武侯言於其君，有曰：臣鞠躬盡力，死而後已。至於成敗利鈍，非臣之明，所

能逆睹也。程子語其門人，有曰：今容貌必端，言語必正，非欲獨善其身，以求知於人，但天理當然，亦曰循之而已矣。此三言者，所指

雖殊，要皆行法俟命之意。外此，則亦寂寥而無聞矣。斯道之傳，不傳考之於此，其亦可見也夫。

**語類** 湯武固皆反之，但細觀其書，湯反之之功，恐更精密。又如湯

誓與牧誓，數桀紂之罪，詞氣亦不同。史記但書湯放桀而死，武王遂斬紂頭，懸之白旗，又曰：湯有慚德，如武王恐亦未必有此意也。

細較固如此，然不重分別湯武優劣。

**大全** 朱氏公遷曰：此以德性言聖人身之兼用功而言，反之舉成

然而言，非指性而言也。乃所以性其性也。但性之性者，是性其性誠明之性，是性其誠，指其人而言曰：性者，自其率性而言曰：性之

動容周旋中禮者，盛德之至也。哭死而哀，非為生者也。經德不回，非以干祿也。言語必信，非以正行也。

細微曲折，無不中禮，乃其盛德之至。自然而中，而非有意於中也。經常也，回曲也，三者亦皆自然，而非有意而為之也。皆聖人之

事性之之德也。慶源輔氏曰：若有意於中，則必有勉強持守之意。力懈意弛，則必有所不中者矣。又曰：三者特舉聖人之庸行，人之所易曉者，以例其餘。聖人之動無不時也。豈有意而為之者哉。故集註斷以為聖人之事，性之之德也。



**語類**或問言語必信非以正行信言語以正行莫無害否曰言語在所當信若有意以此而正行便是有所為而然也

君子行法以俟命而已矣

法者天理之當然者也君子行之而吉凶禍福有所不計蓋雖未至於自然而已非有所為而為矣此反之之事董子所謂正其義不謀其利明其道不計其功正此意也○程子曰動容周旋中禮者盛德之至行法以俟命者朝聞道夕死可矣之意也新安陳氏曰惟聞道故生順死安雖夕死亦可惟行法故禍福皆一聽天命其意相類呂氏曰法由此立命由此出聖人也新安陳氏曰以法與命移上聖人說聖人從容中道身即為度法由我立與天為徒命由我出與天地合德與鬼神合吉凶如書云自作元命唐李泌云君相造命是也行法以俟命君子也聖人性之君子所以復其性也

**語類**聖人是人與法為一已與天為一學者是人未與法為一已未與天為一故須行法以俟命也

**大全**慶源輔氏曰法者凡古聖賢之所制皆是也蓋莫非天理之當然如為君而仁為臣而敬子孝父慈皆是也君子行之而吉凶禍福聽天所命我皆在所不計所謂俟命也雖未能如聖人之安行自然已非有所為而為之者矣

○孟子曰說大人則藐之勿視其巍巍然

趙氏曰大人當時尊貴者也藐輕之也巍巍富貴高顯之貌藐焉而不畏之則志意舒展言語得盡也朱子曰說大人則藐之蓋主於說而言如曰見大人則藐之則失之矣○慶源輔氏曰若不藐視之則是為其巍巍者所動矣志氣一有所懾怯則必不能展盡底蘊剛強者有懷或不敢盡其所欲言而反徇之

**或問**孔子畏大人而孟子藐之何也曰呂侍講敷陳詳實反復懇至尤得告君之體其曰藐之所以敬之則所以發孟子言外之意



者盡矣。精義呂曰大人謂當時之尊貴也。所為多。非先王之制。以道觀之。不足畏也。故曰說大人則藐之。勿視其巍巍然。富貴之勢。則氣舒意展。言語得盡。大人堂高數仞。榱題數尺。此宮室過侈。非先王之制。我得志不為也。食前方丈。侍妾數百人。此食色過數。非先王之制。我得志不為也。般樂飲酒。驅騁田獵。後車千乘。此酣酒嗜音。外作禽荒。非先王之制。我得志不為也。在彼者居處過制。奉養非度。動靜失禮。皆我所不為也。在我所行者。居之以仁。由之以義。節之以禮。和之以樂。皆古聖人所制之法也。我心何為畏彼人乎哉。孟子之意。所言在我者道耳。在彼者勢矣。道與勢孰重。藐之所以伸道。然則孔子曰畏大人何謂也。大人有道。則不嚴而尊。不動而威。此孔子之所畏也。若夫無道在上。以富貴自驕。大其聲色。拒人於千里之外。晏然自以為如日之在天。殊不知人心將離。而富貴之勢將去矣。君子有憂世之心。欲援天下之溺。乃定心定氣。條陳性命之理。道德之要。古今成敗之機。國家安危之策。以說其大人。庶幾感悟。格其非心。此孟子所謂藐之也。藐之所以欲之也。故曰我非堯舜之道。不敢陳於王前。故齊人莫如我敬王也。謝楊氏以孔孟之分而言。則學者所當知也。謝曰孔子與上大與下大夫言。便侃侃如也。冕者瞽者見之。便作過之便趨。蓋其德全盛。自然到此。不是勉強做出來。氣象與孟子渾別。孟子說大人則藐之。勿視其巍巍然。猶自忝較彼我。未有合一底氣象。然予嘗以為後世之畏大人。非畏大人也。畏其巍巍然而已也。故進而君公之退。而爾汝之。孟子之藐大人也。不視其巍巍然者而已矣。故雖不肯枉尺而直尋。而齊人之所敬王。莫孟子如也。特以當世之士。以道殉人。內無所守。故特發此以立其志。使其意氣舒展。無所拘束。勿畏其巍巍然。爾若夫君子以禮存心。固將無所不用其敬。豈特於大人而反藐之哉。附尹

曰內重則外輕。或問孔子畏大人。孟子說大人則藐之。如何。曰孟子方其陳說。君前不直則道不見。故藐之。若其平居。則其胸中亦未嘗不畏且敬也。曰藐者止是不以其貴顯威嚴為事。而惰非謂便視他作無物也。

**語類**敬之問說大人則藐之章曰這為世上有人把大人許多崇高富貴當事。有言不敢出口。故孟子云耳。集註說自分。明論語說畏大人。此却說藐大人。大人固當畏。而所謂藐者。乃不是藐他。只是藐他許多堂高數仞。榱題數尺之類。



堂高數仞。椳題數尺。我得志弗爲也。食前方丈。侍妾數百人。我得志弗爲也。般樂飲酒。驅騁田獵。後車千乘。我得志弗爲也。在彼者皆我所不爲也。在我者皆古之制也。吾何畏彼哉。

椳。椳也。題。頭也。食前方丈。饌食列於前者。方一丈也。此皆其所謂。巍巍然者。我雖得志有所不爲。而所守者皆古聖賢之法。則彼之巍巍者。何足道哉。○楊氏曰。孟子此章。以己之長。方人之短。猶有此氣象。在孔子則無此矣。不重貶孟子處。戰國之勢。又與孔子處春秋不同。

**大全**南軒張氏曰。藐讀如耿。左氏曰。以是藐諸孤。藐小之也。小之者。小其所挾也。視其巍巍然。則動於中。動於中。則慕在彼之勢。而屈在我之義矣。使在我不知古制之守。則爲其巍巍然所動矣。故程子曰。內重則見外之輕。得深則見誘之小。後之爲士者。惟不知古制之是守。故未得志。則有所慕。既得志。則行其所慕。遂欲不已。以爲天下害。士必寡欲。而後能守古制。守古制而後知自重。知自重而後不爲勢所屈。使其身用而道行。則生民受其福矣。○慶源輔氏曰。孟子有泰山巖巖然之氣象。便是指此等處而言也。

若聖人則大而化之。泯然不見其大之迹。故不至如此。然非聖人覺此而不爲也。德盛仁熟。大而化之。則自然不至有此等氣象矣。

○孟子曰。養心莫善於寡欲。其爲人也寡欲。雖有不存焉者。寡矣。其爲人也多欲。雖有存焉者。寡矣。

欲如口鼻耳目四肢之欲。雖人之所不能無。然多而不節。未有不失其本心者。朱子曰。集註云。云多字對寡字說。才要多些。子便是欲。學者所當深戒也。程子

曰。所欲不必沉溺。只有所向便是欲。慶源輔氏曰。程子又極其微。向處便加克治。若待其發出。則加難矣。

**敬園**養心寡欲之說。曰。程子至矣。而其曰。不必沉溺者。尤密。呂侍講所謂。天下之難持者。莫如心。天下之易染者。莫如欲。其亦善矣。精義。呂曰。治心之道。莫善於少欲。少欲則耳目之官。不蔽於物。而常寧矣。心常寧。則定而不亂。明而不暗。道之所自生。德之所自成也。不存焉者。特亡之謂也。寡欲之人。操其心而存之。無有特亡之患。故雖有不存焉者。寡矣。其爲人也多欲。則妄動而無節。妄作而



失常善端所由喪。而天理虧焉。故雖有存焉。寡矣。呂說前段有此。亦可觀。曰周子之言。不止於寡而存者奈何。周子曰。養心不止於寡而存耳。蓋寡之又寡。以至於無。則誠立明通。曰語其所至。則固然矣。

然未有不由寡欲而能至於無者也。語其所至。而不由其序。則無自而進。語由其序。而不要其至。則或恐其安於小成也。是以周子之說。於此為有相發之功焉。此兼不可臚等而進。不可半塗而廢意說。

**語類**問養心莫善於寡欲。曰緊要在寡字多字。看那事又要。這事

又要。便是多欲。○養心莫善於寡欲。欲是好欲。不是不好底欲。不好底欲。不當言寡。可見聲色貨利之類。不止言寡。○只是言天理人欲相為消長。分數其為人也。寡欲。則人欲分數少。故雖有不存焉者。寡矣。不存焉。寡則天理分數多也。其為人也。多欲。則人欲分數多。故雖有存焉者。寡矣。存焉者。寡。則是天理分數少也。○敬之問養心莫善於

寡欲。養心也只是中虛。曰固是。若眼前事事要時。這心便一齊走了。未是說無。只減少便可漸存得此心。若事事貪。要這箇又要那箇。未必便說到那僻不好底物事。只是眼前底事才多欲。便將本心都紛雜了。欲字說得周密。且如秀才要讀書。要讀這一件。又要讀那一件。又要學寫字。又要學做詩。這心一齊都出外了。所以伊川教人。直是都不去他處用其心。也不要人學寫字。也不要人學作文。章。這不是僻。道理自合如是。人只有一箇心。如何分做許多去。若只管去間處用了心。到得合用處。於這本來底。都不得力。且看從古作為文章之士。可以傳之不朽者。今看來。那箇喚做知道。自左史以及八家文。固美矣。也是此初心下。只趨向那邊。都是做外去了。只謂之知道。則未也。是要得寡欲。存這心。最是難以湯武聖人。孟子猶說湯武反之也。



反復也。反復得這本心。如不邇聲色。不殖貨財。只爲要存此心。觀  
旅獒之書。一箇獒受了。有甚大事。而反覆切諫。以此欲之可畏。無  
小大皆不可忽。○敬之問寡欲。曰未說到事。只是纔有意在上。而  
便是欲。便是動自家心。欲字說得深細東坡云。君子可以寓意於物。不可  
以留意於物。這說得不是。纔說寓意。便不得人好寫字。見壁間有  
碑軸。便須要看別是非好畫。見掛畫軸。便須要識美惡。這都是欲。  
這皆足以爲心病。某前日病中間坐。無可看。偶中堂掛幾軸畫。才  
閉眼。便要看他。心下便走出在那上。因思與其將心在他上。何似  
閉着眼坐。得此心寧靜。子善問如夏葛冬裘。渴飲飢食。此理所當  
然。才是葛必欲精細。食必欲飽美。這便是欲。曰孟子說寡欲。如今  
且要得寡。漸至於無。

**大全**

南軒張氏曰。寡欲爲養心之要。然人固有天資寡欲者。有天  
資多欲者。其爲人寡欲。則不存者寡。多欲則存焉者寡。以是  
知養心莫善於寡欲也。此從下兩句。倒入首句。存者謂其心之不  
外馳也。雖然。天資寡欲之人。不存固寡。然不知存。其存則亦莫之  
能充也。若學者以寡欲爲要。則當存養擴充。由寡欲以至於無欲。  
則其清明高遠者。爲無窮矣。此推寡欲後一層工夫。○勉齋黃氏  
曰。孟子嘗言求放心矣。又言存其心矣。操之則存。舍之則亡。心之  
存亡。決於操舍。而又曰。莫善於寡欲何也。操存固學者之先務。然  
人惟一心。而攻之者衆。聲色臭味交乎外。榮辱利害動乎內。隨感  
而應。無有窮已。則清明純一之體。又安能保其常存而不放哉。此  
孟子發明操存之說。而又以爲莫善於寡欲也。雖然。寡欲固善矣。  
然非真知夫天理人欲之分。則何以施其克治之功哉。故格物致  
知。又所以爲寡欲之要。此又學者之所當察也。此補寡欲前一層  
工夫。此論寡欲對粗淺人說。若對有學問人說。當如程子說。及語  
類諸條。○雲峯胡氏曰。孟子一書三養字。皆切要語。曰養氣。曰養  
性。曰養心。合而觀之。氣生於理。善養氣者在養性。理具於心。善養  
性者在養心。心泊於欲。善養心者在寡欲。寡之  
又寡。以至於無。則心存而理存。氣不必言矣。

○曾皙嗜羊棗而曾子不忍食羊棗

羊棗實小黑而圓。又謂之羊矢棗。

朱子曰。羊棗只是北  
邊小棗。如羊矢大者。

曾子以父



嗜之。父沒之後，食必思親，故不忍食也。

**大全** 勿軒熊氏曰：須看不忍字重。母沒而括捲不能飲，不忍故也。不忍字是通章伏案，不容徑盡。

公孫丑問曰：膾炙與羊棗孰美？孟子曰：膾炙哉。公孫丑曰：然則曾子何為食膾炙而不食羊棗？曰：膾炙所同也，羊棗所獨也。諱名不諱姓，姓所同也，名所獨也。

肉聶而切之為膾，詳見膾不炙，炙肉也。

**精義** 呂曰：孝子之於親，生則致其養，終則致其哀，思其居處，思其笑語，思其志意，思其所樂，思其所嗜。曾皙嗜羊枣，而曾子忍食之乎？夫膾炙非不美也，天下之所同嗜也，羊枣非天下之所共美也，曾皙獨嗜者也。以曾子之孝，豈不能忘口腹之欲，而孜孜膾炙哉？思其生平所獨嗜者，故食膾炙而不食羊枣也。猶諱名不諱姓，諱其所獨而不諱其所同也。

**大全** 朱氏公遷曰：此章據其事實而追論之。先君子梧岡先生曰：見其重遺體，養志是生能致其養，不食羊枣是沒能盡其思。

○萬章問曰：孔子在陳，曰：盍歸乎來！吾黨之士狂簡，進取不忘其初。孔子在陳，何思魯之狂士？

盍，何不也。狂，簡謂志大而畧於事，進取謂求望高遠，不忘其初，謂不能改其舊也。此語與論語小異。慶源輔氏曰：志大謂狂，畧於事謂簡。如曾點異乎三子者之撰。

則志大而畧於事，可知直欲躡乎聖人之樂處，則期望高遠可知。終不肯做下學工夫，後至於臨人之喪而歌，不能改其舊，可知。狂簡二字，又該括得下兩句。進取，即是志大，不忘其初，即是畧於事也。

孟子曰：孔子不得中道而與之，必也狂狷乎。狂者進取，狷者有所不為也。孔子豈不欲中道哉？不可必得，故思其次也。

不得中道，至有所不為，據論語亦孔子之言。然則孔子字下當有曰：字論語道作行，猥作狷，有所不為者，知恥自好，不為不善之人也。孔子豈不欲中道以下孟子言也。



孟子近朱大全卷十四  
敢問何如斯可謂狂矣

萬章問

曰如琴張曾皙牧皮者孔子之所謂狂矣

琴張名牢字子張子桑戶死琴張臨其喪而歌事見莊子

莊子太  
宗師篇

子桑戶孟子反子琴張相與為友子桑戶死未葬孔子聞之使子貢往行事焉或編曲或鼓琴相和而歌曰嗟來桑戶乎而已反其真而我猶為人猗子貢趨而進曰敢問臨喪而歌禮乎二人相視而笑曰是惡知禮意雖未必盡然要必有

近似者曾皙見前篇季武子死曾皙倚其門而歌事見檀弓

禮檀  
弓云

季武子寢疾疇固不脫齊衰而入見曰斯禮也將亡矣士惟公門脫齊衰武子曰不亦善乎君子表微及其喪也會點倚其門而歌又言志異乎三子者之撰事見論語牧皮未詳

**語類**問孔門狂者如曾皙琴張輩是也如子路子夏輩亦可謂之  
獍者乎曰孔門亦有狂不成狂獍不成獍如冉求之類是也至於

曾皙誠狂者也。只爭一撮地。便流為莊周之徒。

何以謂之狂也

萬章問

曰其志嚶嚶然曰古之人古之人夷考其行而不掩焉者也

嚶嚶志大言大也。重言古之人。見其動輒稱之。不一稱而已也。夷

平也。掩覆也。言平考其行而不能覆其言也。新安陳氏曰志大言大。動輒慕古。狂故也。

平考其行。行不掩言。簡故也。程子曰曾皙言志而夫子與之。蓋與聖人之志同。

便是堯舜氣象也。特行有不掩焉耳。此所謂狂也。慶源輔氏曰曾

於如此。然其不屑於事為。其志直欲徑探乎聖人之樂處。則與所謂嚶嚶然曰古之人古之人古之之意亦不相遠。而其行有不能掩其言者。則又自有所不可誣也。故集註取程子之說以釋之。夫子與之者。是與其志大言大也。便是堯舜氣象者。是亦所謂古之人古類也。



孟子近朱大全卷十四  
狂者又不可得欲得不屑不潔之士而與之是獯也是又其次也

此因上文所引遂解所以思得獯者之意狂有志者也獯有守者  
也有志者能進於道有守者不失其身屑潔也新安陳氏曰以不  
善為不潔而不屑  
為之也

**大全**朱子曰狂者知之過獯者行之過南軒張氏曰中庸云知者  
過之其狂者與賢者過之  
其狷者與鄉原則所謂小人之中庸也慶源輔氏曰狂者是合  
下氣質高明便是有所見者狷者是合下氣質貞固便是有所守  
者狂者則於知上所得分數多狷者則於行上所得分數多聖門  
學者必皆中與和合德知與行並進然後為貴所謂中道者是也  
此等人既不可得故不  
得已而與夫狂狷也

孔子曰過我門而不入我室我不憾焉者其惟鄉原乎鄉原德之賊  
也曰何如斯可謂之鄉原矣

鄉原非有識者原與愿同荀子愿慤字皆讀作愿謂謹愿之人也

荀子榮辱篇孝悌愿慤以敦比其事業富國篇其臣主百吏汙者皆化而修悍者皆化而愿躁者皆化而慤是明主之功也正論篇主端誠則下愿慤上公正則下易直矣語類朱子曰鄉原原與愿同荀子原慤註讀作愿是也觀孟子意是言好不是言不好荀子說他好孟子是說他不好此須善會之然此一人只是如此下自是不可進了故鄉里所謂原人謂之鄉原孔子以其似德而非德故以為德之賊過門不入而不恨之

以其不見親就為幸深惡而痛絕之也萬章又引孔子之言而問也慶源輔氏曰先儒皆以原為善不惟無所據又既謂之善人則不應以為德之賊故集註引荀子以為証以原為愿且曰鄉人無知其所謂愿人謂之鄉原原字固淺狹又鄉人以為原則亦非真愿者也

曰何以是嚶嚶也言不顧行行不顧言則曰古之人古之人行何為  
踽踽涼涼生斯世也為斯世也善斯可矣闒然媚於世也者是鄉原也

踽踽獨行不進之貌涼涼薄也不見親厚於人也鄉原譏狂者曰



何用如此嚶嚶然行不掩其言而徒每事必稱古人耶又譏狷者曰何必如此踽踽涼涼無所親厚哉人既生於此世則但當為此世之人使當世之人皆以為善則可矣此鄉原之志也以上皆釋闔如奄人之奄閉藏之意也周禮春官守桃奄八人遠廟曰桃奄如今之室者媚求悅於人也孟子言此深自閉藏以求親媚於世是鄉原之行也

**語類**問鄉原之義曰原字與愿字同義以其務為謹愿不欲忤物以取容專務徇俗欲使人無所非刺既不肯做狂又不肯做狷一心只要得人說好更不理會自己所見所得與天理之是非彼狂者嚶嚶然以古人為志雖行之未至而所知亦甚遠矣狷者便只是有志力行不為不善二者皆能不顧流俗汙世之是非雖是不得中道却都是為己不為他人彼鄉原便反而笑之曰何以是嚶

嚶也言不顧行行不顧言則言古之人此是鄉原笑狂者也行何為踽踽涼涼生斯世也為斯世也善斯可矣此是鄉原笑狷者也彼其寔所向則是闔然媚於世而已孔子以他心一向外馳更不反已故以為德之賊而孟子又以為不可與入堯舜之道

**大全**朱子曰鄉原者為他做得好便人皆稱之而不知其有無窮之禍如五代馮道者此真鄉原也慶源輔氏曰闔然媚於世此是鄉原之隱情匿志孟子說破其

情狀萬章曰一鄉皆稱原人焉無所往而不為原人孔子以為德之賊何哉

原亦謹厚之稱而孔子以為德之賊故萬章疑之曰非之無舉也刺之無刺也同乎流俗合乎汙世居之似忠信行之



似廉潔衆皆悅之自以為是而不可與入堯舜之道故曰德之賊也

呂侍講曰言此等之人欲非之則無可舉舉槩舉其失也欲刺之則無可

刺也刺細數其失也流俗者風俗頹靡如水之下流衆莫不然也

汗濁也流俗狹汗世廣非忠信而似忠信以存心言非廉潔而似廉潔

以制行言○呂氏本說曰流俗者王者不行風俗頹靡如水之順

流而俱下若獨以為不然獨以為不善則必見非於流俗而鄉原

乃與之同汗世者王道不明而人所見者汗下若衆人皆濁而已

獨清則必得罪於汗世而鄉原乃與之合非忠信而似忠信故非

之無可舉之非非廉潔而似廉潔故刺之無可刺之惡但浮

沉俯仰以同流俗合汗世而已故汗世流俗之衆皆悅之也

**大全**朱子曰狂者所見過於高遠而行不到狷者能力行而見有

所不逮二者皆可收拾入來至於鄉原則孟子敢斷然以為德之

賊者蓋其居之似忠信行之似廉潔衆皆悅之使其回頭來却未

可知只為他自以為是既把來做是了便休是以終身為原人而

孟子以為德之賊也南軒張氏曰此數句極鄉原之情狀非之無

能合言其無所執守也以忠信廉潔曰似則非真矣衆皆悅之則

異乎鄉人之善者好之矣自以為是所以卒為鄉原而不可反也

堯舜之道大中至正天理之存乎人心者也此所謂善也若鄉原

善斯可矣則出於一己之私竊善之似而已異端之於正道如黑

與白本不足以賊德惟道之不明世俗之見易以溺惑故以為德

之賊也○慶源輔氏曰鄉原既欲人以爲謹愿故同乎流俗而不

敢自異合乎污世而不能自拔故衆皆悅之自以為是則

又迷而不知反故不可與入堯舜大中至正真寔之道也

孔子曰惡似而非者惡莠恐其亂苗也惡佞恐其亂義也惡利口恐

其亂信也惡鄭聲恐其亂樂也惡紫恐其亂朱也惡鄉原恐其亂德

也

孟子又引孔子之言以明之莠似苗之草也佞才智之稱其言似

義而非義也利口多言而不寔者也鄭聲淫樂也樂正樂也紫間

色朱正色也鄉原不狂不獯人皆以為善有似乎中道而寔非也



故惡其亂德。慶源輔氏曰伎者有口才能辨說故以為才智之稱惟其能言則其說多似善而寔不然故以為害義巧言之人徒尚口而初無誠寔故以為害信鄉原既譏狂者故不狂又譏僇者故不僇衆皆悅之故人皆以為善而不可與入堯舜之道故有似乎中道而寔非此聖人所以恐其亂德而深惡之據論語所載亦與此不同雖有詳畧然其惡似而非之意則一也。

君子反經而已矣。經正則庶民興庶民興斯無邪慝矣。

反復也。經常也。萬世不易之常道也。經只是倫常日用常行的道理。與興起於善也。邪慝如鄉原之屬是也。新安陳氏曰邪慝不止是鄉原如楊墨皆是以此章言則指鄉原故云鄉原之屬。世衰道微大經不正故人人得為異說以濟其私而邪慝並起不可勝正君子於此亦復其常道而已常道既復則民興於善而非明白無所回互。吳氏曰回互委曲掩覆也二句釋正字。雖有邪慝不足以惑之矣。尹氏曰君子取夫狂狷者蓋以狂者志大而可與進道狷者有所不為而可與有為也所惡於鄉原而欲痛絕之者為其似是

而非惑人之深也。絕之之術無他焉亦曰反經而已矣。

或問狂狷鄉原之說曰程子二說皆善。精義程子曰中者只是不猶言中者是大中也庸者是定理也定理者天下不易之理也是經也孟子只言反經中在其間。又曰過猶不及如琴張曾皙之狂皆過也然而行張子於反經尤致意焉皆切要之語也其曰正不掩焉是無寔也。張子於反經尤致意焉皆切要之語也其曰正經能久則儘透徹學者當深念之。呂范亦詳。呂曰夫曾皙志不欲也仲尼與之而孟子以為狂何也曰狂者非猖狂妄行之謂也其志大其言高不合于中道故謂之狂子貢問師與商也孰賢子曰師也過商也不及以子張所為過中道故亦謂之狂也。牧皮之事雖不可見其行與二子同也。而文義間有未安者。

語類狂狷是個有骨肋底人鄉原是個無骨力底人東倒西搯東邊去取奉人西邊去周全人看人眉頭眼尾周遮掩蔽惟恐傷觸了人君子反經而已矣所謂反經去其不善為其善者而已。○敬

盡心下 五十



之間經正則庶民興。這個經正還當只是躬行亦及政事否。曰：這  
個不必分做兩件說。如堯舜雖是端拱無爲，只政事便從這裏做  
出。那曾恁地便了。有禹湯之德，便有禹湯之業。有伊周之德，便有  
伊周之業。終不如萬石君不言而躬行。凡事一切不理會，有一家  
便當理會一家之事。有一國便當理會一國之事。又曰：孟子當楊  
墨塞道，其害非細。孟子若不明白說破，只理會躬行教他自化，如  
何化得。賀孫問：此卽大學明德新民之至否。曰：然。新民必本於明  
德。而明德所以爲新民也。○集註反經經者，天下之大經。如父子  
有親，君臣有義，夫婦有別，長幼有序，朋友有信。又如大學中止於  
仁，止於敬之類，是提起大綱。然而天下之事雖至纖悉，舉不出於  
此。理非集義不可。○問：集義反經之說如何。曰：經是大經，君臣父

子夫婦兄弟朋友五者。若便集義，且先復此大經。天下事未有出  
此五者。其間却然有曲折。如大學亦先指此五者爲言，使大綱得  
正，則其他節目皆可舉。若不先此大綱，則其他細碎工夫如何做。  
謂如造屋，先有根腳，然後牕牖有安頓處。

**大全**朱子曰：論鄉原亂德之害，而卒以君子反經爲說。此所謂上  
策。莫如自治者。况異端邪說日新，月盛，其出無窮。蓋有不可勝正  
者。惟吾學旣明，則彼自滅熄耳。此學者所當勉而不可以外求者  
也。○經正則庶民興，蓋風化之行在上之人，舉而措之而已。庶民  
興，則人人知反其本而見善明，見善明則邪慝不能惑也。旣人之  
不惑，則其道自然銷鑠而至於無也。歐陽永叔云：使王政明而禮  
義充，雖有佛無所施於吾民矣。亦此意也。



○孟子曰由堯舜至於湯五百有餘歲若禹臯陶則見而知之若湯則聞而知之

趙氏曰五百歲而聖人出。天道之常。然亦有遲速。不能正五百年。故言有餘也。仁山金氏曰。邵子經世書。自己會之未。以運經世之。亥。一百四十歲。而交卒會。以運經世之二。子。歲在甲子。禹攝之。八年。下至經世之三。卯。歲在巳卯。凡四百五十二年。而成湯有天下。下至以運經世之四。亥。歲在癸亥。凡六百三十九年。文王爲西伯。以運經世之五。至以運經世之六。未。與戊之歲。凡五百八十七年。而孔子生。又七十一年。庚申。獲麟。三年。壬戌之歲。孔子卒。至以運經世之七。寅。乙酉之歲。孟軻至梁。上去孔子卒。凡一百四十四年。○慶源輔氏曰。天道固有常。尹氏曰。知謂知其道也。矣。然亦不能截然整齊。須有先後遲速。

**語類** 蔣端夫問。聞知見知。所知者何事。曰。只是這道理。物物各具一理。又問。此道理如何求。謂見之於心。或求之於事物。曰。不知所求者何物。若不以心於何求之。求之於事物。亦是以心。

**大全** 雲峯胡氏曰。論孟末皆言堯舜以來相傳之意。但論語以行言執中。中之用也。湯言降衷。中之體也。舜自心上說出執中之蘊。而六經言心。始此。湯自性上推原降衷之初。而六經言性。始此。此可見堯舜湯明道處。至若見而知之。言禹臯。而不言稷契。何也。或曰。舉禹臯。或例其餘。然考之書。稷契不曰謨。而禹臯獨曰謨。蓋可見也。况洪範九疇。禹發之。天敘天秩。五典五禮。臯發之。其明道之功。固不小也。

由湯至於文王五百有餘歲。若伊尹、萊、朱則見而知之。若文王則聞而知之。

趙氏曰。萊、朱、湯賢臣。或曰。卽仲虺也。爲湯左相。萊、朱卽仲虺。奚仲

湯伐桀南巢。惟有慚德。曰。予恐來世。以

爲口實。仲虺乃作誥。其語具載商書。**大全** 雲峯胡氏曰。舜言精一。而後協于克一。伊尹能發之。堯言執中。而後建中于民。仲虺能發之。曰。勇曰智曰仁曰禮曰義。中庸三達德。孟子四端。已散發見於仲虺誥中矣。皆只是知。萊、朱卽仲虺也。○論語之末言武不言文。此言文不言武。文王謨以明道言也。武王烈以行道言也。易之作也。其于中古乎。文王明道之功大矣。○新安陳氏曰。萊、朱與伊尹並稱。而經傳不他見。仲虺作誥。



弘大精微。仁義禮智信。皆開端言之。而德日新一言。又首唱之。湯盤銘。伊尹咸有一德。皆因而述之。伊尹相湯。應為左相同時。他誰與之班者。萊朱。即仲虺也。必矣。

由文王至於孔子五百有餘歲。若太公望。散宜生。則見而知之。若孔子則聞而知之。

散宜生。名文王賢臣也。周書君奭篇。公曰。惟文王。尚克修和我。有夏。亦惟有若虢叔。有若閎夭。有若散宜生。有若泰顛。有若南宮适。又曰。無能往來。茲迪彝教。文王。茂德降於國人。子貢曰。文武之道。未墜於地。在人。賢者識其大者。不賢者識其小者。莫不有文武之道焉。夫子焉不學。此所謂聞而知之也。

**大全** 或曰。尚父鷹揚之士也。散宜生。於經傳不多見。亦以為見文王之道而知之者何也。雲峯胡氏曰。敬勝怠。義勝欲之類。非太公孰發之。書曰。茲迪彝教。則彝倫之教。散宜生蓋有助焉。

由孔子而來。至於今。百有餘歲。去聖人之世。若此。其未遠也。近聖人之

之居。若此。其甚也。然而無有乎爾。則亦無有乎爾。

林氏曰。孟子言孔子至今時未遠。趙氏德曰。孟子之生。雖不可知。而悼公立。凡四十年。元公二十一年。穆公三十三年。共公二十二年。康公九年。景公二十九年。共一百六十四年。而魯平公繼立。由孔子而來。至於今。百有餘歲。則孟子必生於穆公之末。共公之初。以魯平公之將見孟子。而臧倉沮之。梁惠王見之。而稱曰。叟其年先後於穆其之。聞槩可見矣。鄒魯相去又近。然而已無有見而知之者矣。則五百餘歲之後。又豈復有聞而知之者乎。朱子曰。自孔子至今。方百餘歲。去孔子之時。若此。其未遠也。孟子

子鄒人。近孔子所居之魯。又若此。其甚也。若使今此已無有見而知之者。則如前所云。五百歲之後。豈復有聞而知之者乎。○東陽許氏曰。爾如是也。指見知聞知者而言。然而無有乎爾。正謂在孟子時。去聖人之世。雖未遠。而當時見知者。今亡矣。須將此一節於一串之下。○愚按此言。雖若不敢自謂已得其傳。而憂後世遂失其乃見意。

傳然。乃所以自見其有不得辭者。而又以見夫天理民彝。不可泯滅。百世之下。必將有神會而心得之者耳。雲峯胡氏曰。集註神會。心得四字。有深意。蓋為



聞而知之者言也。孟子所謂見而知聞而知者，知其道也。知其道者，知其心也。時有先後之異，心無先後之間。萬古一理，千聖一心。世遠而心之神明相接，迹異而心之天理相孚。默而成之，不言而信，此其為神會而心得之者歟。故於篇終歷序羣聖之統而終之，以此所以明其傳之有在。新安陳氏曰：此申明孟子隱然謂道統之傳在已，但其辭婉，其意深，非詳玩味之，不能見耳。而又以俟後聖於無窮也。又此申明則亦無有乎爾之意，以望後世聖賢之能傳道統者，此已為程子接孟子之絕學張本矣。其旨深哉。○有宋元豐八年，河南程顥伯淳卒，潞公文彥博題其墓曰：明道先生，而其弟頤正叔序之曰：周公沒，聖人之道不行，孟軻死，聖人之學不傳，道不行，百世無善治，學不傳，千載無真儒。無善治，士猶得以明夫善治之道，以淑諸人，以傳諸後，無真儒，則天下貿貿焉莫知所之人欲肆，而天理滅矣。先生生平千四百年之後，得不傳之學於遺經。吳氏程曰：明道嘗云：吾學雖有所受，所受受於濂溪也。天理二字，却是自家體貼出來，則其得之經者為多，亦可槩

耳。以興起斯文為己任，辨異端，闢邪說，使聖人之道煥然復明於世。蓋自孟子之後一人而已。雲峯胡氏曰：朱子贊濂溪先生之言曰：道喪千載，聖遠言湮，不有先覺，孰開我人。今言明道而不言濂溪者，二程夫子受學于濂溪先生，見而知之者也。且孟子所述歷聖之相傳者，非徒為其行道而言，寔為其聞知見知，有以明斯道而言也。伊川墓述專言學不傳則道不明之害，而又深言夫明道之功，正與孟子之意脗合。故集註述之。然學者於道不知所向，則孰知斯人之為功，不知所至，則孰知斯名之稱情也哉。情寔也，名稱其寔也。雲峯胡氏曰：論語之末，堯行百世無善治，武王以後，事學不傳，千載無真儒。孔孟以後，事無善治而下，又言道之不明，其害有甚于道之不行者也。○又曰：所向者人道之始事，所至者造道之極功。學者不知所向，則非有志於斯道者，不足以知明道，不知所至，則非深造乎斯道者，亦不能真知明道也。趨向之正，造詣之深，庶乎可知。明道之所以為明道矣。真知明道，則真知堯舜，以至於孔孟者矣。善乎勉齋黃氏之言曰：由孔子而後，曾子子思繼其微，至孟子而始著。由孟子而後，周程張子繼其絕，至朱子而始著。朱子出而自周以來，聖賢相傳之道，一旦豁然。如大明中天，昭晰呈露，然則集註所謂百世而下，必有神會而心得之者，朱子亦當自見其有不得辭者矣。



或問卒章之說曰范氏所謂七篇大意得之矣但禹臯陶之徒本皆名世之士伊尹太公又湯文之師非必見其君而後知之也至於湯文孔子又或生知之聖亦非必聞前聖之道而後得之也此而曰見而知之聞而知之者蓋以同時言之則斯道之統臣當以君為主以異世言之則斯道之傳後聖當以前聖為師學者不以辭害意焉可也至於章末二句則孟子之致意深矣觀其所謂然而無有乎爾則雖若托于不居而其自任之寔可見觀其所謂則亦無有乎爾則雖若歎其將絕而所以啟夫萬世無窮之傳者又未嘗不在於斯也學者誠能深考其言而自得之則古人雖遠而其志意之所存者蓋無以異乎曰相與言而授受於一堂之上也故于此竊以子程子之傳係焉後之君子其必將有慨然有感於

斯者夫

**語類**問然而無有乎爾則亦無有乎爾曰惟三山林少穎向某說得最好若禹臯陶則見而知之湯則聞而知之蓋曰若非前面見而知得後之人如何聞而知之也孟子去孔子之世如此其未遠近聖人之居如此其甚然而已無有見而知之者則五百歲之後又豈復有聞而知之者乎

**大全**朱子曰由堯舜至孔子率五百餘歲而聖人一出所以異世同心歷聖同道道統繩繩相續不絕者寔賴同時之見而知之者知之於先而異世之聞而知之者得以知之於後耳見知聞知側串說重見知邊○雲峯胡氏曰論先後則不有見而知之者而孰有聞而知之者○是則見而知之者為先論難易則見而知之者聚精會神于一時之頃而聞而知之者心融神會于異世之遙是則聞而知之者為難也



問答

孟子通分大全卷十四

Faint vertical text within a rectangular border, likely bleed-through from the reverse side of the page.

天監四年



